

MATEYON DADA UAID

Esuquidistun tsusedpabotedi chiaid (Duc 3.23-38)

¹ Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

² Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic.

³ Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid.

⁴ Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic.

⁵ Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic.

⁶ Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cuesunetanquin aton chido bedshun aton mado Sadomon tishmepampic.

⁷ Sadomonën mado Doboan nepampic. Doboanën madobic Abias cuëmédquid. Abiasën madobic Asa cuëmédquid.

⁸ Asan madobic Osapad cuëmédquid. Osapadën madobic Odan cuëmédquid. Odanën madobic Usias cuëmédquid.

⁹ Usiasën madobic Otan cuëmédquid. Otanën madobic Acas cuëmédquid. Acasën madobic Esequias cuëmédquid.

¹⁰ Esequiasën madobic Manases cuëmédquid. Manasesën madobic Amon cuëmédquid. Amonën madobic Osias cuëmédquid.

¹¹ Osiasën madobic Econias cuëmédquid. Aid Econias caid aton matsesadobëdtabi yuanuen Babidonia yacnocquidon aton nidaidën buampampic.

¹² Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed cuëmédpampic.

¹³ Sodobabedën madobic Abiud cuëmédquid. Abiudën madobic Ediaquin cuëmédquid. Ediaquinën madobic Asod cuëmédquid.

¹⁴ Asodën madobic Sadoc cuëmédquid. Sadoquën madobic Aquin cuëmédquid. Aquinën madobic Ediud cuëmédquid.

¹⁵ Ediudën madobic Ediasad cuëmédquid. Ediasadën madobic Matan cuëmédquid. Matanën

madobic Acobo cuëmédquid.

¹⁶ Acobon madobic Ose cuëmédpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bédambo icmequidquio nec. Isadaidbon cainaidquio nec.

¹⁷ Aidtedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Econias aton matsesbédta buanaid ënquin chiombi. Adoshombic Econias ënquin chuiboed chuioaquin padpiden bedanquin aton matses 14tedbidi chuiquin Esusquiobi ënquin chiombi.

Esuquidistu tishaid
(Duc 2.1-7)

¹⁸ Nèbi aid tishaidquio chuinu. Esus tishabi yec aton tita Madia icpac caondash. Abi inuequidën Osen bedabi icshobi Nuquin Papan Mayanën bacuë usundomepac caondash.

¹⁹ Usundoacsho isun abi inuequidën Osen dada utsin chudaïd danec: —“Nèbi mibi bedtiapimbo iquebi,” quequin bedenquio icnuen dada uashun Madia menenu —queuidpac caondash. Nuquin Papan chiacpadquio bédambo icquid icquin naden chambo icpac caondash. —Bedabi bacuë usundoaque. Cuidquimbien ictiad —quequin aton matses chienquio yequi: —Bedenquio icnuen dada uaid menenu —queuidpac caondash.

²⁰ Adnubien Nuquin Papan abi yacnoshon uaidën mayan bédan Ose ushquin ismepac

caondash. –Dabid yampidën tsyuecquid icsho mibi chuinu, Ose. Tantia. Chudenquoio icquin Nuquin Papan Mayanën Madia bacuë usundomiaye. Dacuëndenda. Dacuëdenquoio icquin Madia min shubuno buanta.

²¹ Adoshombic dada bacuë tishacsho Esus cuënta. “Matses icsaid bedshunquin Nuquin Papa aton matses cuidmenquoio iquendac,” quequin Esus cuënta –quequin mayan bēdan Ose ushquin ismepac caondash.

²² Aden mayan bēdan Esus tishte chiacpadomboen Nuquin Papan ambi chiaid naden dada uamepampic.

²³ “Dadan inacmaidēmbi bacuë usundoshon dada bacuë tishendac.

Aidi Imanued cuënendac.

‘Nuquin Papapadquidquibidi matsesbēd tabadnuec choash nec,’ quequin Imanued cuënendac,”

quequin Esus tishte Nuquin Papan dada uamepampic.

²⁴ Aden mayan bēdan chiac isucunshumbien aidën chiacpadomboen Osen aton shubuno Madia buampac caondash.

²⁵ Buanshun Osen chudenquoio icnubi dada bacuë tishpac caondash. Tishacsho Esus cuëmpac caondash.

2

Uispa isquido Esus isec choaid

¹ Nidaid Udeya caid yacno tabadquin shubu daëdpactsëcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid

Edodes cuëmëdquid icpac caondash. Aid icnubi matses utsibo uispa isquido Esus isnuec ushë choacmiuësh chopac caondash. Edusaden yacno choquin

² anocquido chuituidpac caondash. —Min mat-ses isadaidbo chuiquid̄ dapa ictequidquio nēbi tishsaidēmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bēdamboshē ictequid nec,” quiash aid isnuec chopobi —quetuidpac caondash.

³ Adsho tantiash dacuēdcuededpac caondash abitedimbo. —Padtec. ¿Midapadquid bacuē nependabac? —quecuededpac caondash Edodes isadaidbo ancaquid ambi ancaidobēdi.

⁴ Adshumbien Edodesēn abi yacno tsusiobo cho-chomepac caondash. —¿Mitsicquid caique? Tiantanu —qeshun abi yacno Moisesēn dada uampid chuiبانquido abi chuiquid dapabobēdta cho-chomeshumbic: — ¿Mitsishunquio Nuquin Papan chomiaid min mat-ses chuiquid dapa ictequid tishpash? ¿Ada Nuquin Papan chiaid isbanquin tantio? —caquien:

⁵ —Ai, tantiembi. “Nidaid Udeya caid yacno tabadquin shubu daēdpactsēcquid Beden caid yac-noshon aid bacuē tishendac,” quiampicpadembi tantiembi. Nuquin Papan ambi chiaid nuquin tsusedpa dada uamepampic naden.

⁶ Shubu daēdpactsēcquid Beden caid yacno-
quido chiec:

“Beden yacno tabadec nidaid Udeya caidēn
tabadquido mibi nec.

‘Chuiquid dapa nibēdnuc icsambo iquendac,’ quedenedi mibi yacnoshon chuiquid dapa ictequid tishendac.

Aidēmbi isadaidbo matses chuiquid dapa icquin bēdamboen tabadmendac,”

—quequin Nuquin Papan Esus tishte chiaid chuipac caondash tsusiobon Edodes caid chuiquin.

⁷ Adoaquien Edodesēn ambi ancaido isadaidbo ismenquio icquin matses utsibo uispa isquido chomeshun chuimepac caondash. —¿Nēbida tishaid tantiamete uispa isquin tauao? ¿Nēid inchēshēn ushēmbida isbeno? ¿Ēndenda isbenonda? En chui. Tantianu —cac chuisho

⁸ tantiashun: —Beden yacno istan. Ano nidshun mimbi chiacpadquid bacuē istan. Aid bacuē istanec cuenquin ēbi chuibenta. Ēmbitsen istanu. “Nuquin Papan chomiaid chuiquid dapa ictequid bēdambo iquec,” quequin ēmbitsen istanu —capac caondash Edodesēn muaquimbi. —Cuesunenu —quequimbi adopac caondash.

⁹ Adoaquien ushē choacmiuēsh bed-bedquesho ambi isbēquin tsibambēboedi uispa tsibanec Beden yacno nidpac caondash. Adec nidnubien uispa shubu ismec niduntpac caondash: —Bacuē ictsaid shubu nēid iquec —quec.

¹⁰ Adsho isashien cuishonquepac caondash uispa isquido.

¹¹ Adash shubun puduedshun isquien aton tita Madiabēd bacuē ictsec. Aid isashic: —Matses chuiquid dapa ictequid nec. Matses bēdambo icmetequid nec —quequin aton matsesēn nacpadomboen ismequin danēshēn sebudpac caon-

dash. Adshumbic ambi bëboed aton na bëdambo icquid chicshun menepac caondash nëidtedi. Nëidic shocosh piu. Nëidic bëdambo nuadnuc tauitequid. Nëidic bëdambo noadec danoshquete. Aidtedi menepac caondash. Adoash ushtopac caondash.

¹² Adec ushtoacsho Nuquin Papan ushquin ismepac caondash. —Isadaidbo ancaquid Edodes chuibidanenda —quequin ushquin ismiac isucunanec abi choboedën nidenquio yec podqued utsin nidpac caondash aton shubuno nidec.

Equipito yacno Osen buanaid

¹³ Esus isuanquido nidambien Nuquin Papan abi yacnoshon uaidën mayan bëdan Ose ushquin ismepac caondash. —Isucunanec cuenta. Bacuëmpi aton titabëdta buanec nidaid utsi Equipito caid yacno cuenta. Ĕmbi chiabi choenda. Anobi tabadta. Edodesën: “Bacuëmpibo cuesun siatanta,” cac cho-choeque. Cuenta —quequin Ose ushquin ismepac caondash mayan bëdan.

¹⁴ Aden ushquin ismiac isucuntantsequi inchëshëmbi puđuanec aton bacuë anibëdta buanec nidaid utsi Equipito caid yacno Ose nidpac caondash.

¹⁵ Equipito yacno nidash ambobi tabadpac caondash. Isadaidbo ancaquid Edodes unësabi icnuc Equipito yacno tabadpac caondash. Esus tishabi icnubi ëndenquimboshë Nuquin Papan tantiamiac ambi chiaid chuibanquidën Esus Equipito yacno buante chuiquin dada uapampic naden chuiquin. “Equipito yacno nidash tabadsho: ‘Auëshquio cho, Mado, caindambi,’ quiosh Nuquin

Papa,” quequin Nuquin Papan chiaid dada uapampic.

Bacuëbo dadpen cuesun siatanaid

¹⁶ Adnubien isadaidbo ancaquid Edodes: —Uispa isquidon cacuidposhi —quiash comapenec nēishun aton yuabo sondado chuipac caondash. —Uispa isquidon chuibocpadtsēcquid comapenec onquecuenabi ictsēcquidotedi dada bacuëmpibotedi cuesun siatan. Beden yacnocquidon bacuëbobëdtabi uano pauequidon bacuëbotsen cuesun siatan —cac cuesun siatampac caondash.

¹⁷ Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

¹⁸ “Abi yacnuësh aton bacuëbo nibëdansho isash isadaidbon chidobo sedenquecuededen-dac.

Unësaid tantiec baded ënëdenquio yec sedenquebudnendac,” quequin chiampicpadomboen aton bacuëbo nibëdamepac caondash.

¹⁹ Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash.

²⁰ —“Bacuëbo cuesun siatan,” quiondaid unësaccoshe. Min chido min bacuëbëdta buanec min nidaid Isadaid caidën nidoata —caquien

²¹ isucunanec aidën chuibocno buanuec nidpac caondash.

²² Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancadened unësaidën mado Adquedayo caid ancanquidquibidien nechitec —quesho tantiashien dacuëdtampac caondash Ose. Adshobien Nuquin Papan Ose ushquin ismeoapac caondash. —Cuesunenushe. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmbo nidpac caondash.

²³ Uquëmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampicpader anobi tabadpac caondash. Auëshquio canipac caondash Esus.

3

*Uan acten mentoanquidën chuibeniaid
(Mad 1.1-8; Duc 3.1-9, 15-17; Uan 1.19-28)*

¹ Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash.

² Adquid icquin Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash.

³ Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

“Masiuidpambo yacno shubu nibëdacno capuquin
ëcac matses chosho chuibenendac.

‘Chuiquid dapa choeque. Podqued
andëdbanshunta,’ quiacbimboen:

‘Nuquin Icbombo choeque.

Icsaid ënash bëdamboec tabadta,’ quequin
chuibenendac,”

quequin Isayasën Uanën chuite chuipampic.

⁴ Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsipantebic nidaidën capuquid yua bitsi nacnenaid tsiupondash. Aton pete bacumbëd sh-ioshbimboecquid icpondash.

⁵ Aidën Nuquin Papan chiaid chuibenesho tantianuec nëidtedi matses cho-chopac caondash. Nëidic shubu dadpen icquid Edusaden caid yacnocquido. Nëidic nidaid Udeya caid yacnocquido. Nëidic acte Odan caid cuëman tabadquido. Aidtedi cho-chopac caondash.

⁶ Cho-choshon Uanën chuisho tantianu: — Nuquin Papan chiaid niac-niaquec icsapobi. Icsaboedi aid tantiec bëdamboec tabadtiadquio iquebi —quesho: —“Nëid Nuquin Papa tantianu,” quequid nec —quequin acte Odan caidën mentopac caondash Uanën.

⁷ Adnubien padiseyobobëd saduseyobo Uan isec cho-chopac caondash. Padiseyobo isadaidbo tsusedpabon chiaid namequido nec. Saduseyobobic: —Matses unësaid uincuenenquio iquendac —quequido nec. Aido cho-chosho isun

Uanën: —Nisibimboecquido mibi nec. Adquidën icsa uac bimboen matses icsa uaquido mibi nec. Bëdambo icquid damianquiec mibi iquiec. “Nuquin Papan mibi cuidnushe. Tantiatan,” quequin ¿tsuntsin chiac cho?

⁸ Mentomete bunec Nuquin Papan chiaid niac-niacboedi ënash bëdamboec tabadta.

⁹ “Ëbipadquid Abadauanën tsyuecquidoudtsëqui Nuquin Papan bëdamboen isec,” quequin tantienda. ¿Adquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icsho isun nëid cuënotebi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiata.

¹⁰ “Icsambo icquid nec,” queshun ambi nitsinaid cuëte bacuëesa dëdshun nëdëncac bimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chiec.

¹¹ Adshumbic padpiden chuiquin Esusën nate chuipac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Ëbi bëdiactsëc tantiaquid ictsëcnuc aidquien comapenen tantiaquidquio yec bëdamboshë iquendac. “Aidquio bëdamboshë icquid icnuc ¿atotsieshun icsaquidquiobi: ‘Aid choec,’ quequin chuiquidquio Nuquin Papan ëbi icmeposh?” quec tsadebi. Ëmbi chuiboed choshon: “Ëbi tantiaquid nec,” queshun aton Mayan menequin bëdamboec tabadte mibi tantiamendac. Abi tantiesaboen

cuidendac.

¹² Piacbo choeshashun putu bushcaquin se-cacbimboen abi tantiesabo chian anëdënquiacno nësecaindac. Adshumbic abi tantiaquido abëdi tabadmendac —quepac caondash Uan acten mentoanquid.

Uanën Esus mentoaid

(Mad 1.9-11; Duc 3.21-22; Uan 1.32-34)

¹³ Acte Odan caidën matses mentoec adpac caondash Uan. Adnubien Uan yacno Esusquio chopac caondash. Aton nidaid Cadidia caid yacnuësh tauamboen matses ismenuec choec: — Èbitsen mento —quetuidpac caondash.

¹⁴ Adshobien Uanën: —Padenquio iquembi. Nuquin Papan chomiaid icquin mimbibi ëbi naquien bëdambo ictsiash. ¿Atotsieshun ëbi aden chie? Padi —qeshobien:

¹⁵ —En na. Bëdambo iquec. Èbi mentoquin mimbi Nuquin Papan chiacpadomboen natsiaque. Èbi acten mento —quesho tantiashun Esus acten mentopac caondash Uanën.

¹⁶ Adoac Esus pudundonobien canchedacbimboec abu shëcuë yampac caondash. Adsho isaquien aid shëcuë yacnuëshquio dëbimbimboec budec Nuquin Papan Mayan Esusquio matsadtopac caondash abëd icnuec.

¹⁷ Adnubien abucuëshquio Nuquin Papa onquiampac caondash. —Nëid ëmbi tantiaidquio con Mado nec. Èmbi chiacpadomboen nasho isash bëdambo iquebi —quepac caondash Esus caic.

4

*Satanasën Esus icsamenuequin tanuidaid
(Mad 1.12-13; Duc 4.1-13)*

¹ Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënnquid Satanasën Esus icsamenuequin ma tanu —quequin ambo nidmepac caondash.

² Adoaquien buna mëmunquin penquio yec Esus tsadpac caondash. Inchëshën ushë abentsëc nidmiash utsi tashquecuntsëcnuc 40tedec ushquin penquio yec comapenec bumpac caondash.

³ Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien

⁴ Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bëdamboec tabadpec? Nuquin Papan chiacpadomboenuidi naiquien matses bëdamboec tabadtsiash,” quequin dada uapampid iquec —quepac caondash Esus.

⁵ Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasën Esus manidtomepac caondash abucquio.

⁶ Adotanquimbien padpiden chuioaquin: —¿Nuquin Papa caidën Madombobida mibi neque? Aidën Mado yec nëuëshquio pudunta. Nuquin Papan mibi päedmenquio ictsiashe. Nadentsen Nuquin Papan chiaid dada uapampic.

“‘Uidën uata,’ quequin ambi abi yacnoshon uaido mayan bédabo Nuquin Papan chiac mibi uidën uaindac paëdenquio icnuc.

‘Cuënoten tadquëdnushe,’ queshun adoendac,” quequin Nuquin Papan chiaid dada uapampique. Pudunta –caquien

⁷ Esus: –Padi. Nuquin Papan chiaid dada uapampid nad iquec. “‘¿Icsamboen tantiaquin ëmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi –quepac caondash Esus.

⁸ Adoaquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash.

⁹ Adoshombic: –Nëidtedi mibi menetsiambique. Ëbi con icbo cata. Ëbi aden chuiquin ismenuen danëshën sebudta. Adsho isun ëmbi ismiactedi mibi menembi. Aidën icbo mibi icmembimbi –caquien

¹⁰ Esusën: –Padi. Baded cuenta. Nuquin Papan chiaidquio chuiquin naden dada uapampique. “Nuquin Papa abentsëcquiobi mimbi tantiaiduidtsëqui min Icbombo neque. Aidën namiaidquio icta,” quequin dada uapampique. Cuenta –capac caondash Esusën.

¹¹ Adoaquien Satanas cuempac caondash. Cuenubien Nuquin Papan abi yacnoshon uaido mayan bédabo choshon abëdi tabadquin Esus bëdambo icmepac caondash.

Cadidia yacnoshon Esusën chuibeniaid
(Mad 1.14-15; Duc 4.14-15)

¹² Adashic aton nidaid Cadidia caidën Esus nidpac caondash. –Mibi acten mentondayd Uan bedshun quënën nauedac caosh –quesho tantiash nidpac caondash.

¹³ Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic.

¹⁴ Esus ambo tabadte chuiquin Nuquin Papan con tsusedpa Isayas cuëmëdquid dada uamiampic-padec ambo tabadpac caondash Esus. Naden dada uapampic.

¹⁵ “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

¹⁶ Aidtedishun Nuquin Papan chomiaid tantien-dac.

Pabiate cuënëdacimboec icsamboec tabadquin Nuquin Papa tantienquio icboedombi tantiabenendac.

Nuquin Papa tantiamenuen chuibansho tantiashun matsesën paposhquiacimboen Nuquin Papa tantiabenendac.

Abi tantienquo icsho Nuquin Papan cuidtse-
 naidombi Nuquin Papa tantiabenendac
 ushash isucunacimboen,”
 quequin Isayas Esus choash tabadte dada
 uamepampic Nuquin Papan.

¹⁷ Ashunquiobi Nuquin Papan chiaid
 chuiquin tauamboen Esusën matses abitedimbo
 chuibenepac caondash. —Icsaid ënash Nuquin
 Papa tantiec ambi chiacpadec bëdamboec tabadta.
 Nëbi Nuquin Papan abëd tabadtequido icmequin
 matses bëdamboen tabadmendac —quepac
 caondash Esus ambibi naid chiequi.

Nuëcquid bedquido Esusën: Cho, caid
(Mad 1.16-20; Duc 5.1-11)

¹⁸ Aden chuibenec chian dapa Cadidia caid
 cuëman nidquin isquien dadan aton utsibëdtambi
 nëshaid dapambo acte nënepec. Aid Simombidi Pe-
 tedo capec. Aton utsi Andedes nec. Aid daëdshun
 nuëcquid bedquidombo icquin aton nëshaid acte
 nënesho istuidpac caondash Esusën.

¹⁹ Adshumbien Esusën: —Nuquibi icnu. Cho.
 Nuëcquid bedquid icboedi nëbi ëbi chuibanquid
 mibi icmenu

²⁰ —caquien aton nëshaid nianec nidquimbi Esus
 tsibanampac caondash.

²¹ Udictsëc nidquin isquien dada daëd cano
 antabëdpec. Acobo aton utsi Uambëd icpac
 caondash. Aton papa Sebedeyo caidbëdi cano
 antabëdquin nuëcquid bednun aton nëshaid dapa
 nacnempac caondash. Adsho istuidshun Esusën:
 —Nuquibi icnu. Cho —caquien

²² aton papabëdta cano nianec Esusbëd icnuec
 nidpac caondash.

*Matses dadpen Esusën chuibeniaid
(Duc 6.17-19)*

²³ Adashic aton nidaid Cadidia caid yacnobi capucuenec Nuquin Papan chiaid chuibante shubun-shubunquiec puduedcuenequin Esusën Nuquin Papan chiaid chuibenepac caondash. Abi yacno tabadmenun Nuquin Papan bēdamboen iste matses chuibeniac caondash. Adshumbic daicsaidotedi bēdamebampac caondash.

²⁴ Adosho istanquin: —Bēdamequidquo nec — quequin isboedon Ēsusën naid chuibenepac caondash. Ēnapen nidec nidaid utsi Sidia caidēn nidshun chuibeniac caondash. Aden chiac daicsaidotedi bē-bēpac caondash. Dada paēmboshē icquido yec podobitsi icsa dapuduedaido yec unēsanequido yec dada shēquēquenquo icquido yec quenuc bē-bēacsho aitedi bēdamepac caondash Esusën.

²⁵ Aden: —Bēdamiosh —quequin chiac isec cho-choash dadpenquo tsucus-tsucustsēcquo yec tsidadash niqianquin Esus tsibanampac caondash. Nēidtedshun tsibananac caondash. Nēidic nidaid Cadidia caidēn tabadquidon. Nēidic shubu dadpen icquid Decapodis caid yacno tabadquidon. Nēidic shubu dadpen icquid Edusaden caid yacnocquidon. Nēidic nidaid Udeya caidēn tabadquidon. Nēidic acte Odan caid uquē cuēma utsiuc tabadquidon. Aitededshun Esus tsibanampac caondash.

5

Nadquido bēdambo iquendac, quequin Esusën

*chiaid**(Duc 6.20-23)*

¹ Matses dadpenshun tsibananac macuësh dapa cuëte nibëdpamboecquid pudundoec poctsebi Esus tsadtuidpondash. Abi tsibananash matses dadpen abi datsidadnubien abëd icquido Esusën dayunquio tabadpondash.

² Adshobien Nuquin Papan matses bëdamboen isquin bëdambo icmete Èsusën matses abitedi chuibampondash.

³ —¿Mitsipadquid Nuquin Papan bëdambo icmepec? Nadquid caimbique. Tantia. Mibitedi chuinu. “Èbembì bëdamboec tabadtiapimbo iquebi. Bëdapenquio iquebi. Nuquin Papan bëdamboen tabadmiaquini bëdamboec tabadtsiac,” quequid Nuquin Papan: “Èbëd tabadtequid nec,” quequin bëdambo icmendac.

⁴ “Matses abitedi icsamboec tabadnuc ëbitsen icsamboec tabadquid nebi,” quec shubiquimbi abi tantiasho Nuquin Papan bëdamboen isquin bëdambo icmendac.

⁵ Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bëdambo icmendac. Yuecshun ambi nidaid chuca uaidën tabadmendac.

⁶ Pete bunachimboec ambi chiacpadec bëdamboec tabadte bunquid Nuquin Papan bëdamboen tabadmendac.

⁷ Abi chieshënuquidi chieshënenquio icquin bëdamboen isquid Nuquin Papan bëdamboen isendac.

⁸ Ambi chiacpadomboenuidi nate bunquid Nuquin Papan bëdambo icmequin abibi bëismendac.

⁹ Aton matses chieshënansho isash: “Padi. Chën. Bëdamboequien tabadtiad,” quequid Nuquin Papan bëdambo icmequin con mado caindac. Adquidbidi adembidi con champi caindac.

¹⁰ Nuquin Papa tantiec bëdamboec tabadsho utsin chieshënaid Nuquin Papan bëdambo icmequin unësacsho abëdi tabadmendac.

¹¹ “Esus tantiaquid nec,” queshun utsin mibi chieshënquin chiacsho Nuquin Papan abëd tabadmenuen mibi bëdambo icmendac. Mibi cueso adembidi mibi bëdambo icmendac. Adembidi mibi muauasho Nuquin Papan mibi bëdambo icmendac.

¹² Aden utsibon: “Esus tantiaquid nec,” queshun chieshënaqui cuishonqueta. “Ënden tsusedpabon Nuquin Papan chiaid chuisho chieshënquin cuesunepampic. Adoacsho Nuquin Papan bëdamboen isquin abëdi tabadmec. Adembidi utsibon chieshënacsho ëbi bëdamboen isquin unësacsho abëdi tabadmendac,” quiash cuishonqueta –quequin chuipondash Esusën.

*Abi tantiaquido bëdamboec tabadte chiaid
(Mad 9.50; Duc 14.34-35)*

¹³ Abi macuësh dapa poctse tsadquin Esusën chuibampondash. —“Ma utsibontsen Nuquin Papa tantianu,” quec sa pambid casecac batambo yec petiadquio yachimboec icta. Aden Nuquin Papan chiacpadec bëdamboec tabadquin mimbi utsibo bëdamboec tabadte bumetsiac. Sa batambo icquid bëdambo iquec. Sa batambo icboedi batapenquio yec icsasho ¿mitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec.

Adembidi matses bēdamboec tabadenquo yec icsambo icscho Nuquin Papan chian anēdēnquiacno nēsecatequid nendac —quepondash Esus.

¹⁴ Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuc bēdamboec tabadta. ¿Nuntanshunda ēapadic? Padenquo. Umanucshumbien ma tantianueshun ēaquid. Adembidi: “Ma Nuquin Papan chiacpadec tabadte tantianu,” quiash ēnēdenquo yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo.

¹⁵ ¿Utsibo chuinuecta abentsēqui uano icpadic? Padenquo. “Ma nēidēn tantianu,” quec aibdēdi bēdamboec tabadquin chuibanquid.

¹⁶ Adembidi ēbi tantiesabobēd tabadquin: “Ma Nuquin Papa tantianu,” quequin ēnenquo icquin Nuquin Papan chiacpadomboen nata. “ ‘Nuquin Papa bēdambo iquec,’ ma utsibotsen quenu,” qeshun adota —quequin Esusēn chuipondash.

Nuquin Papan Moises chuimiaid chiaid

¹⁷ Nadentsen Esusēn chuipondash. —Ēmbi chuibansho tantiashun: “Nuquin Papan chiaidquo chienquo iquec,” quequin tantienda. “Nuquin Papan Moises dada uamiampidbēdta con tsusedpabo utsibo dada uamiampid chienquo icquin utsi uapēc,” mimbi ēbi capec. Mambi utsi uainquo yoc. Nuquin Papan chiaid utsi uainquo icquin ambi chiatedimbo namenuc nebique.

¹⁸ Abimbo chuinu. Tantia. Abubēdta nidaid nibēdamiabi icnuc Nuquin Papan chiaid

bēnudiapimbo iquendac. Ambi chiactedimbo naquin Nuquin Papan nainendac.

¹⁹ Padnubic Nuquin Papan: “Nadomboen nata,” quequin chiaid abentsēqui niacquin aid chiaid-bidi adomboembidi niacmequid Nuquin Papan: “Bēdambo icquid nec,” catiapimbo iquec. Utsibic Nuquin Papan chiacpadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdamboshē icquid nec,” caindac.

²⁰ Moisesēn dada uampid chuibanquido padiseyobobēd Nuquin Papa yacno puduedtequidoen mimbi dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash –quequin chuipondash Esusēn.

*Chieshēmēnquido nēish bēdante chiaid
(Duc 12.57-59)*

²¹ Adshumbic Esusēn padpiden chuiopondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiacpadomboen matses cuidte chuiquidēn cuesunemequin cuidquid,” quequin chuiampid mimbi tantiec.

²² “Nadquidotsen cuidtequido nec,” quequin chuinu. Tantia. Aton matses nēishēnash aton nēish bēdanenquio icsho Nuquin Papan cuidtequido nendac. Utsibic chieshēmēnec icsamboec cuēmēnquido isadaidbo tsusiobon cuidacsho isun: “Bēdamboen naic,” catsiambi. Nēidic aton matses chieshēnquin

shëpiaquid Nuquin Papan icsano nësecaquin cuidtequido nendac.

²³ “Chieshëmënquid Nuquin Papan cuidtequid nendac,” quequin ëmbi chuisho tantiasun bëdamboen nata. Nuquin Papa tabadte shubu uashunaidën puduedash: “Ambi chiacpadomboen musuc menenu,” mibi quepec. Aden musuc menenumbi mimbi naid tantiata. “¿Ada ëbi chieshënquid icpec? ¿Ëmbi chieshëmeboedta icpec?” quequin tantiata.

²⁴ Adshun: “Ai, ëmbi chieshëmeboed iquec,” qeshun Nuquin Papa tantiaquin mimbi bëboed meniabi mibëd chieshënamboed yacno nidash aidbëd bëdamboec onqueta. Adec bëdamboec onquiash padpidec choashun Nuquin Papa tantiaquin meneta. Adec mibëd chieshënamboedbëdi bëdamboec onqueta.

²⁵ Mibëd chieshënamboed utsimbic: “Nëid cuidmenuen cuidte chuiquid yacno buanchitembimbi iquec,” qeshun: “Baded nid,” cac podquedën nidec aidbëd bëdamboec onquenidta: “Ma nëish bëdanu,” quiash. “Matses cuidte chuiquidën cuidchitoshe,” quiash badedquio mibëd chieshënamboedbëd bëdamboec isnanta. Abi yacno buanacsho cuidte chuiquidën: “Icsambo iqueque. Quënën nauedta. Ëmbi chiated piucquid ëmbi bedabi icnuc ma tsadpanu,” mibi catsiash. Quënën nauedshun

²⁶ ambi chiated piucquid nibëdnuc mibi cuemenquio ictsiashe. Mibëd chieshënamboedbëdi bëdamboec onqueta. “Nuquin Papan adembidi cuidnushe,” quiash adta –quequin Esusën chuipondash.

Icsaquin chudaid chiaid

27 Adshumbic naden Esusën chuipondash. — Chiaid utsitsen mimbi tantiec. “Min chidopenquoio chudenda. Min bënëpenquoio chudmenda. Aben uequid chudenda. Aben uequidën dada chudmenda,” quequin Nuquin Papan chiaid nuquin tsusedpan dada uapampic.

28 Aden chiaid niac-niaquec icsambo icquid icnubi nadquid icsambo icoaic. Aton chidopenquoio isec: “Aidquoio chudtiadquoio icchitebi,” quequin otacquoio tantiequi matses icsapec.

29 Ĕshën isec mibi min chidopenquoio bunec icsaic. Ĕshë chicshuniac bimboec icsainquoio yec ënëdash mibi bëdambo ictsiac. Icsaid ënenquoio icquid Nuquin Papan chian anëdënquiacno nësecaquin cuidendac.

30 Min chidopenquoio chudte bunquin mëismec mibi icsaic. Mëteshuniac bedtiapimbo yac bimboen mibi icsaid ënta. Ĕnenquoio icquid Nuquin Papan cuidendac — quequin Esusën chuipondash.

Aton chidobëd cuëshëdte chiaid (*Mat 19.3-9; Mad 10.11-12; Duc 16.18*)

31 Nadentsen Esusën chuipondash. — Nuquin Papan Moises chuimiaid utsitsen mimbi tantiec. “Aton chido bunenquoio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic.

32 Utsitsen chuinu. Aton chidon bënëpenquoio chudmesho istuidshun Moisesën chiacpadomboen nac bëdambo ictsiash. Aton chido dada utsi chudmesa icshobi dadan ambembi dada

uaid menequin nidmiac icsambo ictsiash. Aden nidmequin chido icsametsiash. Chido nidmiacsho bedquidtsen icsatsiash —quepondash Esus.

Abimbo chiacbimboen chienda, quequin Esusën chiaid

³³ Adshumbic Esusën padpiden chuipondash. —Naden Nuquin Papan ambi chiaid nuquin tsusedpa Moises dada uamepampic. “ ‘Nuquin Papa utsi uatiapimbo yacbimboen abimbo caïmbi,’ quequin chiaid niactemaïd nec. Niacsho Nuquin Papan cuidendac,” quequin Moisesën chuipampic.

³⁴⁻³⁶ Aidën chiacpadec muainquo ictiadquidi mimbi abimbo chiacbimboen utsi uain icsamboen chiec. “Abi cuëmëdquid cuënec muasho ëbi cuidtsiash. Nuquin Papa cuëmëdquid cuënenquo yec muasho Nuquin Papan ëbi cuidenquo ictsiash,” qeshun mimbi utsi chiec. “Abu utsi uatiapimbo yacbimboen ëmbi chiacpadomboen naimbi. Muainquo iquebi,” mibi quepec. Adecbidi: “Nidaid utsi uatiapimbo yacbimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiacbimboen chienda. “Nuquin Papa cuëmëdquid cuënenquo iccombi,” mibi quenubi abu abi tabadaïd icnuc ashunquo Nuquin Papan abitedi namendac. Nidaidic Nuquin Papan tincate nec. Edusaden yacnoshombic Nuquin Papan chomiaidën bëdamboen namendac yuecshun. ¿Min mapin icboda mibi nedi? Padenquo. ¿Mimbida min

mapi masedcamedi? Padenquoio. Aton Icbombien Nuquin Papan naique. Abimbo chiacbimboen icsamboen chienda.

³⁷ Adec muainquoio icquin abimbo chuita. “Ai, adembi naimbi,” quequin mimbi chiacpadomboen nata muainquoio icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidën Satanasën tantiamiacpadec mibi muapeque. Adenda —quepondash Esus.

Chieshë nec cuidnanenda, quiaid
(Duc 6.29-30)

³⁸ Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshënquin ëshë ansiac adecbidi cuidnanec ëshë ansenanquid. Chieshënquin sëcsiac adecbidi cuidnanec sëcsenanquid,” quequin chiaid icnuc

³⁹ utsitsen chuinu. Tantia. Mibi cuesquid cuidenda. Chieshënaqui cuidnanenquoio icquin adembi bëdamboen ista.

⁴⁰ Min matses: “Ëbi cuidquin mimbi ëbi meni-ambo iqueque. Min dashcute beccho,” qesho mimbi menenquoio icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bëdamboec tabadta.

⁴¹ Utsibic: “Nëbi nidtuidquin con na buanec nid,” quequin ancabudac nëbi nidtuidenquoio icquin udimbo buanshunta.

⁴² Aton na nibëdquid: “Mitsana beccho,” qesho meneta. Utsibic: “Mitsana buanshun

bëuaindami,” qesho: “Padi,” cainda. Meneta. Aden bēdamboen nata —quepondash Esus.

Chieshēnquidobi bēdamboen iste chiaid
(Duc 6.27-28, 32-36)

⁴³ Adshumbic abi macuësh dapa poctse tsadquin bēdamboec tabadte Esusēn chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshēnquido chieshēnta,” quequin chuipampic.

⁴⁴ Utsi mibi chuinu. Tantia. Mibi chieshēnquidobi bēdamboen isquin tantiatā. Chieshēnaqui: “Ēbi chieshēnquid bēdamboen ista, Papa,” quequin Nuquin Papa chianeta.

⁴⁵ Aden chianec Nuquin Papabimboec mibi ictsiac. Mibi utsibo bēdamboen nashunquid ictsiac. ¿Bēdambo icquido yacnoudida Nuquin Papan ushē chēncamepadic? Padenquio. Icsaido yacnotsen ushē chēncamec. ¿Bēdambo icquido yacnoudida ue chomepadic? Padenquio. Icsaido yacnotsen ue chomec. Bēdambo icquidobēdtabi icsambo icquido Nuquin Papan bēdamboen nashunec.

⁴⁶ ¿Mibēd tantiananquido min shubun icquidoudi mimbi bēdamboen nashunsho isunda Nuquin Papan mibi: “Bēdambo iquec,” capec? Padenquio. Mimbi icsambo iquec caidontsen ambi tantiaido nashuntsiash. Aidombien piucquid bedshumēnquido icquimbi aton shubun icquidoudi nashuntsiashe. Aden nainda. Utsibotsen bēdamboen nashunta.

⁴⁷ ¿Min shubun icquidobëduidida mibi onquec tabadpe? Nuquin Papa tantiesaboen adpec. Ütsibotsen bëdamboen ista.

⁴⁸ Nuquin Papabimboec icta. Bëdambo icquid icta. Bëdambo icquidobëdta icsambo icquidobi Nuquin Papan bëdamboen tantiacpadomboen utsi-botsen bëdamboen tantiata –quepondash Esus.

6

Ütsibo bëdamboen nashunte chiaid

¹ Adshumbic abi macuësh dapa poctse tsadquin Esusën chuipondash. –Nadquid icsambo iquec. Nuquin Papa tantienquo icquimbi aton matses ismenuuidi naic icsambo iquec. Adquid Nuquin Papan bëdamboen istiapimbo iqueque. “Ütsibo nashunu,” quequin utsibo ismenquo icquin nata.

² “Aton na nibëdqido menenu,” qeshun utsibo ismequin menenda. Ismenquo icquin meniac bëdambo ictsiash. “Nuquin Papa tantiaquid nebi,” quec muaquidën nacpaden nainda. Nuquin Papa tantiaquid damenuembien muaquidën matses dadpen yacnoshonuidi menedenepec. Adosho isun aton matsesënuidi bëdamboen isnubi Nuquin Papan bëdamboen istiapimbo iquec.

³ Aton na nibëdqido menequin utsibo ismenda. Meneshun: “Menebanombi,” quequin utsibo chienda.

⁴ Adsho isun mimbi utsibo ismenquo icquin naid tantiaquid icquin Nuquin Papan bëdamboen isquin abëdi mibi tabadmendac –quequin Esusën chuipondash.

Nuquin Papa chianete Esusën chiaid
(Duc 11.2-4)

⁵ Adshumbic Nuquin Papa chianetetsen Esusën chuipondash naden. —Bëdambo icquid damianquidën nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidtoshon comapenec onquequin Nuquin Papa chianepec. Adash umanuc pduenshun matses dadpen ismenuenuidi padpiden adembidi chianec. Adquid aton matsesën: “Bëdambo iquec,” canubi Nuquin Papan padenquio iquec. Bëdamboen istiapimbo iquendac.

⁶ Mibi adenda. Utsibo ismenuenuidi nainquio icquin matsesën isacmaidquio Nuquin Papambo tantiaquioquin chianeta. Aden chianequid mibi icsho Nuquin Papan mimbi utsibo ismenquio icquin naidtedi tantiaquid icquin mibi bëdamboen isquin abëdi tabadmendac.

⁷ Nuquin Papa chuiquin bëdamboen chianeta. Nuquin Papa tantiesabon ambi tantiaid chuibudac bimboen Nuquin Papa chuibudenda. “Yuenquio chuibudac nuqui tantiaboedën nuqui nashuntsiash. Padenquio icac nuqui nashunenquio ictsiash,” queshun Nuquin Papa tantiesabon yuen chuibudac bimboen nainda.

⁸ Adoenquio icquin Nuquin Papa chianeta. Mimbi chiabi: “Adopashuni. Aid nibëdnuc unësebi. Utsi icnuc bëdambo ictsiabi,” quequin mimbi otacquo tantiaid Nuquin Papan tantieque.

⁹ Naden Nuquin Papa chuita.

“Bëdamboshë icquid icsho matses abitedishunquio mibi tantiapashun, Papa.

¹⁰ Matses abitedishunquio mibi con Icho capashun. Mibi yacnoshon mimbi uaido

mayan bēdabon mimbi chiacpadom-
boenuidi naic.

Adomboembidi mimbi chiacpadomboen matses
abitedishunquo napashun.

11 Bumianenda, Papa. Badiadquidēn
badiadquidēnquen con pete icmeta.

12 Utsibon chieshēnaqui ēbi cuidnanenquo icsho
isun ēbi icsashobi cuidenquo icquin ēbi
bēdamboen ista, Papa.

13 Mimbi chiaid ēbi niacmenda, Papa.

‘Icsamenushe,’ queshun Satanas ēbi yuamenda,
Papa.

Abitedishun Icbombo yec abitedimbo
namequidquo mibi nec, Papa.

Ēmbi mibi chuisho tantiata, Papa.

Ēnenquo icquin abitedishunquo: ‘Bēdambo iquec,’
mibi capashun. Padi,”

quequin Nuquin Papa chianeta –quequin Esusēn
chuipondash.

14 Adashic nadpondash: –Utsibo bēdamboen
ista. Cuidnanec chieshēnanenda. Cuidnanec
chieshēnanenquo icsho isun Nuquin Papan mibi
cuidenquo icquin bēdamboen istsiash.

15 Cuidnanec chieshēnansho isun Nuquin Papan
mibi bēdamboen istiapimbo ictsiash –uequin Es-
usēn chuipondash.

Buna mēmunte chiaid

16 Adshumbic utsibo ismenquo icte utsi
Esusēn naden chuipondash. –Tantia. Nuquin
Papauidi tantianuequin buna mēmunquid
chuinu. Muaquidēn nachimboen ismenda.
Muaquido: “Buna mēmunquid nec,” aton matses

camenuec abibi maniumēdash nēnquidbitsēcquiec mamēnenquo iquec. Adec buna mēmunquid tanec muaic. Adsho isun matsesēn bēdambo icquid danubi Nuquin Papan: “Icsambo icquid nec,” qeshun bēdamboen istiapimbo iquec.

¹⁷ “Nuquin Papauidi tantiaquin nēidtedec ushquin buna mēmunu,” qeshun Nuquin Papambo tantiaquin nata. “Utsibon tantianushe,” qeshun bēdamboen min manēdaid shueshcata. Adash bēdamboec mamēnta. Aden utsibo ismenuenuidi nainda.

¹⁸ Aden bēdamboen manēdaid shueshcaid isun: “Buna mēmunec nec,” cainquo ictsiashe utsibon mibi chuiquin. Nuquin Papambien: “Ēbiuidtsēqui tantianuen naic,” quequin tantiatsiashe. Adshun mimbi utsibo ismenquo icquin naidtedi tantiaquid icquin abēdi mibi tabadmendac —quequin chuipondash Esusēn.

*Nuquin Papa yacno tabadte bunta, quiaid
(Duc 12.34)*

¹⁹ Adshumbic padpiden Esusēn chuipondash. — Ēmbi chuiboedquo tantiashun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesēn ampeshuntequid yec quec ic-sabudtequid nec. Adquiduidi tantienda.

²⁰ Icsabudesambo tantiata. Nuquin Papambo tantiec aidbēd tabadte bunquin ambi chiapadomboen nata. Chodquetiapimbo icquid yec shēnibudtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata.

²¹ Mibi bunaidquoio ënenquoio icquin tantiec mibi tabadtsiac. Nuquin Papabëd tabadte bunquin aid tantiata —quepondash Esus.

Pabiate shëcuë cuembo icquid chiaid

(Duc 11.34-36)

²² Adshumbic abi macuësh dapa poctse tsadquin utsitsen Esusën chuipondash. —Pabiate shëcuë cuembo icquin Nuquin Papa tantiaquiec mitsanauidi tantienquoio yec mibi bëdamboec tabadtsiac.

²³ Pabiate cuënëdacbimboec yec Nuquin Papa tantienquoio yec mitsanauidi tantiec ¿bëdamboecta tabadtsia? Padenquoio. Adec mibi icsamboec tabadtsiaque. Adenda —quequin chuipondash Esusën.

Bedteuidi tantienda, quiaid

(Duc 16.13)

²⁴ Adshumbic naden Esusën chuipondash. — Mitsanauidi tantiec mibi icsamboec tabadtsiac. ¿“Naic cho,” quequin daëdshun chiacta aid daëdi mimbi nashumpatsia? Padenquoio mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiacpadomboen mimbi natiapimbo ictsiaque. Mitsana bedteuidi tantienda. Nuquin Papauidtsëqui tantiata — quequin Esusën chuipondash.

Nuquin Papan abi tantiaquido dayun uaid

(Duc 12.22-31)

²⁵ Adshumbic Esusën padpiden chuipondash. — Ëmbi aden chuisho tantiasch dacuëndenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebëdta dasiuidte icmeque. “Con na nibëdtsiash,” quiash dacuëdec tabadenda.

²⁶ ¿Uicchunënda ambibi cuëte ëshë siac bacuëacsho chepadic? Padenquio. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchun abipadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuëndenda.

²⁷ ¿“Unëstiapimbo iquebi. Dacuëdebi,” quequidta unësenquio icpadic? Adequi dacuëdquid unëstiashe. Unësteuidi dacuëdënenda.

²⁸ “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëec bëdamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bëdamboshë isadpadic? Padenquio. Nuquin Papan uacpadquiobi iquec.

²⁹ ¿Cuëte bacuëec bëdamboshë isadquidbinboecta nuquin tsusedpa chuiquid dapa Sadomon cuëmëdquidën dashcute icpampic? Padenquio. Adpenquien icpampic.

³⁰ Cuëte bacuëec bëdamboshë isadboed abadiadtsëcshumbi isac ënden chodquiac. Aid badedquio chodquequid nec. Ad icnuc ¿abipadquid Nuquin Papan uaido mibi icsho mibi dasiuidte bedmen-

quioda icpadic? Padenquoio. Mibi dasiuidte icmeque. Dacuëdenda. Mitsana nibëdquoio icte dacuëdënquimbi mimbi Nuquin Papa bëdiactsëc tantiatseque.

³¹ Dacuëdec tabadenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëdenda.

³² Nuquin Papa tantiesaboen adquid bedteuidi bunquieque. Adenda. Mitsana nibëdsho isun Nuquin Papan mitsana icmetsiashe. Abi tantiakuido yec dacuëdec tabadenda.

³³ Adenquoio yec: “Con Icbo mibi nec, Papa,” quequin ambi tantiacpadec bëdamboec tabadte bunta. Adec tabadec: “Aid nibëdnuc unësebi,” quequin mimbi tantiaidtedi Nuquin Papan mitsana icmetsiashe.

³⁴ Èbi adsho tantiash badiad utsi caic: “Aid badiadën ¿atotsimbi nape?” quec dacuëdenda. Aid badiadën Nuquin Papan ambi tantiacpadomben mibi nametsiashe. Nëid ushëmbi: “Naden naimbi,” quequin tantiec tabadnuna dacuëdenquoio yec — quequin chuipondash Esusën.

7

Utsibo icsaid chienda, quiaid

(Duc 6.37-38, 41-42)

¹ Naden Esusën Nuquin Papan chiacpadec tabadte chuipondash. —Mibi icsaid ucudambobi utsibo icsaiduidi chienda. Adembidi Nuquin Papan: “Icsambo iquec,” mibi canushe.

² “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda.

3-4 ¿Abi bëtsiadaid bëchish nua bëuequid bëbedadabi icquidënda: “Mibi bëtsiadaque. Bëbednu,” capatsiash utsi chuiquin? Padenquio.

5 Abi bëtsiadaid abia bëbedadashien: “Mibitsen bëbednu,” quetsiash. Adembidi mimbia mibi icsaid ënshun: “Icsaid ënash bëdamboequien tabadtiad,” quequin utsibo bëdamboen chuita. Bëdambo icquid damianquidën abi icsaid ënabi: “Aid icsambo iquec,” quequin utsibo icsaid chuibanec. Adquid tanenda.

6 Mimbi bëdamboen chiaqui tantienquio icsho chuidonenda. Nuquin Papan chiaid chuibuadaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacbimboen mibi chïeshëntiashe. Chanchon icbon dashcute nebudshun bëchish uaqun tin-tincacbimboen Nuquin Papan chiaid niacniactsiashe. Adquid chuidonenda –quepondash Esus.

*Ënenquio icquin Nuquin Papa chianete chiaid
(Duc 11.9-13)*

7-8 Nadembidi Esusën chuipondash. –Nuquin Papa ënenquio icquin chuidoneta. Bacuëbon: “En na,” cadoniacbimboen chuidoniac Nuquin Papan mibi tantiatsiashe. Adembidi: “Ëbi bëdamboen name, Papa,” mimbi cacpadomboen bëdamboen mibi nametsiashe. Adembidi: “Ëbi nashunquin ëbi bëdambo icmeta, Papa,” quequin chuidoniac Nuquin Papan mibi bëdambo icmendac.

9 ¿Icsambo icquidta Nuquin Papa icpadic? Padenquio. Bëdambo icquidquio nec. Bacuëmpi: “Bundobique. Penu. Beccho, papa,” ¿queshoda

amën cudasënquin cuënotebi menepadic?
Padenquoio.

¹⁰ ¿Adembidi aton bacuën: “Nuëcquid chenu. Beccho, papa,” cacta cudasquin nisimbo menepadic?
Padenquoio.

¹¹ Matses yec icsaquido icquimbi min bacuëbo abimbo mimbi menenubien Nuquin Papan ambi uaido matses: “Ëbi nashunta, Papa,” quesho tantiahsun bëdamboen nashuntsiashe. Nuquin Papa chianeta.

(Duc 6.31)

¹² Nuquin Papan tantiaido icquin utsibo bëdamboen isquin bëdamboen nashunta. Utsibo caic: “Aidon nashumpashuni,” quequin mimbi otacquoio tantiacpadomboebidi utsibotsen nashunta. Aden Nuquin Papan chiaid Moisesbëdtan nuquin tsusedpabo utsibon dada uaquin chiampicpadomboen mimbi natsiaque. Aden utsibo nashunta –quequin chuipondash Esusën.

Daëdpactsëcshun Esus tantiabente chiaid

(Duc 13.24)

¹³⁻¹⁴ Adshumbic Esusën naden chuipondash. — Nuquin Papabëd tabadnuec aid tantiec bëdamboec tabadta. Shëcuë aniambo icquidën matses abentse-abentsec puduedac bimboec abentse-abentsec Nuquin Papa yacno puduednuec aid tantiec bëdamboec tabadec. Padnuen antied dapan abi maisi nidac bimboec matses dadpenquoio abi tantiesabo yec Nuquin Papan icsaïdo nësecacno nidendac —quepondash Esus.

*Icsambo icquid nec, quequin tantiante chiaid
(Duc 6.43-44)*

¹⁵ Abi macuësh dapa poctse tsadquin naden Esusën chuipondash. —Utsibo: “Nuquin Papan chiaidquio chuiquid nebi,” quec bēdambo icquid damianquid iquendac. Adquid choshon Nuquin Papan chiaid niac-niacmequin icsamen-dac. Bēdi dapa nēish yua pete bunquiacbimboec mibi icsamete bunquieque. Adquidēn chuisho tantienda.

¹⁶ “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquio chienquio icsho tantiashun: “Ūtsi uain chiec,” mimbi catsiac. Chetequid isun cuēte dada matsesën tantiec. Aden tantiec nisanquidēn bacuē bēsho isash: “Dadainēn bacuē nec,” quesa matses nec. Adecbidi echo bacuē bēsho isash: “Bata nec,” quesa matses neoaic.

¹⁷ Cuēte bēdan bacuē adquiobidi bacuēc. Cuēte icsan bacuē adquiobidi bacuēoaic.

¹⁸ ¿Cuēte bēdan bacuē chetemaidta nepec? Padenquio. ¿Cuēte icsan bacuē chetequidta icpec? Padenquio.

¹⁹⁻²⁰ Chetemaidbimboec muaquid bēdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquio chienquio icsho: “Muaquid nec,” quequimbidi mimbi tantiatsiaque. Adquidēn chuisho tantienda. Cuēte bacuēesa dēdshun nēdēncabimboen: “Nuquin Papan chiaid chiembi,” quec muaquid Nuquin

Papan icsaido cuidacno nësecaindac —quepondash Esus.

*Nuquin Papa yacno puduednu, queuidte chiaid
(Duc 13.25-27)*

²¹ Utsitsen Esusën chuipondash. —Ëbi caic: “Con Icho mibi nec. Mibi tantiembique. Mibi yacno ëbi puduedme,” ¿quequidtedida Nuquin Papa yacno puduedpatsiash? Padenquo. Nuquin Papan chiacpadomboen naquidquien abi yacno puduedtsiash.

²² Nuquin Papa yacno ëmbi yuedte ushën matses dadpenshun ëbi chuiuidendac. “Con Icho mibi nec. Mibi caic: ‘Aidën namiaidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,”

²³ qesho ëbimbo tantiec Nuquin Papan chiacpadec bëdamboec tabadabi icscho: “Ëmbi tantiacmaidquo mibi neque. Baded cuenta. Icsamboec tabadquid mibi neque,” caindambi. Ëbi adsho tantiash muainquo yec bëdamboec tabadta —quepondash Esus.

*Shubu uaquidbimboecquid chiaid
(Duc 6.47-49)*

²⁴ Adshumbic Esusën padpiden chuipondash naden chuiquin. —Ëmbi chiacpadomboen nata. Aden mimbi bëdamboen natsiaque. Shubu uaquin bëdamboen tantiaquidbimboec mibi ictsiaque. Tantia. Chuinu. Bëdamboen tantiaquidën mananënquo shubu uaquin buintad nitsinquad.

²⁵ Aden shubu uan ue dapa conquequidbēdi chonoc shubu chimeshadenquoio icquid. Shubu nuntan anchiuidenquoio icquid.

²⁶ Aden ěmbi chiacpadomboen naquid icnubi utsibo ěbi tantiesa iquendac. Aido shubu uaquin tantienquoio icquidbimboec iquec. Tantienuoio icquidĕn nadoquid. Acte cuidi cuĕmanquiobi shubu uaquin badedi unĕstsĕcquidquoio cuate nitsinquid.

²⁷ Adquid nitsinaid ue dapabĕd conquequid choquin shubu chimeshquid. Adecbīdi acte cubudtoquidĕn shubu nuntan mauanquid. Aden tantesa uatsĕcquidbimboec ěbi tantiesa iquec. Adquid Nuquin Papan cuidtequido neque. Ēbi tantiata –quequin chuipondash Esusĕn.

(Mad 1.22)

²⁸⁻²⁹ Adsho tantiash: –Ma comapenen tantiaquidquoio Esus neyoc. Nuquin matses tsusiobon Moisesĕn chiampid bĕdiactsĕc tantiatsĕcquin chuitsĕccosh. Padnuen Esusĕnquoio comapenen tantiaquin chuiposh –quecuededpondash matses dadpenquoio.

8

*Esusĕn daicsaid bĕdamiaid
(Mad 1.40-45; Duc 5.12-16)*

¹ Ambobi macuĕsh poctse tsadquin ĕnquin chui-tanequien Esus macuĕsh budpondash. Adec budanec nidsho isumbien matses dadpenhun tsi-banampondash.

² Adnubien dada ushumbo yec daicsaidquoio choshon Esus ismenuen danĕshĕn sebudpondash.

—Ëbi bēdamete bunquin mimbi ëbi bēdametsiaque.
Ëbi bēdame, Icbo —caquien Esus:

³—Ai, mibi bēdamete bunebi. Mibi bēdanendac —
quequin mishtemaidquiobi mishnubi badedquio
bēdampondash daicsaid nibēdquiec.

⁴ Adsho Esusën: —Utsibo chienquio yec nëish
yua abided unēs uaquido ismenuec nidta. Mibi
isash: “Bēdamiaid nec,” quequin ma aidon tan-
tianu. Moisesën chuipampicpadomboen nanuen:
“Nuquin Papan bēdamioshi,” quequin Nuquin Papa
menetequid buanquin ismec nidta —quequin Ès-
usën chuipondash. Adtanec shubu dadpen icquid
Capednaun caid yacno chopondash Esus.

*Sondado chuiquid dapan yua Esusën bēdamiaid
(Duc 7.1-10)*

⁵ Capednaun yacno choash Esus tabadpon-
dash. Adnubien Doma yacnoquido sondado
100ted chuiquid dapan Esus chuituidpondash.

⁶—Tantia. Chuinu, Icbo. Con shubun icquid
con yua shēquēquenquio iccosh. Natiambo yec
unēstiadtsēcquio iccoshe. Bēdameta

⁷—quesho tantiashun: —Ai, bēdamec nidnu. Nid
—caquien:

⁸—Padi. Mibi bēdamboshē icquidquio nec. Ëbibi
icsactsēcquid icquin mibi con shubun pudued-
metiapimbo iquebique. Nēshunquiobi bēdameta.
Nidenquio icquin nēshunquiobi mimbi: “Bēdanta,”
cac con yua bēdantsiashe. Mimbi tantiacpado-
boen namequidquio mibi nec.

⁹ Ëbibi chuiquid dapan namiac sondado ut-
sibo namequid nebi. Ëmbi: “Nid,” cac badedi
nidec. Ëmbi: “Baded cho,” cac badedquio choec.

Con yuan ëmbi: “Nata,” cac ëmbi chiacpadomboen naic. Mibi adquidquibidi neque. Con yua bëdameta —quepondash sondado chuiquid dapa.

¹⁰ Adsho tantiashun Esusën abi tsibambëquido chuipondash. —Bëdamboen nëidën chuipec. “Comapenen tantiaquin chuiquinuidi con yua bëdametsiash,” quequin ëbi bëdamboen tantiaquid nec. Isadaidbo adquid nibëdec. Isadaidbon ëbi bëdiactsëc tantiabededtsec.

¹¹ Tantia. Chuinu. Matses utsi icquimbi sondado chuiquid dapan ëbi bëdamboen tantiec. Adec nidaid utsi-utsiec yacnocquido isadaidpembo ëbi tantiaquido yanash Nuquin Papa yacno puduedendac. Ambo puduedash isadaidbo tsusedpabobëd tabadendac. Abadauan caid yec Acobo caid yec Isac caid yec quequidobëd tabadendac.

¹² Padnuen Nuquin Papan con matses caido isadaidbo dadpenquio Nuquin Papa yacno puduedenquio iquendac. Abi tantiesabo icsho Nuquin Papan cacumequin icsaido nësecacno mibi nidmendac. Adoac mibi tënquebudquiendac —quequin abi tsibambëquido isadaidbo chuipondash Esusën.

¹³ Adshumbic sondado chuiquid dapa chuiquin: —Nidec nid. Mimbi tantiacpadece min yua bëdaneque —cac nidshun isquien bëdanac Esusën chuibocpadequi.

*Petedon nachi Esusën bëdamiaid
(Mad 1.29-31; Duc 4.38-39)*

¹⁴ Adash yuec-yuecpactsëc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec.

15 Uesho istuidshun mëdinquin Esusën bédamepondash. Aden bédamiac Esus pemepondash.

*Esusën matses dadpen bédamiaid
(Mad 1.32-34; Duc 4.40-41)*

16 Petedon nachi bédamiaid inchëshbudtsëqui Esus ismenuequin matses daicsaido dadpen bē-bēpondash. Bē-bëshobien podobitsi icsa dapuduedaido comapenec cuëdquin cuemeshumbic daicsaidotsen Esusën bédamebampondash.

17 “Nuqui icsaid ucquin nuqui daicsaidobi bédamiac,” quequin ëndenquo Nuquin Papan Esusën nate Isayas dada uamepampicpadomboen nanuen adopondash Esusën.

*Abëd icte bunquido Esusën chiaid
(Duc 9.57-62)*

18 Adashic abi isnuec matses dadpenquo dat-sidadsho isash abëd icquido chiec: —Chian potec nidnu. Nid —quianec chian yacno nidec puduampondash Esus.

19 Pudianec nidaneshobien Moisesën dada uampid chuibanquidën Esus chinuntuidpondash. —Con Ico mibi caindambi. Mibëd nidendabi —caquien:

20 —¿Ëbëdta nide? Tantia. Mibi chuinu. Bëdi chëshë shëcuën ushquid. Uicchun shubu uash abuc ushquid. Padnueni con shubu nibëdnuc Nuquin Papan matsesmiaid yec quenenenquo yec capucuenendac. ¿Ada mibi adpatsia? —capondash Esusën Moisesën chiampid chuibanquid chuiquin.

21 Adnubien abëd capuceneboed utsin: — Chiata, Icbo. Con pa unësoshe. Chococatambono —caquien:

22 —Padi. Cho. Ma unësaidën tantienquo yacimboen ëbi tantienquo icquidon ma papa chococanu. Ëbëdtan bëdamboen naic cho —capondash Esusën amë unësaid chuiquin. Adobidanec nidanepondash chian yacno.

*Natiambo cunquenuc acte tēcguasquiaid Esusën
ënëdmiaid
(Mad 4.35-41; Duc 8.22-25)*

23 Chian budash Esus chedo cano antabëdtopondash. Adashic potenuc puduampondash.

24 Aden potenubi nënantanquo icnuc cunquetuidpondash. Adnubien acte comapenec tēcguasquiampondash. Adec acte tēcguasquenuc cano acte ancushad-ancushadquiec yampondash cano mentoadtiadtsēcquo yec. Adsho isun abëd icquidon: —Dacuëdampambo iquec —quetanquin isquien Esus ushpec.

25 Adshobien tinquin: —Nuqui mentoadeque. Isucun, Icbo. Baded ëbi nashun —caquien:

26 —¿Atotsi quiash dacuëde? Ëbi bëdiactsēc tantiatsec dacuëdquidquo mibi neque. Istac —quetanec nidtoshon actebëdtabi cunquequid chuipondash. —Padi. Ënëdta —caquien natiambo cunqueboedi badedquo ënëdpondash cano mentoadtsenquionobi. Actetsen tēcguasquenquo yampondash.

27 Adsho isashien: —¿Mitsipadquidënquoio actebëdta cunquequid ënëdmepashba? — quecuededpondash Esusbëd icquido.

Dada daëd dapuduedaido podobitsi icsabo Esusën cuemiaid
(Mad 5.1-20; Duc 8.26-39)

28 Aden chian potiash pudundonobien Cadada yacnocquid podobitsi icsa dadpen dapuduedaid dada daëd choshon Esus chuituidpondash. Aid daëd unësaido chococaid shëcuëmbi tabadpondash. Matses cuesunete bunquiecdacuëdampambo icsho isash aid yacno matses nidenquoio icpondash.

29 Aidon podobitsi icsabon oncamiacpadomboen comapenec cuëdquin Esus chuituidpondash. —¿Nuquin Papa caidën Madombo icquin ëbi natiamequin cuidnuecta cho? ¿Nuquin Papan cuidte ushë choabi icnubida ëbi cuide? — capondash dada daëdshun abi oncamequidën chiaid chuiquin.

30 Uano chancho dadpeshun natiacquin udquin pebededpondash.

31 Adnubien podobitsi icsabon aid dada daëd oncameoac: —Ëbitedi cuemiac chancho icbo-icboec dapuduedtsiabi —quecuededpondash podobitsi icsabo.

32 Adsho tantiashun Esusën: —Ai, mimbi tantiacpadec nid —cac nidash chancho icbo-icboec dapuduednubi chancho abitedi macuësh budec acte nësebudec mentoadbudnepondash nibëdquiecyec. Adec podobitsi icsabo dapuduenanec nidnubi dada daëd bëdambo yampondash.

³³ Adsho istanequien chanco pemequido aton matses chiec niqianec shubu dadpen yacno nidanepondash. Chanco mentoadbud-neboedbēdta podobitsi icsabo dapuduemeboed uesquin chuituidpac caondash. —Nuqui dacuēdēmboedobi bēdambo yanosh —quequin

³⁴ chuituidaquien anocquido abitedi Esus isec cho-chopondash. Adec cho-choshombien: —Dacuēdampambo mibi iqueque. Ēbi yacno choenda. Nidec nid —cabededpondash. Adoac Esus nidpondash.

9

Shēquēquenquo icquid Esusēn bēdamiaid (*Mad 2.1-12; Duc 5.17-26*)

¹ —Nid —cac nidanec chian budash cano antabēdtoshon chian potiash abi iccondacnobidi Esus choapondash.

² Adnubien utsibon dada shēquēquenquo icquid Esus ismēnuen aton uetechobi bēpondash. Bēsho isumbien Esusēn: —Ēbi caic: “Aidēn bēdametsiash,” qeshun bēac —quequin daicsaid chuipondash naden. —Dacuēdenda, madosio. Ambi chiaid niacniaquec icsaboedi cuidmenquo icquin Nuquin Papa mibi bēdamboen ismembique —capondash Esusēn.

³ Adsho tantiash aid datsidadash tabadquido Moisesēn dada uampid chuibanquido: —¿Adpecta matses icquid? “Nuquin Papapadquidquiobini nec,” quepequien iquec. Icsamboen chiec —quecuededpac caondash Esus caic.

⁴ Uanuësh adsho ambembi tantiashumbien Esusën aido chuipondash. —¿Atotsi quequin mimbi ëbi chieshëmpe?

⁵ Ambi namiaid icquin ëmbi: “Nuquin Papa cuidmenquio icquin mibi bëdamboen ismemb” cac Nuquin Papan nëid cuidenquio iquendac. Adem-bidi ambi namiaid icquin ëmbi: “Caputa,” cac nëid capuendac.

⁶ Istac. Mibi ismembique. “ ‘Nuquin Papan chomiaid nec. Icsaidobi Nuquin Papa bëdamboen ismequid nec,’ mabi canu,” queshun naimbique. Istac —quetanquin dada shëquëquenquio icquid chuiquin: —Caputa —capondash Esusën.

⁷ Adoac bëdanash aton shubuno nidpondash.

⁸ Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bëdambo iquec —quecuededpondash isquido.

*Ëbëd iquec cho, quequin Esusën Mateyo chiaid
(Mad 2.13-17; Duc 5.27-32)*

⁹ Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na ëmbi chiactedi piucquid bedshun ëbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec

¹⁰ nidequi con shubun Esusbëd puduedpondabi.

Adec puduedsho isashien matses dadpen pudued-puduedpondash. Esusbëd pec tabadnuec ëbëdtan piucquid bedshunquidobëdi con

matsesën: “Icsaido nec,” caidombo pudued-puduedpondash.

¹¹ Adsho isumbien Esus chieshënquido Padiseyobo caidon Esusbëd icquido chuituidpondash. —¿Atotsi quiash mibi chuiquid Esus caid icsaquidobëdi pec tabadpec? Icsambo iquec — capondash Esus chieshënquidon.

¹² Adsho tantiash Esus nadpondash. —¿Bëdambo icquidta dauëchoquidën dauë menepadic? Padenquio. Ma daicsaidi dauëchoquidën menepaid yoc. Adembidi icsaidobi abi icsaid ucquin bëdambo icmenuec nebi.

¹³ Nuquin Papan naden dada uamiampid pausudshun bëdamboen naic nid. “Ëmbi chiacpadomboen abentse-abentsen mimbi naic. Adoquimbi ëmbi chiaid utsi niaquec mimbi icsaido caido mimbi bëdamboen istiapimbo iquec. Adsho isun: ‘Mibi bëdambo iquec,’ catiapimbo iquebi” quequin Nuquin Papan dada uamiampid pausudta. Ëbibi matses bëdamboen ismequid nebi. Muaquido: “Bëdambo icquid nebi,” qesho bëdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” qesho: “Icsainquio yec ënëdta,” canuec nebi —quepondash Esus abi chieshënquido chiec.

*Esusën buna mëmunquido chiaid
(Mad 2.18-22; Duc 5.33-39)*

¹⁴ Adnubien Uan acten mentoanquidbëd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquio nebi. Padiseyobo

adembidi naquidquio nec. ¿Atotsieshun mibëd icquidon aden nainquio icpec? ¿Natiapimboda iquec? —caquien

¹⁵ Esus nadpondash. —¿Icbon: “Pec cho,” cacta aid tantiec sedenquecuededquin buna mëmumpadic? Padenquio. Adquidbëdtan pec cuishonquec tabadquid. Icbo nibëdanan sedenquecuededquin buna mëmunquid. Èbi nibëdanan ëbëd icquidon ëbiuidi tantianuen buna mëmunendac —quepondash Esus.

¹⁶ Adshumbic Esusën naden chuipondash. —Dashcute chuca cuëshun dashcute shëni nedesquiaidbëdta tuscaisa. Aden tuscashun panac shëni badedquio nedesquequid.

¹⁷ —¿“Machi sandono,” qeshun tsitsan shënimbida sandopadic? Padenquio. “Machi sebudnushe,” qeshun tsitsan shënin sandoenquio icquid. Tsitsan chuca daëdcashumbien machi sandoquid —quepondash Esus. — Adembidi tsusedpabon: “Naden nata,” quequin chiaid chienquio icquin ambi bëdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbëd icquido chiec.

*Champi uincuemiaidbëdta chido bëdamiaid
(Mad 5.21-43; Duc 8.40-56)*

¹⁸ Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unëstiadtsëcquio iccoshe. Mishec cho. Mimbi mishac bëdantsiashe —capondash. —Mibi con Icbo canu —quequin danëshën sebudquin ismepondash.

19 Adoaquien Esus aidbëdi nidpondash.

20-21 Nidnubien chido intac budted-budtedec seta 12tedi matamec bëdanenquoio yec nacchoadbudquidën Esusën cachoctsëqui choquin: —Bëdamianquidën dashcute mishec bëdampatsiash icmanendac —queshun ismenquoio icquin dashcute cuëmano mishtsac caondash.

22 Adoaquien bidiadquin isun Esusën chuipondash. —Dacuëndenda. Mibi: “Aidën nac bëdantsiabi,” quiacpadec mibi bëdanendac —Esus quenubi bëdampondash.

23 Aid bëdamebidanec nidequi chuibante shubun tabadsho isquidën shubun puduedshun isquien matses dadpen tabadec. Champi unësacsho isash sedenquecuededec tabadec. Nëidic matses unësan con matsesën nacpadomboen shoncate shoncaquido. Nëidic comapenec sedenquecuededquido dadpen. Aidtedi icpondash.

24 Adshobien Esusën abitedi chuiquin: —Baded umanuc niecun. Champi unësabi iqueque —capondash. Adoac: —“Champi unësabi iquec,” quepequien iquec —queshun Esus mamëns shumbededpondash.

25 Niecunan Esusën champi uiacno quënën puduedtanquin mëdinac champi uincuenash bëdambo yec capupondash.

26 Adsho isun champi unësaid uincuemaiid chuibenepac caondash shubu utsin-utsinquien. Anocquido Capednaun caid yacno pauequidote-dishun tantianuc chuibeniad caondash.

*Bëshuaid daëd Esusën bëdamiaid
(Duc 18.35-43)*

²⁷ Auëshquio puduanec nidshobien bëshuaid daëdshun chinunshun comapenec cuëdquin Esus chuituidpondash. —Dabidën tsyuecquid Nuquin Papan chomiaid icquin bëdamboen isquin ëbi bëdame —quebud-quebudpondash.

²⁸ Shubu utsin puduedash abëdi tabadshobien Esusën: —“Ëbi bëdametsiash,” ¿caindabi ique? —caquien: —Ai, adebi —quepondash.

²⁹ Adshobien aid daëdi bëmishquin: —Mimbi tantiacpadec bëdanta —cac

³⁰ bëdampondash. Adsho isun Esusën: —“Bëdamioshi,” quequin utsibo chienda —capondash.

³¹ Adoboqui anocquidotedi chuiben-chuibempac caondash.

Esusën onquesa bëdamiaid

³² Bëshuaid bëdamiaid pduenubien podobitsi icsa dapuduedaid onquesa dada Esus ismenuen bëpondash.

³³ Bëacsho isun Esusën podobitsi icsa dapuduemiac bëdanash onquiampondash. Aden bëdamesho isash: —Nuquin nidaid Isadaid caidënsnun adoen ictenec —quecuededpondash isquido.

³⁴ Adnubien Esus chieshënquido Padiseyobo: —Podobitsi icsan icbon namiaid icquin podobitsi icsa cuemequidien nechitec —quecuededpondash Esus caic.

Esusën matses tantiaquiaid

³⁵ Aden onquesa bëdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun

puuedshun Nuquin Papan matses icsaido bēdamboen iste chuipondash. Adshumbic anocquido daicsaidotedi bēdamebampondash. Adenuidi shubu dadpen yacno-yacnomboen chuibanquimbi matses bēdamebampondash.

³⁶ Abi tantienquo icquido dadpen cho-chosho isash unēsquo icnuc shubiantiadquo icpondash Esus. —Abi isquid nibēdnuc bacuēbo icsamboec tabadacimboec icsambo iquec. Nuquin Papa bēdamboen ismete chiabi yac tantienquo yec natia chieshēmēnec bēdamboec tabadiapimbo iquec — quiash shubiantiadquo icpondash Esus.

³⁷ Adshumbic abēd icquido chuipondash. —Pete dadpen nitsinaid caniacsho bedtanenquo icnuc sinash chodquebudnequid. Adecbidi Nuquin Papan chiaid chuibanquid nibēdnuc matses icsamboec tabadec. Aden chuibanquid nuquipadquid daēdpactsēcquo iqueque.

³⁸ Nuquin Papa chianeta. “Matses dadpenshunquo mimbi bēdamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusēn abēd icquido chuiquin.

10

*Esusbēd icquido 12tedi chiaid
(Mad 3.13-19; Duc 6.12-16)*

¹ Adshumbic Esusēn abēd icquido 12tedi chuipondash. —Ēmbi naid chuibeneta. Ēmbi namiaid icquin ėmbi nabocpadomboen podobitsi icsa matses dapuedaid mimbi cuemendac.

Adembidi daicsaido abitedi mimbi bēdamendac —quequin chuipondashi nēidtedi.

² Nēidic Petedo caidbidi Simon cuēmēdquid. Nēidic abēdta tishaid Andedes cuēmēdquid. Nēidic Sebedeyon mado abi daēdi. Abentsēc Acobo icnuc utsi Uan icpondash.

³ Nēidic Uedipe. Nēidic Badtodome cuēmēdquid. Nēidic Tomas. Nēidic ēbibi Mateyo con matses piucquid bedshundenedi. Nēidic Acobo cuēmēdquid utsi Adpeon mado. Nēidic Debeyo caidbidi Tadeyo cuēmēdquid.

⁴ Nēidic Simon cuēmēdquid utsi con matses yuaquido cuemete bunquid. Nēidic Iscadiote caidbidi Udas cuēmēdquid abi chieshēnquido Esus bedmequid. Aidtedi abēd icquido icsho chuipondashi.

*Abēd icquido: Chuibeneta, caid
(Mad 6.7-13; Duc 9.1-6)*

⁵ Adshumbic: —Ēmbi chiacpadomboen chuibenenuec nidshun isadaidpembo chienda. Aido yacno nidenda. Nidaid cuēshē Samadia caid yacnocquidon shubu datambidanta.

⁶ Nuquin matses isadaidboudi chuibeneta. Bēnudshun podqued tantienquio yacbimboen nuquin matsesēn Nuquin Papambo tantienquio iqueque.

⁷ “Mibi icsaid ēnash bēdamboec tabadta. Nēbi abēd tabadtequido icmequin Nuquin Papan matses bēdamboen tabadmendac,” quequin chuibeneta.

⁸ Adembidi daicsaido bēdamequinc unēsaido uincuemequinc dada ushumbo yec daicsaido bēdamequinc podobitsi icsa dapuduedaido

cuemeshunquinc cabeneta. Adoshon: “Piucquid beccho,” cainda. Ĕmbi nabocpadomboembidi mibi namembique. “Piucquid beccho,” quequin nainquio iccombique. Adembidi nashumbanta.

⁹ Aden chuibenec nidquin min piucquid buanenda.

¹⁰ Adembidi pete sandoaid buanenda. Dashcute utsibēdta tapucudte utsi sandoshon buanenda. Mibi tidinquete cueste abentsēqui buanta. Adec mēdadauidquio chosho isun mimbi bēdamiidon: “Mibi bēdambo iquec. Ĕbi yacno ushec cho,” mibi cac bēdambo ictsias. Adembidi: “Mitsana nibēdsho isun mibi menenu,” mibi cac bēdambo ictsias.

¹¹ Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantias aidēn shubun ushta. Auēshquio nidabi yec aidēn shubunuidi ushta.

¹² Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista.

¹³ Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo icmendac. Anocquidon mibi chieshēsho Nuquin Papan aido bēdamboen istiapimbo iquec.

¹⁴ Shubu dadpen icquid utsi yacno mibi nidacsho anocquidon cuemiāc naden ismeta. Auēshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Ic-saidombo mibi nec,” quequin ismec nidaid putu

tasequeta.

¹⁵ Mimbi adosho isun matses cuidte ushëmbi Nuquin Papan aido comapenen cuidendac. Ëndenquimbo shubu dadpen yacnocquidotedi cuidquin Nuquin Papan uesquin unës uapampic. Aid shubu dadpen icquid abentsëc Sodoma canubi shubu dadpen icquid utsi Comoda capampic. Aid daëd yacnocquido bëdiactsëc cuidshun mimbi chiaid tantienquo icquido comapenen cuidendac –quepondash Esus abëd icquido chiec.

Esus tantiaquido chieshënte chiaid

¹⁶ Adashic padpiden chuioaic: –Ëmbi naid chuibenequido icsho utsin-utsinquien mibi chieshënendac. Bëdi nëish yua acte bunacbimboec chieshëmënuquido mibi cueste bunendac. Aidobëd chieshënanenda. “¿Mitsipadomboen chiac Nuquin Papan chiaid tantiabempatsiash?” qeshun bëdamboen tantiaquin bëdamboen chuita.

¹⁷ Mibi chieshënquin cuesunetiadquo iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquo mibi cueshcaten cueshcaindac.

¹⁸ Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ëbi chuiquidon chuiquid dapabëdta isadaidpembo ëmbi naid chuibanu,” ëbi quenuc mibi aden buanendac.

¹⁹ Adoac dacuëdenda. “Chuiquid dapa yacnoshon ¿atotsimbi chuiPATSIABA? ¿Adambi

bëdamboen chuipatsiaba?” quec dacuëndenda. Chuiquid dapa mimbi bëisnubi Nuquin Papan ambi tantiacpadomboen mibi oncamendac.

²⁰ Aden aton Mayanën ambi tantiacpadomboen mibi oncamendac –quepondash Esus.

²¹ Adashic padpidec onquec: –Ëbi chieshënquidon ëbi tantiaquidotsen comapenen chieshënendac. “Esus tantiaquid nec,” qeshun aton buchimbi aton utsi cuesunemendac. Amëmbi ambi tishmiaid cuesunemendac. Aton bacuëbombi chieshtoshon anibëdta amë cuesunemendac.

²² “Esus tantiaquid nec,” qeshun matses dadpeshun aden chieshënaqui chieshtoenquio icquin ëbi tantiasho Nuquin Papan abi yacno mibi puduedmendac.

²³ Shubu dadpen yacno nidacsho chieshënac shubu dadpen icquid utsi yacno cuenta. Anoshontsen ëmbi naid chuisho chieshënoac shubu dadpen icquid utsi yacnotsen cuenoata. Adecuidi cuendeneta. Nëid nidaid Isadaid caidën shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuësh choaindabi.

²⁴ Mibi tantiamequid nebi. Ëmbi tantiamiaido icsho ëbi icbocpadomboembidi mibi chieshënendac. Abi chuiquid dapa chieshënacpadembidi ambi namiaidotsen chieshënquid. Icho chieshënquimbi yuabotsen chieshënquid.

²⁵ Adembidi ëmbi chiacpadomboen natiadquio icsho mibitsen chieshënendac. Nuquin Papa yacno puduedmianquid icsho: “Ma podobitsi icsan icbo

Betsibu caid neyoc,” ¿cainquiodabi ictiosh? Adem-bidi mibi Nuquin Papa yacno puduedtequido icsho mibitsen chieshënendac —quequin chuipondash Esusën abëd icquido chuiquin.

*Dacuëdenquio icquin chui, quequin chiaid
(Duc 12.2-7)*

²⁶ Adshumbic padpiden chuiquin: —Mibi chieshënquido dacuëdënenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsëcquin chiaid Nuquin Papan utsibo tantiamendac. Adembidi mimbi bëdamboen naidtedi Nuquin Papan utsibo tantiamendac.

²⁷ Nëbi ëmbi mibitedictsëqui chuiboed dacuëdenquio icquin utsibo chuibeneta.

²⁸ Chuibenesho min dadauidtsëqui cuesunetequid dacuëdënenda. Min tantiate unëstiapimbo icquid icsho nibëdametiapimbo iquec. Min dada unësan min tantiate abi icsho cuidnuequin chian anëdënquequid nësecanquid tantiaata. Adquid Nuquin Papa icsho dacuëdënta.

²⁹ Utsibon chieshënaqui dacuëdenda. Nuquin Papan mibi tantieque. ¿Padichucu cuesaid isashta unësquio icti? Padenquio. Padnuen ambi tantiacpadomboembi padichucu dadpen icquid abentsëc cuesac paëdsho Nuquin Papan tantiec.

³⁰ Adembidi min manëdaid Nuquin Papan tambanaidquio nec. Aden min manëdaid abentsëc paëdsho aidën tantiec.

³¹ Aden min manëdaid tambanquid icquin padichucu bëdiactsëc tantiatsëcquin mibien

comapenen tantieque. Mibi chieshënquido dacuëdënenda —quequin chuipondashi Esusën.

Esus con Icbo nec, quequido chiaid
(Duc 12.8-9)

³² Adshumbic padpiden chuiquin: —Utsibo chuiquin: “Con Icbo Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi.

³³ Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Ëbi tantiaquidpenquio neque. Puduedmenda,” quequin Nuquin Papa chiendambi —quequin Esusën chuipondashi.

Esus tantiaquidobëdi cuëshëdte chiaid
(Duc 12.51-53; 14.26-27)

³⁴ Adshumbic padpiden chuiquin: — Ëmbi chuiboed tantiashun: “Nuquin Papa yacnuësh choquid icquin abitedimbo bëdamboen tabadmetsiash,” ¿caquindabi ique? Padenquio ictsiambi. Ëbi tantiaquidobëd ëbi tantiesabo cuëshëdenquio icte danenda. Ëbi tantiaquidobëdi ëbi tantiesabo cuëshëdendac.

³⁵ Amëbëd aton mado cuëshëdendac. Adecbidi anibëd aton champi cuëshëdendac. Adecbidi aton chayabëd aton babanën cuëshëdendac.

³⁶ Aden aton shubun icquidombi ëbi tantiaquid chieshënendac.

³⁷ Padnubic aton matsesuidi tantiaquidën ëbi bëdiactsëc tantiatsëctsiash. Aton tita tantiaquinc aton papa tantiaquinc cain aidën chiacpadomboenuidtsëqui naquidën ëbi bëdiactsëc tantiatsëcquin ëmbi chiacpadomboen natiapimbo ictsiash. Adembidi aton mado tantiaquinc aton champi tantiaquinc cain aid bëdambo icmeteuidtsëqui bunquin ëbi bëdiactsëc tantiatsëcquin ëmbi chiacpadomboen natiapimbo ictsiash. Adquido bëdamboen istiapimbo iquebi. Ëbi tantiesabo nec.

³⁸ Utsibon chieshënaç ëbi tantiatsëchoedi badedi chieshtoshon ëmbi chiacpadomboen natiapimbo yantsiash. Adquidotsen ëbi tantiaquidpenquo iquendac.

³⁹ Matses ambi naiduidi naquid Nuquin Papa yacno puduedtiapimbo iquendac. Padnuen ëbi tantiaquin ëmbi chiacpadomboen naquid Nuquin Papa yacno puduedendac. Adquid chieshënaqui chieshtoenquo ictsiash –quequin Esusën chuipondashi.

Nuquin Papan bëdambo icmete chiaid

(Mad 9.41)

⁴⁰ Adshumbic Esusën ëbi chedo padpiden chuipondash. –Mibi chieshënquido icnubi mibi bëdamboen isquid iquendac. Ëmbi naid mimbi chuisho tantiash: “Ai, abimbo caic,” qeshun ëbi tantiabenquin ëbi chomequidtsen tantiabenendac.

⁴¹ “Naden naindambi,” quequin ambi chiaid chuibenequid Nuquin Papan bëdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque.

Bëdamboen chuisho tantianu,” quequid icsho Nuquin Papan bëdamboen isendac. Adembidi abi tantiec ambi chiacpadec bëdamboec tabadquid Nuquin Papan bëdamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” queshun bëdamboen isquidotsen Nuquin Papan bëdamboen isendac.

⁴² Adembidi ëbi tantiaquid yec acte bundoacsho acte menequid Nuquin Papan cuidnanquin bëdambo icmendac. Adembidi utsibon Esus tantiaquido bëdamboen nashunsho Nuquin Papan bëdambo icmendac –quequin Esusën chuipondashi. Adshun: –Chuibenetan –cac nidshumbimbi chuibenepondac.

11

Uan acten mentoanquidën chuimiaid

(Duc 7.18-23)

¹ Esusën: –Chuibenetan –cac abëd icquido nidanenubi auëshquiobi puduanec nidquin shubu dadpen icquid shubu dadpen icquidquien Esusën Nuquin Papan chiaid chuibeniäc caondash. Aid nidaid cuëshë Cadidia caidën capucuenequin adoac caondash. Adnubini yuec-yuecpambo ic-tanec Esusbëd icoaic cho-chopondac.

² Adnubien Uanën Esus acten mentondaidëmbi quënën nauedaïd icquin Esusën naïd tantiapac caondash. Adshumbic abëd icquido chuiquin: –¿Nuquin Papan chomiaïd nuqui cainaidta nepec? Esus chuitan –cac choshon Uambëd icquidon Esus chuituidpondash.

³ –Uanën: “Chuitan,” cac chobi. ¿Ëmbi cainaid Nuquin Papan chomiaïdquioda mibi nepe? Mibi

adquidpenquo icnuc ¿ada utsi chopatsiash? —
caquien

⁴ Esusën: —Ëmbi nadatiambo icquin nabamboedbëdta ëmbi chuiboed Uan chiec nid.

⁵ “Bëshuacboedën isbenosh. Canite icsaidi capucuenosh. Daushumbo icquid nami mishadenquo icquid bëdanosh. Pashuacboedën tantiabenosh. Adoshombic unësaidi uincuemiosh. Adoshombic Nuquin Papa tantienquo icquido Nuquin Papan bëdamboen iste chuiposh,” quequin Uan chiec nid. Aden chiac Uanën: “Nuquin tsusedpan chiampicpadquid Nuquin Papan chomiaidquo nec,” quequin ëbi tantiendac.

⁶ Adshumbic nadentsen chuita. “Muambo nec, ëbi cainquo icquin: Ambi chiacpadquid Nuquin Papan chomiaidien nec, quequin ëbi tantiaquid Nuquin Papan bëdambo icmendac,’ quiosh,” quequin chiec nid —cac nidanepondash Uambëd icquido.

Uan acten mentoanquid chiaid

(Duc 7.24-35)

⁷ Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuc nidonda? ¿Cunquequidën ishcunaid isnuecta nidtionda? Padenquo.

⁸ ¿Dashcute bëdaidquo dasiuidaid isnuecta nidtionda? Padenquo. Icsactsëcquid Uan dasiuidpondash. Dashcute bëdamboshë icquid dasiuidquido ancanquidën shubu dapan tabadquido nec.

⁹ Ad icnuc ¿atotsi quenuc nidonda? “Naden naindambi,” quequin Nuquin Papan chiaid

chuibenequid chuisho tantianuec ma mibi nidondac. Adec Nuquin Papan oncamiaidquio Uan nec.

¹⁰ Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquio yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic.

¹¹ “Nuquin Papan chomiaidquio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bëdapabi Uan ictsec. Padnuen ëmbi Nuquin Papan chiacpadomboen nabansho isash ëbi tantiaquido bëdamboshë iquendac.

¹² Uanën chuisho Nuquin Papa tantiabenacpadomboen ëmbitsen Nuquin Papan bëdamboen iste chuisho tantiashun adembidi abi icsaid ënshun icsaboedon dadpenshun Nuquin Papa tantiendac.

¹³ Nëbi Uanën: “Nuquin Papan abi yacnoshon bëdambo icquid chomendac,” quequin chuipondash. ¿Ambiada adopondash? Padenquio. Ëndenquimboshë tauamboen nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bëdambo icquid chomete chuiquin dada uamianepampic.

¹⁴ Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquio Edias cuëmëdquid

choendac,” quequin Ediasbimboecquid Uan chote chuipampic. Bëdamboen tantiaquin: “Nuquin tsusedpa Ediasbimboecquid Uan nec,” mimbi catsiac.

¹⁵ Bëdamboen tantiaquidën adembidi tantiatsiash —quepondash Esus abi datsidadquido chiec.

¹⁶ Aden chuisho tantiash chieshtoshobien Esusën chuipondash naden. —Nuquin Papan chi-aid tantienquo icquido yec nëmbo icquido ¿midapadquidoen nec? Bacuëbo nëishnanabictsëcquiec mibi iquec. Bacuëbo: “Ëmbi chiacpadomboen nana,” queuidash ambi chiacpadomboen aton ut-sibon nainquo icsho isash nëishash chushcananquid.

¹⁷ “ ‘Cuëdënuna,’ queuidbosh ëbi cuëdënubi ma mibi cuëdënenquo icboc. ‘Sedenquenuna,’ queuidbosh ëbi sedenquenubi ma mibi sedenquenquo icboc,” quetsash bacuëbo nëishnanabictsëcquiec ma mibi iqueyoc. Adec nëishëmënquido yec icsambo ma mibi iqueyoc.

¹⁸ Uan pete utsi-utsien pesa iccosh. Adecbidi acte paëmbo icquid aquesambo niosh. Adquid icsho isash nëishash: “Ëmbi nacpadomboen naisa nec. Podobitsi icsa dapudedashien nechitec,” mibi quepondac.

¹⁹ Èbien nuquin matsesën piacbimboen pequid nec. Adembidi actequid acquid nebi. Adsho isash nëishun ëbitsen icsamboen chuishunquin: “Peteuidi tantiaquin nua pequid nec. Tantiaden-uen acte paëmbo icquid acquid nec. Adecbidi nuquin matses piucquid bedshunquidobëd on-quec icsambo icquid caidobëd onquec quequid ma aidobëdi icsambo icquid nepayoc,” mimbi ëbi

capec. Padnuen bēdamboen tantiaquidēn Nuquin Papan chiacpadomboen nasho isun Uambēdta ēbi: “Bēdambo iquec,” caindac –quepondash Esus abi chieshēnquido chiec.

Shubu dadpen icquidēn tabadquido cuidte chid

(Duc 10.13-15)

²⁰ Adshumbic Esusēn padpiden chuipondash. –Nēbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bēdamboec tabadtiadquio iquebi,” quetiadquidi chieshec adenquio iquec –queshun Esusēn naden chushcapondash.

²¹ –Shubu dadpen icquid Codasin caid yacnocquidobēdi shubu dadpen icquid utsi Betsaida caid yacnocquido Nuquin Papan cuidtequido nec. Ēmbi aido ismebocpadomboen ismiac isadaidpembo cuidadenquio ictsempampic. Aden ismiacqui: “Ai, icsapobi,” quiash shubibudequi icsainquio yec ēnēdtsempampic. Shubu dadpen icquid Tido caid yacnocquidobēdi shubu dadpen icquid utsi Sidon caid yacnocquido adtsempampic.

²² Nuquin Papan matses abitedi cuidte ushēn: “Nadatiambo icquin nabanquin ismiacmaido nec,” queshun Tido caid yacnocquido Sidon caid yacnocquidobēdta bēdiactsēc cuidendac. Adoshombic: “Comapenen tantiaquin ismiacqui tantienquio icquido nec,” queshun Codasin caid yacnocquidobēdta Betsaida caid yacnocquido comapenec sidquenuc cuidendac.

²³ Adembidi nēmbō icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquo yec Nuquin Papa chieshēnquido cuidacno nidmetequido ma mibi nepayoc. Ēndenquimboshē yampido shubu dadpen icquid Sodoma caid yacnocquido cuidquin Nuquin Papan nibēdamēpampic. Ēmbi mibi ismebocpadomboen ismiac aidon abi icsaid ēntsempampic. Abi icsaid ēnsho Nuquin Papan cuidenquo ictsempampic. Cuidenquo yac nēbi aton matses abi ictsiash.

²⁴ Nuquin Papan matses abitedi cuidte ushēn: “Comapenen tantiaquin ismiacmaido nec,” queshun Sodoma caid yacnocquido bēdiactsēc cuidendac. Nuquin Papan chomiaid icquin ēmbi ismeboedo Capednaun caid yacnocquidoen comapenec sidquenuc cuidendac —quequin abi tantiesabo Esusēn chushcapondash.

*Esusēn dayacquiobimboecnuc icmete chiaid
(Duc 10.21-22)*

²⁵ Adshumbic Esusēn Nuquin Papa chuipondash. —Mibi bēdamboeshē iquec, Papa. Mibi yacnocquidotedishun Icbombo yec nidaidēn tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ēbi tantiabi iquec. Mimbi tantiamiac nēidon ēbi tantiec. Aden mimbi bēdamboen naic.

²⁶ Mimbi tantiacpadomboen mimbi bēdamboen naic. Mibi bēdamboeshē iquec, Papa —quequin Esusēn Nuquin Papa chuipondash.

²⁷ Adshumbic abi datsidadquido chuipondash. —Nuquin Papan ambi tantiaidtedi ëbi chuimec. Ëmbi naboedbëdta ëmbi nate abitedi con Pan ambentsëqui tantiec utsibon tantienquo icnuc. Adembidi Nuquin Papan natebëdta ambi naboed abitedi ëmbentsëqui tantiembi. Aden Nuquin Papa tantiaquin: “Nëidtedi matses bëdamboen tantiamembi,” qeshun: “Nuquin Papa nadquo quec,” quequin tantiamembi.

²⁸ Ëbi tantiata. Dayacquio yacimboecnuc mibi bëdambo icmembique. “¿Mitsipadequibi Nuquin Papa yacno puduedpe?” quec ¿uimambo yacimboecta mibi icpe? Adquidën ëbi tantiasho Nuquin Papa yacno puduedtequid mibi icmembique. Ëbi tantiata.

²⁹ Con Icbo ëbi cata. Con yuambo icquin ëmbi chiacpadomboen nasho mibi bëdamboen isquin dayacquio yacimboecnuc mibi bëdambo icmembique. Ancanesambo yec bëdambo icquidini neque. Con Icbo ëbi cata. Adsho mibi bëdambo icmembique.

³⁰ Mibi ancainquo icquin dayacquio yacimboecnuc bëdamboen mibi tabadmembique. Con Icbo ëbi cata —quequin chuipondash Esusën.

12

Esusbëd icquidon petsëcsho istuidshun chushcaid

(Mad 2.23-28; Duc 6.1-5)

¹ Adshumbic chonoadtemaid ushën Esusbëd capucuenequin tied matanquin bundotsëcshun tiedën caniquid ëshchicshun petempi petsëcondambi.

² Pesho istuidshumbini con tsusedpabon chi-ampid namequido padiseyobon: —Is. Mibëd icquido chonoadtemaid ushëmbi chonoadeque — capondash Esus chuiquin.

³ Adoaquien Esus: —Ma icsapenquio icpayoc. ¿Nuquin tsusedpa Dabidën bundoshon ambi petemaidquio pepampid chuiquin dada uapampid isamboda ictio?

⁴ Aidën Nuquin Papa tabadte shubu uashunaid abi puduedtemaidën puduedshun ambi petemaid pan sanaid istuidpampic. Aid panëmpi nëish yua abided unës uaquidon petequid nepampic. Aid panëmpi bedshun abëd icquidobëdtan Dabidën pepampic. Aden nuqui bëdambo icquid caidën ambi natemaidi napampic.

⁵ Adembidi chonoadtemaid ushën natemaid chiaid niacquimbi nëish yua abided unës uaquidon aid ushëmbi Nuquin Papa tabadte shubu uashunaidën puduedshun nacnendenepec. Nuquin Papan chiacpadomboen naiqui icsainquio icpec.

⁶ Nuquin Papa tabadte shubu uashunaid tantiaquin adopec. Aid shubu bëdapabi icnuc bëdamboshë icquid nebi.

⁷ Nuquin Papan naden chiaid mimbi bëdamboen tantienquio iquec.

“Ëmbi chiacpadomboen abentse-abentsen mimbi naic.

Adoquimbi ëmbi chiaid utsi niaquec mimbi ic-saido caido mimbi bëdamboen istiapimbo iquec.

Adsho isun: ‘Mibi bëdambo iquec,’ catiapimbo iquebi.”

quequin Nuquin Papan chiaid bēdamboen tantiashun ebēd icquidon bēdamboen nasho mimbi chushcainquo ictsenoc.

⁸Tantia. Nuquin Papan chomiaid icquin chonoadtemaid ushē ěmbibi chiampid icnuc ěmbi tantiacpadomboen aid ushēmbi ěbi tantiaquido namembique —quepondash Esus ěmbi petsēcsho istuidquido chiec.

*Mēicsatsaid bēdamiaid
(Mad 3.1-6; Duc 6.6-11)*

⁹Adanec nidec Nuquin Papan chiaid chuibante shubun puduedshun

¹⁰isaquien mēicsatsaid icpondash. Adnubien padiseyobon: —Chonoadtemaid ushēmbi bēdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Īcsambo mibi iquec,” canuna —qeshun Esus chuituidpondash. —¿Nadquid chonoadtemaid ushēmbi matses bēdamequinda Nuquin Papan chiaid niacpec? —caquien

¹¹Esusēn: —¿Ada min nēish yua obeca caid icpec? Adquid chonoadtemaid ushēn shēcuē uquēduc ampaēdacsho istuidshun ¿chiquenquoda mimbi icpatsia? Ai, mimbi chictsiac. Chonoadtemaid ushēmbi mimbi chonoadquin chicpatsiac.

¹²Aden min obeca bēdiactsēc tantiec mibi bēdapabi icnuc matses tantiaquiquin nashunquid bēdamboshē ictsiash. Nadquid chonoadtemaid ushēmbi matses aden bēdamboen nashunquidēn Nuquin Papan chiaid niaquenquo ictsiash —quequin Esusēn abi icsamenu caquido chuipondash.

13 Adotanquimbien Esusën mëicsatsaid chuiquin: —Mëcueta —cac mëcuc bëdampondash aton mëdante abiuc daëdi bëdambo yec.

14 Adsho isashien abi chieshënquido padiseyobo nëishquiopac caondash. Adec nëishanec nidash aton matses utsibobëd: —Cuesunequimbien Esus ictiad —quecuedepac caondash.

Esusën nate ëndenquimboshë chiampid

15 Adnubien Esus: —Ëbi cuesunetiadquio iquec —quianec auëshquiobi puduanec nidpondash. Nidsho isumbien matses dadpeshun tsibanampondash. Adshumbic aidon bëaid daicsaidotedi bëdamebampondash.

16 Adshumbic ambi bëdamiaido chuiquin: —“Bëdamioshi,” quenda —quequin chuipondash Esusën: —Ëbi abi chuiquid dapa icmenushe —quiash adpondash Esus.

17 Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

18 “Ëmbi chomiaid ëmbi chiacpadomboen naquidquio nec.

Aid tantiaquiec bëdambo iquebi.

Con Mayan bëdambo icquid abëdi tabadmemb.

Adoac ëmbi bëdamboen iste isadaidbobëdta matses utsibo abitedi bëdamboen chiendac.

19 Chushcanante bunenquio yec ancanenquio iquendac.

Chuiquid dapa ictiapimbo iquendac.

20 Icsambo icquido yec shubiquido yec natiaic tabadquido yec daicsaido yec quequidon

abi bēdiactsēc tantiabentsēcsho bēdamboen
isquin bēdamboen tantiamendac.

Nuquin Papan chiacpadec cuidte ushē choabi ic-
nuc adoendac.

21 ‘Nuquin Papan tantiacpadomboen matses
bēdamboen namendac,’ queshun nidaid
utsi-utsiec yacnocquidon matses
dadpeshun aidi tantiendac,”

quequin Esusēn bēdamboen nate chuipampic
Isayasēn.

*Podobitsi icsan namiaidi Esus nec, quiaid
(Mad 3.20-30; Duc 11.14-23; 12.10)*

22 Adnubien Esus ismenuen daicsaid bēpondash.
Dapudedshun podobitsi icsan bēshu uain eme
uaidi onquesa nepondash. Isenquio yec onquen-
quio icshobien Esusēn bēdamepondash. Adoac is-
benequi onquiampondash.

23 Adsho isashien Esus datsidadquido: —
Is. Comapenen tantiaquin nabanquidquio
nēid neque. ¿Nuquin tsusedpa Dabidēn
tsyuecquidta nepec? Adquid yec nuqui
cainaidquio Nuquin Papan chomiaidien nechitec
—quecuededpondash.

24 Adsho tantiash Esus chieshēnquido padisey-
obo: —¿Aidta nedic? Ma aidpenquio neyoc. Bet-
sibu caidēn podobitsi icsan icbon namiaid icquim-
bien Esusēn podobitsi icsa cuemechitec —quequin
otacquo tantiapanēdash.

25 Adshobien Esusēn aidon otacquo tantiaid
ambembi tantiashun naden chuipondash.
—¿Adquidēnda aton yuabi cuemepatsiash?
Padenquio. Chuiquid dapan aton yuabo
nēishtanquin chushcac cuēsh-cuēshēdec aton yuabo

uesadec nietsiash. Aido nibëdnuc chuiquid dapa ictiapimbo ictsiash. Adecbidi shubu dadpen icquidën tabadquido chushcananash cuësh-cuëshêdec niquian shubu dadpen icboedi daëdpactsëc yanec.

²⁶ “Betsibu caidbidi Satanas caidëmbi nami-aquien podobitsi icsa cuemehitec,” mimbi ëbi capoc. ¿Ambi naid nashobida Satanasën aton yuabo podobitsi icsabo cuemepatsiash? Padenquo ictsiash. Satanasën cuemiac aidbëdi aton yuabo cuësh-cuëshêdtsiash. Adnuc Satanas aton icbopenquo yantsiash.

²⁷ Mibëd icquidon podobitsi icsa dapuduedaid cuemiac caosh. ¿Cuemesho isun mimbi ëbi chiacpadomboen: “Betsibu caidën namiaquien nachitec,” cainda ictio? Ma mimbi padenquo icpaboc. Mimbi adoac: “Mimbi icsamboen chiec,” quetsenosh podobitsi icsa dapuduedaid cuemequido mibëd icquido.

²⁸ Nuquin Papan Mayanën namiaquimbi podobitsi icsa cuemioc. Ëmbi adosho isash: “Nëbi matsesbëd icquin Nuquin Papan namiaidën naosh,” quetiadquidi mibi nec —quepondash Esus.

²⁹ Adashic abi onquec: —Tantia. Mibi chuinu. Ampenuesho icbon istuidac ampequidën icbo uidën uabi ampeshuntiapimbo iquec. Icho uidënquo icquid bucun cataneshun ampeshunquid. Adecbidi Satanas bëdiactsëc tantiaquid icnuc ëbien comapenen tantiaquidquo nec. Uidën uacbimboen nadatiambo icquin nabanquin aton yua cuemepombi.

³⁰ Ëbi con icbo cainquo icquido Satanasën

yuabo nec. Adquid icquin ëbi chieshënquin ëbi tantiatsëcquido cuëshëdmendac. Adquidbidi mibi nec —quequin Esusën abi chieshënquido chuipondash.

³¹ Adshumbic nadentsen chuipondash. — Nuquin Papan chiaid niac-niacboedëmbi ënacsho Nuquin Papan bëdamboen isec. Nuquin Papan icsamboen chuishunquidëmbi abi icsaid ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin bëdamboen tantienquio icsho Nuquin Papan bëdamboen istiapimbo iquec.

³² Èbi chieshënquin icsamboen chuishunquidëmbi ënacsho Nuquin Papan bëdamboen isec. Aton Mayanën namiacsho isash: “Icsambo iquec,” quequin icsamboen tantiasho Nuquin Papan bëdamboen istiapimbo iquec. Aden ënenquio icquin icsamboen tantiasho adembidi ënenquio icquin bëdamboen istiapimbo iquendac —quequin abi chieshënquido Esusën chuipondash.

*Bëdambo icquid nec, quequin tantiate chiaid
(Mat 7.15-20; Duc 6.43-45)*

³³ Adshumbic naden bëdamboec tabadte Esusën chuipondash. —Cuëte bëdan bacuë bëdambo iquec. Cuëte icsan bacuë icsambo iquec. Chetequid isun cuëte dada matsesën tantiec. Adembidi mattses bëdambo icquid bëdamboec onquec bëdamboec tabadsho isun: “Aid bëdambo icquid nec,” quequin matsesën tantiatsiash.

³⁴ Ma mibi adquidpenquio neyoc. Nisibimboec icsa uanquido mibi nec. ¿Icsambo icquinda mimbi bëdamboen chuidio?. Ma mimbi padenquio icboc. Mimbi icsamboen tantiaid ma mimbi utsibo icsamboen chuiboc.

³⁵ Bëdambo icquidën ambi bëdamboen tantiaid bëdamboen chuitsiash. Icsambo icquidëmbien ambi icsamboen tantiaid icsamboen chuitsiash. Aden mimbi icsamboen chuipoc.

³⁶ Ambi cuidte ushën Nuquin Papan: “¿Ada bëdamboen tantiaquin chuidenio?” quequin mat-ses abitedi chuimendac.

³⁷ Adoac abimbo chiec: “Ai, bëdamboen nadeniombi,” quesho icsano nidmenquio iquec. Padnuen utsi: “Padenquio. Icsamboembimbi chuidenechitoc,” quesho icsano nidmequin cuideque. Icsamboec onqueboedi ënëdta — quequin Esusën abi chieshënkuido chuipondash.

*Padiseyobon: Ëbi isme, quequin Esus chiaid
(Mad 8.12; Duc 11.29-32)*

³⁸ Aden chuisho tantiashumbien abi chieshënkuido utsibon Esus chuituidpondash. —“Nuquin Papan chomiaidini nec,” quequin ëbi ismequin nadatiambo icquin nabanta. Isnu —quepondash padiseyobo Moisesën dada uapampid chuibanquidobëdi.

³⁹ Adoaquien Esus: —Padi. Nuquin Papan chiaid niac-niaquec mibi icsamboshë iquec. Ëbi tantiate bunenquio icquimbi mimbi: “Ëbi isme,” ëbi capec. Adsho nëbi mibi ismenquio iquembi. Yuecshumbimbi mibi ismendac. ¿Ada nuquin tsusedpa Onas caidën nampid tantie? Aid yampicpaden naindambi.

⁴⁰ Chishcambiecquid dapan chebudac aidën pucun uec daëdec ushacsho ucbudac Onas padpidec nidpampic. Adecbidi unësacsho chococac Onas yampicpadec daëdec ushash uincuenendabi. Aden ismendambi.

41 Èbi tantienquo yec mibi icsambo iquec. Padnuen Nuquin Papan chiaid Onasën chuibanac shubu dadpenquo icquid Ninibe caid yacnocquido badedi icsainquo yec ènèdpampic. Nuquin Papan chiaid chuibanquid Onas bèdambo icpampic. Èbien bèdamboshë icquidquo nec. Adquid icquin nadatiambo icquin dadpen ismiaqui mimbi èbi tantienquo iquec. Aden èbi tantienquo icquido icsho Nuquin Papan matses abitedi cuidte ushën Ninibe caid yacnocquidon: “Icsambo iquec,” mibi caindac.

42 Adquid cuidte ushëmbi matses utsi Sud yacnocquido ancaquidën nuquin tsusedpa Sadomonën chuisho tantiec chopampidënsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuëmèdquid dadpen tantiaquid nec,” quequin chuituidac Sadomonën chuisho tantianuec nidshun aid chidon tantiatuidpampic. Adash: “Nuquin Papan tantiamiaidënquo Sadomonën bèdamboen chuipec,” quepampic. Èmbien abitedi tantiaquid icquin nadatiambo icquin ismeuidpoc. Adoauqui mimbi tantienquo icpec —quepondash Esus abi chieshënquido chiec.

*Abi nianaid podobitsi icsa dapuduedoaid
(Duc 11.24-26)*

43 Adshumbic naden Esusën chuipondash. — Icsaquido mibi nec. Podobitsi icsa dapuduedaid-bimboecquid mibi nec. Tantia. Mibi chuinu. Abi dapuduedaid matses nianashi podobitsi icsa abi dapuduedtequid nibèdacno yuec capucuen-

capucuenec. Adtanequi: “Ëbi icbocnobidi dapuduedoaic nidebi,” quianec choec.

⁴⁴ Chonobi ambi niamboed matses: “Ëbi dapuduedaid podobitsi icsa nibëdnuc bëdambo iquebi. Adquid chomeoatiapimbo iquebi. Ëmbimbo naic bëdamboec tabadquidquio nebi,” queuidpec. Adshobien ambi niamboed podobitsi icsan istuidoapec. Istuidoashic: “Dapuduedtequidquio nëid nec,” quianec

⁴⁵ abipadquid utsi bedec nidoaic. Nidshumbic 7tedi icsamboshë icquido istuidshun bëash aidobëdi dapuduedec. Adnuc podobitsi icsa abentsëc dapuduedaid yec ënden icsambo icboedi aido dadpen dapuduedaid yec buëdanquiec aid matses icsamboshë yanec. Adquio mibi iquec. “Bëdambo iquebi,” queboedi nëbi mibi icsamboshë yanec —quequin Esusën chuipondash.

*Anibëdi Esusën utsibo choaid
(Mad 3.31-35; Duc 8.19-21)*

⁴⁶ Adanec shubun puduedshun Esusën abëd puduedquido dadpen chuinubi aton utsibo aton titabëdi Esus isnuec chopac caondash. Umanuc tabadnubi

⁴⁷ utsin puduedshun Esus chuituidpondash. — Mibi isec tita min utsibobëdi choaccosh. Umanuc tabadec —caquien badedi nidenquio yec

⁴⁸ Esus: —Utsitsen con ta caimbi. Adembidi utsitsen con utsi caimbi —quetanquin

⁴⁹ abëd icquido mëdquin ismepondash. —Nëid ëbëd icquido con utsibo caimbi.

⁵⁰ Nuquin Papan chiacpadomboen naquidquio icsho con matses caimbi. Con utsi caquinc

con chibi caquinc con ta caquinc caimbi —
quepondash Esus.

13

*Piacbo ëshë siaid chiaid
(Mad 4.1-9; Duc 8.4-8)*

¹ Adtanec nidec chian budash cuëmano tabadtuidpondash.

² Tabadtuidsho isash matses dadpenquo cho-choash tsucus-tsucustsëcquo yec Èsus datsidadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

³ Adshumbic abi tantiate chuinen naden om-poacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquo.

⁴ “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid.

⁵ Èshë utsibic nidaid tsasimbo yacno siac badedi dëyucuidash

⁶ aton tapun nidaidën puduedenquo icnuc ushë chënquequidën badedi unësquid.

⁷ Èshë utsibic nisanquid diadacno siaid dëyucash canidouidsëcsho nisanquidën dayunac unësquid.

⁸ Padnuen ëshë utsi-utsiec nidaid bëdanquo siac dëyucash caniash dadpenquo ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

⁹ Adashic: —¿Min pabiate shëcuë nibëdquieta iquec? Ëmbi chuiboed bëdamboec pausudta — quepondash Esus.

Ompoacbimboen chiec nebi, quiaid
(*Mad 4.10-12; Duc 8.9-10*)

¹⁰ Adsho tantiashun abëd icquidon Esus chuipondash. —¿Atotsieshun ompoacbimboen nëid matses dadpen chie? —caquien

¹¹ Esus nadpondash. —Utsibo tantiamenquio icquin Nuquin Papabëd tabadte chuiquin nëbi mibiuidtsëqui tantiamembi.

¹² Nuquin Papa tantiatiadquio icquidën ëbi tantiasho bëdamboen tantiamendambi. Nuquin Papa tantiauidtsëcquidën ëbi tantienquio icsho ëmbi ompoacbimboen chiac tantienquio ictsias.

¹³ Ompoacbimboen aido dadpen chuibanembi. Ëmbi naid isun ëbi tantienquio iquec. Ëmbi chuisho pamumëdacbimboen tantienquio iquec. Adsho aidon tantiatiapimbo icnuc chiembi.

¹⁴ Nëidon tantienquio icte chuiquin Nuquin Pan nuquin tsusedpa Isayas caid naden dada uamepampic.

“Chiac tantiaboshombi tantienquio iquendac. Ismiac isquioboshombi: ‘Ai, aidi nec,’ cainquio iquendac.

¹⁵ Ai, ëmbi chiaid tantiatiapimbo iquec.

Ushacbimboen tantienquio yec pamumëdacbimboec chieshëmënquidombo iquec.

Ëbi tantiatie bunenquio iquec.

Ëmbi chiaid tantiaquidombien paposhquiacbimboen bëdamboen tantiabentsias.

Pausunac bimboen tantiashun ěmbi chiacpadom-boen natiadquo yansho aton chiesh bĕdametsiambi. Aton chiesh bĕdamete bunenquo iquec,”

quequin Nuquin Papan dada uamepampic — quepondash Ēsus abĕd icquido chiec.

¹⁶ Adashic aidobidi chiec: —Isayasĕn chiacpadom-boen utsibon ěbi tantienquo icnubi mimbien ěbi tantiec. Ēbi isec mibi tabadec. Ēmbi chuibansho tantiash: “Ai, abimbo caic,” quec mibi bĕdambo iquec.

¹⁷ Ēbi chote chuipampidobĕdtan bĕdamboec tabadquido dadpenshun mimbi ěbi isacpadom-boen ěbi iste bunequi ěbi isambobi unĕspampic. Mimbi ěmbi chuisho tantiacpadomboen tantiatiadquo yequi tantiambobi unĕspampic —quepondash Ēsus.

*Piacbo siaid sebadĕnquo chiaid
(Mad 4.13-20; Duc 8.11-15)*

¹⁸ Adashic abi onquec: —Tantia. Ēmbi piacbo ĕshĕ siaid quequin chuiboed sebadĕnquo mibi chuinu.

¹⁹ Nuquin Papabĕd tabadte chiaid piacbo ĕshĕ siaid bimboecquid nec. Nuquin Papan chiaid chiaqui tantiadenquo icsho Satanasĕn nac badedi bĕshumpec. Uicchunĕn piacbo ĕshĕ paĕdaid badedi chiacbimboen adopec.

²⁰ Utsibic Nuquin Papan chiaid chiaqui bĕdiactsĕc tantiauidtsash: “Bĕdambo iquec,” quec cuishonqueuidtsec.

²¹ Adsho: “Nuquin Papan chiaid tantiaquid nec,” qeshun utsibon chieshĕnac badedi

chieshtoshon tantienquo yanendac. Piacbo ëshë tapunuidtsash unësac bimboen adoendac.

²² Utsibic Nuquin Papan chiaid tantiatsashi ambi dacuëdquin tantiaiduidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquo icpec. Isitodon dayunac unësac bimboen adoendac.

²³ Padnuen utsibon tantiate nidaid bëdan siaid-bimboecquid nec. Nuquin Papan chiaid chuisho tantiaquioshon ambi tantiaid bënuainquio icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsëc adquidbidi yanendac –quequin abi tantiate chuipondash Esusën.

Ëshë icsambo icquid seuanaid chiaid

²⁴ Adshumbic Esusën naden chuipondash. — Tantia. Nuquin Papan namiaid tantiamenuen utsi chiacbimboen chuinu. Tiedën caniquid pete adosbiecquid icbon siac caondash.

²⁵ Adanec nidambic inchëshëmbi choshon chieshëmënuquidën ëshë icsambo icquidtsen daëd uain seuanac caondash.

²⁶ Adoac adosbiecquid canidotsëcnubi abëdi tancandaëdpamboec icsambo icquid canidotsac caondash.

²⁷ Adsho istanquin yuabon aton icbo chuituidpac caondash. “¿Pete ëshëda sio?” cac: “Ai,” quesho tantiash: “Icsambo icquidbëd tancandaëdec canidopac boc. ¿Mitsipaden sio?” quequin yuabon icbo chuipac caondash.

28 Adoaquien: “Chieshëmënquidëmbien seuan-chitash,” cac: “¿Chicshunetanquindambi icpe?” yua qesho:

29 “Padi. Petebëdi chiquidtsiash.

30 Aidbëdi ma canipanuna. Èshëacsho tacuesquimbi teshun sianun nanuna. Adoshombic icsambo icquid tsindobanshun nëdëncanun nanuna. Icsambo icquid nëdëncatanquimbic pete bedshun sandoshon shubun dectandonon nanuna,” quepac caondash tied icbo –quequin Esusën chuipondash.

Esus tantiaquido dadpen yante chiaid
(Mad 4.30-32; Duc 13.18-19)

31 Adshumbic abi tantiaquido dadpen yante tantiamenuen Esusën naden chuipondash. — Cuëte bacuë èshëmpi

32 pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquo yanendac — quepondash Esus.

Abi bëdamboen tantiate Esusën chiaid
(Mad 4.33-34; Duc 13.20-21)

33 Adshumbic Esusën abi bëdamboen tantiate chuipondash. —¿Mitsipad nami uaid icpec? Aniacsëc nami uashun utsibëdta daëd uain cabiunac abichobi batambo yanec. Adembidi ëbi bëdiacsëc tantiatsëcboedi ëmbi chiaid tantiash ëbi bëdamboen tantiaquid yanendac

34 —quequin Esusën chuipondash. Sebadënquo chienquo icquin ompoacbimboenuidi Esusën chuipondash.

³⁵ Aden Esusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadënquoio chienquoio icquin ompoacbimboenuidi chuibanendambi.

Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

Ëshë icsambo icquid seuanaid sebadënquoio chiaid

³⁶ Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. —“Chieshëmënquidën ëshë icsambo icquid siaid nec,” quequin mimbi chuiboed en sebadënquoio chui, Icbo. Tantaranu. ¿Atotsi chuitiadquoio icquin aden chio?

³⁷ —caquien Esusën chuipondash naden. —Tantia. Mibi chuinu. Pete ëshë bëdambo icquid sequidbimboecquid nebi. Nuquin Papan chiaidquoio tantiamequin matses bëdambo icmequid nebi.

³⁸ Padnuc tied dapabimboecquid nidaidën tabadquidtedi nec. Padnuc pete ëshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënquid Satanasën yuaido icsambo icquid siaidbimboecquid nec.

³⁹ Padnuc ëshë icsambo icquid sequidbimboecquid Satanas nec. Aidën yuaido matses icsambo

icquidon ëbi tantiaquidobëd tabadquin icsameti-adquio iquec. Adsho badedi cuidenquio icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuen ambi chiacpadën Nuquin Papan abi yacnoshon uaido mayan bëdabon ëmbi chiacpadomboen naindac.

⁴⁰ Icsambo icquid tsindoshon nëdëncacbimboen Nuquin Papan cuidte ushëmbi icsambo icquido cuidendac.

⁴¹ Ëmbimboen mayan bëdabo namendac. “Icsamianquidobëdta icsaidotedi bedshun chian anëdënquiacno nëseca,” quequin ëmbi chiac

⁴² bedshun chian anëdënquiacno nësecaindac. Adoac natiaic mëyadbudec sidquequiendac.

⁴³ Padnuen ëbi tantiec bëdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantiashun ëmbi chiacpadomboen nata —quepondash Esus.

Nuquin Papabëd tabadte bunquiota, quiaid

⁴⁴ Adshumbic padpiden Esusën chuipondash. —Tantia. Matses ambi istuidaaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquio icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” queshun piucquid ompoampid bedpac caondash. Adomboen matsesën Nuquin Papabëd tabadte bunquin aton nauidi nainquio

icquin Nuquin Papan chiacpadomboenuidi nac bēdambo ictsiash.

⁴⁵ Tantia. Casēdu bēdaidquio bunaidtsen mibi chuinu. Dadan casēdu bēdaidquio bunquin bednuen nibēbenepac caondash.

⁴⁶ Adshun bēdaidquio istuidash: “Nadquid utsi nibēdec,” quiash comapenec bunquiac caondash. Adshun aton na abitedimbo menequin piucquid bedshun casēdu icbo menequin aid casēdu bedac caondash. Adomboen Nuquin Papabēd tabadte bunquin matsesēn ēbi tantiaquiac bēdambo ictsiash —quepondash Esus.

Nuquin Papan cuidte ushē Esusēn chiaid

⁴⁷ Adshumbic Esusēn naden chuipondash. — Tantia. Mibi chuinu. Nuēcquid nibedacimboen naindambi. Isadaidbon nuēcquid dadpenquio bedte nēshaid dapa acte nēnequin

⁴⁸ nēshaid cubu-cubuctsēcquio icnuc nuēcquid bedshun acte cuēman tabadquin nuēcquid nibedquid. Nuacquid sandobanquin pistsēcquid acte nēsecaquid. Aden Isadaidbon nuēcquid bedquid.

⁴⁹ Adomboembidi namendambi. Nuquin Papan cuidte ushē chonoc ambi abi yacnoshon uaido mayan bēdabo namendambi. Adoac choshon nibedacimboen matses bēdambo icquido Nuquin Papa yacno nidmequimbi

⁵⁰ icsambo icquido chian anēdēnquiacno nēsecaindac. Adoac natiaic shubiquiendac —quequin Esusēn Nuquin Papan cuidte chuipondash.

⁵¹ Adshumbic: —¿Ada ěmbi chuiboedtedi tantie?
—caquini: —Ai, tantiemi —quepondac.

⁵² Adsho tantiashun Esusĕn chuipondashi.
—Nuquin Papan chiaid chuibanquid mibi iquendac. Matsesĕn aton na ěndenquimbo dayun uanĕdaidbĕdta aton na chuca ismequin chiacbimboen mimbi naindac. Nuquin Papan chiaid ěndenquimbo dada uampidbĕdtabi Nuquin Papan chiaid utsi ěmbi chuiboedquio mimbi chiendac —quepondash Esus.

Nasaded yacno Esus nidaid
(*Mad 6.1-6; Duc 4.16-30; Uan 4.44*)

⁵³ Adanec auĕshquiobi nidequi

⁵⁴ abi caninĕdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoaquien: —¿Mitsipaden comapenen tantiabempash neba? ¿Mitsipadec comapenen tantiaquin bĕdamequid yampash?

⁵⁵ ¿Nuqui isacmaidta nedic? Ma aton papa cuĕte nacnenquid nepaboc. Ma aton tita Madia nepayoc. Āton utsibo nĕidtedi iccosh. Nĕidic Acobo. Nĕidic Ose. Nĕidic Simon. Nĕidic Udas. Aidtedi aton utsibo iccosh.

⁵⁶ Aido nĕmbo tabadosh. Āton chibichedotsen nĕmbo tabadosh. ¿Comapenen tantiaquidta nedic? Ma adquidpenquio neyoc —quequin

⁵⁷ Esus chieshĕnquin tantienquio icpondash.

Adsho tantiashun Esusĕn nadopondash:
—Nuquin Papan: “Ĕmbi tantiamicpaden chuibanta,” caidĕn chiac utsibon tantiaquid.

Adquidën abi caniacnoshon chuibansho tantienquo icquid —quepondash Esus.

⁵⁸ Adshun nadatiambo icquin nabanquin daëdpactsëc ismetsëcondash: —“Nuquin Papan chomiaidquo nec,” quetiapimbo iquec —queshun.

14

Uan acten mentoanquid

unës uaid

(Mad 6.14-29; Duc 9.7-9)

¹ Adnubien ancaquidën Edodes caidën Esusën comapenen tantiaquin nabanaid chuisho tantia-pac caondash.

² Adshumbic aton yuabo chuipac caondash. —Uan pado acten mentoanded nepash icnui. Ëmbi mapi butemiondaidi uincuempash icnui. Adquid icquin comapenen tantiaquin nabam-pash icnui —quepac caondash Edodes.

³⁻⁴ Edodesën Uan cuesuniac caondaic chuinu. Tantia. Uanën: —Mimbi bedaid Edodias caid min chidopenquo nec. Min utsi Uedipe caidën chido bedshun Nuquin Papan chiaid mimbi niaquec —cadoniaquien Edodesën chieshtoshon uidën uameshun Uan quënën nauedmepac caondash.

⁵ Adshumbic Uan cuesunetiadquo icquimbi aton matses: —Nuquin Papan chiaid chuibanquidquo nec —quesho tantiashun aido dacuëdënquin Uan badedi cuesunenquo icpac caondash.

⁶ Adshumbic Edodesën: —Ëbi tishaid ushë nec —queshun matses dadpen aton shubun puduedmeshun pemepac caondash. Adnubien

ambi inaidën champin Edodesën pemiaido baidaquin ismepac caondash. Adsho isumbic Edodesën: —Bëdamboenshë mimbi naic —qeshun
⁷ naden chuipac caondash. —Tantia, champi. ¿Atotsi buneque? Mibi bunaidquio mibi menenu. “Nuquin Papan cuidnushe,” quiash muatiapimbo iquebique. En ëbi chui —capac caondash Edodesën.

⁸ Adoaquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaid dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemete bumpac caondash.

⁹ Adoaquien Edodesën: —¿Atotsi quepequini ado? ¿Adoenquio ictiadtsimbi icpoba? —quequin ambi chuiboed niactiadquio icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

¹⁰ Adoac quënën tsadacnobi Uan mapi buteshun

¹¹ mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

¹² Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

*Comapenen tantiaquin 5000tedi pemiaid
 (Mad 6.30-44; Duc 9.10-17; Uan 6.1-14)*

13 Nidshumbic: —Mibi acten mentondaid mapi butiaccosh —catuidpondash. Adsho tantianec cano antabëdtoshon chian potiaash pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

14 Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquío icquin daicsaidotedi bëdamebampondash.

15 Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icbo. Shubu dadpen icquid utsi-utsiec yacno nidshun ma piucquid menequin ma pete bednu —caquien

16 Esusën: —Padi. Ma tabadnu. Mimbibi peme —capondashi.

17 Adoaquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac.

18 Adsho: —Aidtedtsëqui beccho —cac meniondambi.

19 Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuësh-cuëshshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

²⁰ Adoaquin nua cubudcuededquin pebeded-pondash abitedishumbi. Piacsho isun napi uaid bedtanequin tsitsan dapan sandotanquin isquien tsitsan dapa 12tedi cubu-cubuctsécquío iquec pete cuësh-cuëshaid napi uaid.

²¹ Aden matses dadpenquío pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

*Acte bëntse Esus choaid
(Mad 6.45-52; Uan 6.16-21)*

²² Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsi-dadquidotsen: —Nidanec nid —cac nidanepac caondash.

²³ Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

²⁴ Adnubien chian dapa potequi abëd icquidotsen inchëshpondash. Chian nënantanquío yanubi cunquetuidpondash. Adnuc acte comapenec tèccuasquiampondash uncadenquío yec. Comapenec acte ish cudnuc cano mentoadtiadpambo icpondash.

²⁵ Adnubien badiadte anoentsëqui acte bëntse Esus chopondash.

²⁶ Acte bëntse chosho isashini: —Podobitsi nec —quiash dacuëdtanec sidquecuededpondac.

²⁷ Adshobini Esusën: —Ëbien neque. Dacuëdenda —capondash.

²⁸ Adoaquien Petedon: —¿Con Icbombobida ne? Con Icho icquin: “Acte bëntse cho,” ëbi ca — capondash.

²⁹ Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëcondash.

³⁰ Esusuidi isec bëdamboec niduidtsequi acte comapenec tēcguasquesho isash dacuëdtanec acte bëntse niduidtsëboedi mentoadtsempondash. — Ëbi bed, Icho. Mentoadebique —caquien

³¹ Esusën badedquoio bedtanquin indopondash. Aden indoequi: —“Con icbon ëbi bëdamboen nametsiash,” queboedi ¿atotsi quiash dacuëdtano? Ëbi bëdiactsëc tantiatsëcquid mibi nec — quepondash Esus Petedo caic.

³² Adtanec Petedobëdi cano antsadtonobien cunqueboedi cunquenquo yampondash. Actetsen tēcguasquenquo yanondash.

³³ Adsho isun cano antabëdquidon: —Mibi bëdamboshë iquec. Comapenen tantiaquidquo yec Nuquin Papan Madombo mibi nec —quequin Esus tantiabededpondash.

*Quenesaded yacnoshon Esusën bëdamiaid
(Mad 6.53-56)*

³⁴ Adashic chian potiaash Quenesaded yacno pudundopondash.

³⁵ Pudundosho isun anocquidon: —Esus chosh —quequin uanocquido abitedi chuibeniac daic-saido abitedi bë-bëpondash.

³⁶ Bë-bëshumbic: —Dashcuteuidtsëqui mishashi bëdantsiash —queshun Esus chuituidquin: —Min

dashcute cuëmano daicsaido mishme –cac mish-
miaqui bēdampondash abitedi.

15

Padiseyobo icsaid Esusën chiaid

(Mad 7.1-13)

¹ Adnubien padiseyobo Moisesën dada uampid chuibanquidobēdi shubu dadpen icquid Edusaden caid yacnuësh cho-choquin Ēsus istuidpondash.

² Istuidashic: —¿Atotsieshun mibēd icquidon nuquin tsusedpabon chiaid niac-niacposh? Penush mēpamēdenquo icquin nuquin tsusedpabon chiaid ma niac-niacpaboc — quepondash Esus chieshēnquido.

³ Adsho tantiashun Esusën: —Ma mimbi. ¿Atotsieshun Nuquin Papan chiaidquo niac-niaque? Nuquin tsusedpabon chiacpadomboen naquin ma mimbi Nuquin Papan chiaidquo niac-niacpayoc.

⁴ Tantia. Mibi chuinu. “Titabēdta papa chieshēnenquo icquin bēdamboen tantiata,” quequin Nuquin Papan chiampidquo ma mimbi niacpaboc. Adembidi: “ ‘Con pa unēspashun,’ quec chieshēmēnquid icsho unēs uaquid. Adembidi ani icsamboen chuishunsho unēs uaquid,” quequin Nuquin Papan chiampid utsi mimbi niacpec.

⁵ Aid niacquin nuquin tsusedpabon ambembi chiaidien mimbi chiec. “Anibēdta amē naden cudasēnac bēdambo ictsiash,” mibi quepec. “ ‘Nuquin Papa menetequid nēidted con piucquid iquec. Mitsana nibēdsho menetiadquidi mibi menenquo

iquembi. Nuquin Papa menetequid nec,' quequidën

⁶ cudasënac bëdambo ictsiasch," mibi quepec. Aden nuquin matsesën chiaid naquin Nuquin Papan chiaidquio ma mimbi niac-niacpayoc.

⁷ "Nuquin Papa tantiaquidquio nebi," quec muaquid mibi nec. Ëndenquimboshë Nuquin Papan chuimiac nuquin tsusedpa Isayas caidën mimbi icsamboen tantiate chuiquin dada uapampic naden.

⁸ "Isadaidbo: 'Nuquin Papambo tantiembi,' quepec.

Adboedëmbi ëmbi chiaid niacquin ëbi tantienquio iquec.

⁹ 'Ma Nuquin Papan ëbi bëdamboen isnu,' queboedëmbi ëbi bëdamboen tantienquio iquec.

Ëmbi chiaidquio namenquio icquin aton matsesën chiaiduidi namepec,"

quequin Isayasën Nuquin Papan chiaid dada uapampic –quequin Èsusën abi chieshënquido chushcapondash.

*Ana shëcuënuësh choaid chiaid
(Mad 7.14-23)*

¹⁰ Adshumbic abi isec datssidquido ompoacbimboen chuipondash. –Tantia. Mibitedi chuinu.

¹¹ Ana shëcuën puduedaidën matses icsaten mimbi dampec. ¿Adquidënda matses icsapec? Padenquio. Ana shëcuënuësh choaidëmbien matses icsatsiasch –quequin Esusën chuipondash.

¹² Adnubien aböd icquidon: —Mimbi aden chui-boed tantiashun padiseyobon mibi chieshënosh, Icbo —caquien:

¹³ —Dacuëndenda. Icsa bescatanquin tsindoshon nädëncac bimboen ambi tantiamiabi yaido ambembi chuiquido Nuquin Papan cuideque.

¹⁴ Dacuëndenda. Padiseyobo bëshuaid bimboec icquido neque. Bëshuaidën aton matses bëshuaid utsi bëdamboen buantiapimbo iquec. Buanuec abi shëcuë ampaëdtsiash. Adembidi Nuquin Papan chiaidpenquo namequin aton matses bëdamboen tantiametiapimbo iquec —quepondash Esus aböd icquido chiec.

¹⁵ Adshobien Petedon: —Mimbi ana shëcuënuësh choaid quequin chui-boed tantiambo iccombique. Aid sebadënquo chui. Tiantianu, Icbo —caquien:

¹⁶ —¿Tantiamboda icco?

¹⁷ Chuinu. Tantia. Ana shëcuën puduedaid mimbi peboed min pucun uedoash chimute shëcuënuësh choec. Adquidën Nuquin Papan chiaid niacmenquo iquec.

¹⁸ Matses onquiaidimbi ana shëcuënuësh choaid caoc. Abibi uquëducuësh onquec: “Adoembi,” quequin otacquo tantiaquin naic matses icsatsiash.

¹⁹ Icsambo icquido yec: “Ai, adoembi,” quequin otacquo tantiashun Nuquin Papan chiaid niactsiash nadquidën. Nëidic unës uanquid. Nëidic aton chidopenquo chudquid. Nëidic aton bënëpenquo chudmequid. Nëidic aben uequid. Nëidic ampequid. Nëidic muaquid. Nëidic icsamboec chuishumënquid.

²⁰ Adquidtedi: “Ai, adote bunebi” quequin otacquo tantiash icsaquid nec. Padnuen penush

mëpamëdenquo icquin Nuquin Papan chiaid ni-aquenquo ictsiash —quepondash Esus abëd icquido chiec.

Isadaidpembo chidon Esus tantiaid
(Mad 7.24-30)

²¹ Adanec auëshquiobi Esus nidpondash. Shubu dadpen icquid Tido caid anoentsëqui datambidanec choec shubu dadpen icquid utsi Sidon caid anoentsëqui chopondash.

²² Adnubien anocquid cananeyabo chidon Esus cuëntuidpondash. —Tsusedpa Dabidën tsyuecquid Nuquin Papan namiaid icquin ëbi bëdamboen ista. Con champi podobitsi icsa dapuduedaid yec nati-ambo iqueque. Con champi bëdameta —caquien

²³ Esusën ëcbedenquo icpondash. Ëcbedenquo yaqui chidon tsibanbanquin cuënbampondash. Adsho tantiashun Esusbëd icquidon: —Chieshanquiec cuëdpeque. Cuemepa —caquien

²⁴ Esusën cuemenquo icquimbi aid chuiquin: —Nuquin Papan chiacpaden Isadaidbo matsesba Nuquin Papa bëdamboen ismete tantiamenuec nebi. Bënudacimboec icquin Nuquin Papa tantienquo icsho aidoba tantiamenuec nebi —quepondash Esus.

²⁵ Adsho tantiash nidenquo yec chido cuëdboed Esus ismequin danëshën sebudtsec: —Ëbi nashunta, Icho. Con champi bëdameta —queshobien Esusën:

²⁶ —¿Aton bacuëbo pemenuquo icquimbi aton opa pemiacta bëdambo icpatsiash? Padenquo. Adembidi Nuquin Papan con matses caidotedi tantamiabi utsibo ëmbi nashunac icsambo

ictsiash. Isadaidboba tantiamenuec nebi — quepondash Esus.

²⁷ Adsho tantiashun chidon: —Ai, abimbo mimbi caic. Padnuen bacuëbon pequin paëdmiaid opashëmpin petsëcquid. Adembidi mimbi comapenen tantiaquin nabanaqui isadaidbo dadpen bëdanubi isadaidpembo abentsëc tantiaquid icsho ëbi nashunquin con champi bëdameta

²⁸ —caquien Esusën: —Ai. Èbi tantiaquidquo mibi nec. Mimbi chiacpadec min champi bëdanendac —quesho tantianec aton shubuno nidshun isquien aton champi bëdanac Esusën chuinubi.

Daicsaido dadpen Esusën bëdamiaid

²⁹ Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

³⁰ Tabadtuidsho isun matses dadpenquo cho-choquin daicsaido dadpen Esus ismenuen bë-bëpondash. Tidinquiquido yec bëshuaido yec shëquëquenquo icquido yec onquesabo yec daicsaido utsibotedi yec quenuc bë-bëpondash. Adsho Esusën bëdamebampondash.

³¹ Bëdamiac onquenquo icboedi onquianondash. Bëshuacboedëmbi isbenondash. Capuenquo icboedi capucuenondash. Daicsaido utsibo adecbidi bëdanondash. Adsho isquido nadpondash. —¿Adquidta ictenec? Nuquin matses isadaidbon tantiaidën Nuquin Papan namiaid icquin bëdamepash icnui. Nuquin Papa bëdambo iquéc — quepondash Esusën bëdamiaid tantiash.

Matses 4000tedi pemiaid
(Mad 8.1-10)

³² Adec tabadsho isashien Esus: —Nëido tantiac unësquio iquec. Ĕmbi nabansho isnuec choash 3tedec ushquin piac ambi bëboed pete naimëdaccosh. Ĕmbi: “Nid,” cac nidnuequi bunambi padishtsiash. Pemiabi nidmetiapimbo iquebi —quepondash.

³³ Adsho tantiashun abëd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

³⁴ Adoaquien Esusën: —¿Tedtsi panëmpi iquec? —cac: —Sieteted ictsec. Nuëcquidëmpi daëdpactsëc ictsec —quesho

³⁵ tantiashumbien abi datsidadquido chuiquin: —Nëmbo tabadbud —capondash. Adoac tabadbud-pondash abitedi.

³⁶ Adshumbic panëmpibëdta nuëcquidëmpi bedshun Nuquin Papa chuipondash. —Nëid mimbi uaid bëdambo iquec, Papa —queshun pete cuësh-cuëshbantsëcshun abëd icquido menebampondash: —Pemeban —quequin. Adoac abitedimbo pemebampondash.

³⁷ Aden pemiác abitedimbo nua cubudcueded-pondash. Piacsho isun pequin napi uaid bedbanquin tsitsan 7ted icnuc cubu-cubuctsëcquio icnuc sandobampondambi.

³⁸ Esusën pemiaido dadpenquio icpondash. Tambanac 4000tedi dada icpondash. Chido bacuëbobëdta tambanambo iccondambi.

³⁹ Adashic: —Nidanec nid —quepondash Esus ambi pemeboedo caic. Aido nidanenubi chian budash cano antabëdtoshon Esusën chian potepon-

dash. Chian potiash nidaid Mactada caid yacno pudundopondash.

16

Saduseyobon: Ēbi isme, quiaid
(*Mad 8.11-13; Duc 12.54-56*)

¹ Pudundoanec nidshobi anocquidon abi chieshēnquidon Esus chuituidpondash. — “Nuquin Papan chomiaid nebi,” quequin comapenen tantiaquin nabanquin ēbi isme —cabededpondash padiseyobobēdtan saduseyobon.

² Adshobien Esusēn: —Nuquin matsesēn chiaid mimbi tantiec. “Inchēshbudtsēqui abu piumbo icsho isash: ‘Tanunquio badiadec,’ quequid.

³ Badiadnubi abu inchēshpambo icsho isash: ‘Ue dapa choec,’ quequid,” quequin nuquin matsesēn chiaid mimbi tantiec. Aden chiaid tantiacbimboen bēdamboen tantiatiadquidi Nuquin Papan nēbimbobi naid mimbi tantienquio iquec.

⁴ Icsambo icquid icquimbi mimbi: “Ēbi isme,” cadednepec. Nēbi mibi ismenquio iquembi. Nuquin Papan nuquin tsusedpa Onas chishcambiecquid dapan chebudacsho daēdec ushun ucbudmiacbimboec unēs uacsho chococac daēdec ushash uincuenendabi. Aden ēbi tantiesabo ismendambi —quianec nidpondash Esus.

Padiseyobon chiaid tantienda, quiaid
(*Mad 8.14-21*)

⁵ Adanec nidec chian budash cano antabēdtoshon chian poteoapondash. Chian

potequien Esusböd icquido: —Pete nianchitombi. Bëtiadquidi nepobi —quepondash.

⁶ Adshobien Esusën aböd icquido chuiquin: —Padiseyobëdtan saduseyobon naid pan bidiscamete bimboecquid iqueque. Ista —caquien

⁷ tantienquo yec aböd icquido nadec onquecuededpondash. —Nuqui niamboed pete chiequi nepanui —quepondash.

⁸ Adsho ambembi tantiash Esus: —Ëbi bëdiactsëc tantiatsëcquid mibi nec. ¿Mimbi pete niamboed chiectabi nedi? Padenquo.

⁹ ¿Bëshunashta mibi nepe? Pete 5tedtsëcboedi ëmbi 5000tedi pemiaidën napi uaid dadpen iccondaid ¿tantienquioda yano?

¹⁰ ¿Adembidi pete 7tedi ictsëcboedi ëmbi 4000tedi pemiaidën napi uaid dadpen tsitsanën sandoboed tantienquioda yano?

¹¹ ¿Aden comapenen tantiaquid icquimbidambi pete niamboed chuipadi? Padenquo. Pan bidiscamete pictsëc cabiunac pan abichobi nua bidisquiabimboecquid padiseyobobëdtan saduseyobon chiaid iquec —quepondash Esus.

¹² Aden chuisho tantiash aböd icquido nadpondash. —Pan chienquo icquimbi nuquin mat ses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbëdta saduseyobon chiaid tantienda,” quepecshenda niosh —quepondash Esusböd icquido.

*Nuquin Papan Mado mibi nec, quiaid
(Mad 8.27-30; Duc 9.18-21)*

¹³ Adash yuectaniash puduanec nidequien Esus nidaid utsi Sesadeya Uedipo caidën nidanepondash. Adshumbic abëd icquido chuimepondash. —Utsibon ¿tsutsi ëbi caosh? —caquien:

¹⁴ —“Uan pado acten mentoanondaidien nec,” mibi caosh. Utsimbic: “Edias cuëmëdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuëmëdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abëd icquidon.

¹⁵ Adsho tantiaishun Esusën: —Ma mimbibi. ¿tsutsi ëbi mimbibi cao? —caquien

¹⁶ Petedo Simon caidën: —“Quidistu caid Nuquin Papan chomiaidquio nec,” caombi mibi. Aton Madombo mibi nec —capondash.

¹⁷ Adsho tantiaishun Esusën: —Nuquin Papan aden tantiamiac mimbibi bëdamboen chioc, Petedo. Onasën mado Simon caid yec matsesien mibi nec. Adquid icquimbi matsesën tantiaid chienquio icquin Nuquin Papan tantiamiaidquio mimbibi abimbo chioc.

¹⁸ Tantia. Ëmbitsen mibi chuinu. “Cuënotebimboecquid nec,” quequin mibi Petedo cuë nondambi. “Cuënote dapa utsi ictiapimbo yac bimboec chieshtoenquio icquid iquendac,” qeshun mibia ëbi tantiaquido chuiquid dapambo icmendambi. Adec mimbibi namiaido ëbi tantiaquido iquendac. Satanasën aido: “Nëid yuanu. Utsibic chieshtomenu. Utsibic unës uamenu,” caqui abi ëbi tantiaquido iquendac.

¹⁹ Padnuc Nuquin Papan chiacpadomboen ëbi

tantiaquidon nate mimbi chiendac. Adembidi ëbi tantiaquidon natemaidtsen mimbi chiendac — quepondash Esus Petedo chiec.

²⁰ Adashic abëd icquido abitedi chuioaic: — “Nuquin Papan chomiaidquoio nec,” quequin ut-sibo ëbi chienda — quepondash Esus.

*Abi unës uate Esusën chiaid
(Mad 8.31-9.1; Duc 9.22-27)*

²¹ Adshumbic tauaquin abi unës uate chuidon-dash. —Shubu dadpen icquid Edusaden caid yacno nidendabi. Anoshon nuquin matsesën ëbi chieshënquiendac nëidtedshun. Nëidic tsusiobon. Nëidic nëish yua abided unës uaquido chuiquid dapabon. Nëidic Moisesën dada uampid chuibanquidon. Aidtedishun mëyanquoioquin ëbi unës uamendac. Adoacsho chococac daëdec ushash uin-cuenendabi —quequin chuisho

²² tantiashun Petedon uanotantsëcquin tsadumbudshun Esus chuipondash. —Unësquoio icnuc mimbi chieque. Aden chienda. Ma mibi unës uatiapimbo icpayoc —capondash Petedon.

²³ Adoquien Esusën: —Satanasën oncamiac Petedo adec onquec —queshun Petedo isquin Satanash chushcapondash naden. —Cuen, Satanash. Nuquin Papan chiaid mimbi ëbi niacmetiadquoio iqueque. Cuen —quetanec Petedobi chiec: — Matsesën tantiaid chuiquimbi Nuquin Papan tantiaidquoio mimbi chienquoio iccoc —capondash.

²⁴ Adashic abëd icquidotedi chuioaic: —Ëbi tantiaquidon aton nauidi nainquoio icquin ëmbi chiacpadomboen natsiash. Adsho chieshëmënquidon:

“Unës uachitomane,” cac chieshtoenquo icquin ëbi tantiatsiash. Adquid ëbi tantiaquidquo nec.

²⁵ Padnuen ëbi tantiatsëcquid: “Esus tantiasho unës uachitoshe,” quiash ëbi tantienquo yanec unësash Nuquin Papan cuidaidobëd nidendac. Padnuen chieshtoenquo icquin ëbi tantiaquid Nuquin Papa yacno tabadendac.

²⁶ ¿Nuquin Papa tantienquo yec tabadecta matses bëdambo icpatsiash? Abi bunaidtedi bedquin Nuquin Papa tantienquo yec unësash ¿mitsimbo tabadpatsiash? Nuquin Papabëd tabadte bunquin ¿atotsi menepatsiash? ¿Piuquid meniashta Nuquin Papa yacno tabadpatsiash? Padenquo. Adotiapimbo iquec. ¿Atoda meniantiapimbo iquec?

²⁷ Embien matses cuidte chiendac. Nuquin Papa yacnuësh ambi abi yacnoshon uaido mayan bëdabobëd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bëdamboec tabadquid Nuquin Papabëd tabadmequin Nuquin Papa tantienquo yec icsaquido icsano nidmendambi.

²⁸ Tantia. Chuinu. Utsi-utsiec unësabi icquin ëbi tantiaquido dadpen yansho mimbi isendac — quepondash Esus.

17

*Esus bëchamauanquiecsho isaid
(Mad 9.2-13; Duc 9.28-36)*

¹ Aden chiashtedec ushanec nidquimbi Esusën abëd icquido 3tedtsëqui buampondash. Petedo yec Acobo yec Acobon buchi Uan yec quetsëcnuc

buanash macuësh dapa dectatoash mananënquo tabadtuidpac caondash.

² Tabadtuidshun isquien Esus utsiacimboec isadpec. Aton dashcutebëdi aton bêtantete ushëbimboec bëchamauanquiec yanac caondash.

³ Esus bëchamauanquiec icnubien dada utsi daëd isadcuenash Esusbëd onquiampac caondash. Abentsëc Moises yampid icnubi utsi Edias Nuquin Papan ambi tantiaid oncamiampid icpac caondash.

⁴ Adsho isashien Petedo: —Mibi adec tabadsho isash bëdambo iquebi. Mibi nëmbobi tabadmenun abentsëc chotsecnuc shubumpi uatsëcnuna, Icbo. Mitsana natsëcquinc Moisesën na natsëcquinc Ediasën na natsëcquinc canuna. ¿Ada bëda icpec? —quenubi

⁵ abu ushu bëchamauanquiec icquidën isadenquo icnuc bêtimpac caondash. Adnubien abu ushu nënantanuëshquo Nuquin Papa onquiampac caondash. —Nëid con Madombo nec. Èmbi tantiaidquo yec èmbi bëdamboen isaidquo neque. Nëidquo tantiata —quec dacuëdampamboec onquenubien

⁶ uinte paëdtampamboec dacuëdtanec uebudcuededpac caondash Petedo chedo.

⁷ Adshobien Esusën camishquin: —Dacuëdenda. Nidto —cac

⁸ nidtoquin isquien Esus abentsëqui iquec.

⁹ Adtanec macuësh budequi Esus: —Mimbi isboed nëbi utsibo chienda. Unës uac ëbi uincuenacsho isun chianta —quepac caondash abëd icquido chiec.

¹⁰ Adsho tantiash Petedo chedo: —“Nuquin Papan chomiaidquo nec,” quequin nēbi mibi tantiemi. Mibi adquid icnuc ġmitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —queshobien

¹¹ Esusēn: —Abimbo chiosh. “Edias yampid bēyuc choshon: ‘Nuquin Papan chomiac bēdambo icquid choeque. Bēdamboec tabadta,’ quequin chiendac,” quequin abimbo chiosh.

¹² Adquid Ediasbimboecquid chondash. Choacsho tantienquo icquin matsesēn abi bunacpaden unēs uapac caondash. Adembidi Nuquin Papan chomiaid icsho ēbitsen chieshēnquin unēs uaindac —quesho tantiashien:

¹³ —“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

*Madompi dapuduedaid podobitsi icsa cuemiaid
(Mad 9.14-29; Duc 9.37-43)*

¹⁴ Bēchamauanquieic ictanec choequi abēd icquido utsibo yacno choquin matses dadpen aido dat-sidadacsho Esusēn istuidpondash. Adec Esus chosho isumbien unēsanetsēcquidēn papan Esus ismequin danēshēn sebudshun chuipondash.

¹⁵ —Con mado bēdamboen isquin bēdameta, Icho. Baded-badedquieic unēsanec cuēten pichiquianec. Adecbidi unēsanec acten mentoadtsenaccosh.

¹⁶ Mibēd icquidon bēdamete danquin bēuidombi. “Nē bēdame,” cac bēdamenuen tanuidosh.

Bëdamenquoio iccoshe. Mimbimbo bëdameta — caquien

¹⁷ Esusën ambo icquidotedi chuipondash. — Ëmbi nadatiambo icquin nabanquin ismiaqui mimbi ëbi tantienquoio iquec. Adsho isash chieshtoash cuentiadquoio icchitebi. Adtiadquoio yequi padenquoio iquec nebique. Min mado beccho —cac

¹⁸ bësho istanquin Esusën podobitsi icsa chushcapondash. —Padi. Daicsa uainda —cac podobitsi icsa cuenubi madompi bëdampondash.

¹⁹ Adsho isun abëd icquidon Esus chuipondash utsibo tantiamenquoio icquin. —Ëmbi: “Cuemenu,” cac ¿atotsi quiash podobitsi icsa cuenenquoio icposh? —caquien:

²⁰ —Nuquin Papa bëdamboen tantiaquin mimbi bëdamboen natsenoc. Mimbi bëdiactsëc tantiatsec. Pete ëshëmpi mostasa caid pistsëcquidi siac nua yec canitsiash. Adechidi Nuquin Papa tantiatsëcboedi: “Ambi natiapimbo ictequid nibëdec,” quequin abimbo tantiaquidquoio yanshun comapenen tantiaquidbimboec mibi ictsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Ëbi bëdamboen nameta, Papa,” quequin Nuquin Papa chianiac aidëmbi mimbi: “Ëmbi natiapimbo ictequid nec,” caid mibi bëdamboen nametsiash.

²¹ Nëbi ëmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

*Abi unëste Esusën chuioaid
(Mad 9.30-32; Duc 9.43-45)*

²² Adanec aton nidaid Cadidia yacnobi capu-cuenequimbi Esusën aböd icquido chuipondash. —Ëböd icquid abentsëcshun ëbi chieshënquido ëbi bedmendac.

²³ Bedshun ëbi unës uamendac. Aden unës uamiacsho chococaquini daëdec ushash uincuenendac —quesho tantiatanequien aböd icquido: — Unësquo icnuc chiec —quiash shubiantiadtsëcquo icpondash.

Chuiquid dapa menetequid piucquid Petedon istuidaid

²⁴ Aden chianec nidequi shubu dadpen icquid Capednaun caid yacno Èsus chopondash. Adnubien Nuquin Papa tabadte shubu uashunaid nacenemuequin piucquid bedquidon Petedo chuituidpac caondash. —Nuquin Papa tabadte shubu uashunaid nacenemuen ¿ada min icbon dos dada uatsaid piucquid shocoshëmpi abentsëc menepatsiash? —cac

²⁵ Petedo: —Ai, menetsiash —quepac caondash. Adanec nidec shubun puduedshobien Esusën ambia Petedo chuipondash. —¿Atotsi mimbi chie, Simon? Aton matsesën na nacenemuen ¿tsutsi chuiquid dapabon piucquid bedshumpec? ¿Ada aton matses piucquid bedshumpec? Aido bedshunenquo icquin ¿ada ambi bedaido aton yuabo piucquid bedshumpec? —caquien

²⁶ Petedo: —Ma aton yuabo bedshumpaid yoc. Aton matses piucquid bedshunenquo iquec —quesho tantiashien: —Adembidi aton Mado icsho aton shubu nacenemuen Nuquin Papan ëbi bedshuntiapimbo iquec.

²⁷ Aden tantiaquimbi: “Nëishnushe,” qeshun menenun nanuna. Chianën ansemetan. Tauaquin ansemaididi ancanshun anisquin 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumënquido menetanta. “Në con icbon nabëdi con na nec,” quequin menetanta — capondash Esusën. Adoac Petedon Esusën chiacpadomboen menetampac caondash.

18

¿Mitsicquid chuiquid dapa mimbi icmepatsia?

quequin chiaid

(Mad 9.33-37; Duc 9.46-48)

¹ Adshumbic abëd icquidon Esus chuipondash. —Abitedishun Icho icquin matses mimbi namendac. Èbi chedo caic ¿mitsicquid mibëdtan chuiquid dapa mimbi icmepatsia? —quesho

² tantiashun abi tabadacno nënantanquio bacuë tsaduntsëcshun Esusën chuipondash.

³ —Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuën amën chiacpadomboen nacbimboen ëbi tantiaquiota. Adash ambi namiaid yanash Nuquin Papa yacno mibi puduedendac.

⁴ Aden ëmbi chiacpadomboen naquidquio icsho mibi Nuquin Papan: “Bëdamboshë iquec,” caindac.

⁵ Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac —quepondash Esus.

Tantiabentsēcquido icsamete chiaid
(*Mad 9.42-48; Duc 17.1-2*)

⁶ Adshumbic padpiden chiec: —Ĕbi tantiabentsēcquid caic: “Nuquibi Nuquin Papan chiaid niac-niacquiec icsaquionona,” quequid Nuquin Papan cuidendac. Icsamiabi yec unēsacsho isun: “Bēdambo iquec,” catsiambi. “Cuēnote yuēmboshē icquid tēdectanshun acte nēnepatecnēdan,” caimbi icsamiente bunquidquio.

⁷ Aden ěbi tantiatsēcquid utsibon icsamendac. Adec icsamianquid Nuquin Papan cuidendac.

⁸ Aden Nuquin Papan cuidte chuisho tantiequi icsainda. Mēdanten naic mibi icsaic. Mēteshuniac bedtiapimbo yac bimboec icsainquio yec ěnēdta. Taēn capuec mibi icsaic. Tateshuniac caputiapimbo yac bimboec icsainquio yec ěnēdta. Ĕnēdenquio icsho Nuquin Papan mibi cuidendac.

⁹ Adecbidi ěshēn isec mibi icsate bunquiec. Ĕshē chicshuniac bimboec icsainquio yec ěnēdacsho: “Bēdambo iquec,” catsiambi. Ĕnēdenquio icsho Nuquin Papan chian anēdēnquiaco nēsecaindac —quequin Ĕsusēn chuipondash.

Matses ěbi tantiamete Nuquin Papa bunaid
(*Duc 15.3-7*)

¹⁰ Adashic padpidec: —Nadquid bacuēmpin ěbi tantiatsēcsho isun: “¿Adtsēcquidēmpinquiobida bēdamboen tantiapec?” cainda. Nuquin Papan abi yacnoshon uaid mayan bēda aid bacuēbo dayun uaquid icquin Nuquin Papa yacno puduedshun mimbi mamēnshumboed Nuquin Papa chui-nushe. Adtsēcquidēmpi mamēnshunenda. Ĕbi tantiabentsēcquido con Pan tantiaqueque.

11 Ĕmbitsen aido tantiembi. “Bĕnudaid istuidachimboen ĕbi tantienquo icquidobi ĕbi tantiaquido icmenu,” quiash matsesondabi – quepondash Esus.

12 Adashic padpidec: –ĵMitsipadquo nuquin matses icpec? Nĕish yua obeca dadpen 100ted dayun uaquidĕn aton yua tambanac abentsĕc nibĕdsho istanquin utsitedi nianshun aid abentsĕc nibĕnbenequin istuidquid.

13 Aden istuidash comapenec cuishonquequid: “Con yua nibĕdantsenquiac,” quiash. Aton yua utsi yacno bĕash abi icboctedi icsho isash bĕdambo icquid. Adecbidi matsesĕn ĕbi tantiabensho isash Nuquin Papabĕd cuishonquebi bĕnudaid istuidachimboec.

14 Icsaido cuidacno matses nidmete Nuquin Papa bunenquo iquec. Matses bĕdamboen isquin abĕd tabadmeme Nuquin Papa bunquiec – quepondash Esus.

*Chieshĕnquidobĕdi onquete chiaid
(Duc 17.3)*

15 Adashic padpidec: –ĵAda ĕbi tantiaquid utsin mibi icsa uaosh? “Ai, icsa uaoshi. Chieshĕmiantiadquo icchitosh,” qeshun nadoac bĕdambo ictsiash. Aid abentsĕqui chuiquin aidbĕd bĕdamboec onquequin: “Ĕbi icsa uaqun Nuquin Papan chiaid mimbi niac-niaccoc. Ade icsainquo yec ĕnĕdta,” mimbi cac: “Ai, adebi,” quiash mibĕdi bĕdamboec tabadtsiash Nuquin Papa tantiesabimboec icuidboedi.

16 Mimbi: “Icsainquo yec ĕnĕdta,” caqui: “Padi. Adequi icsaibi,” qesho tantiashun ĕbi tantiaquid utsi beduanshun aidbĕdtan chuitanta. “Nuquin

Papan chiaid niac-niacsho isun daëdshun chiaid abimbo chiaid nec,” quequin chiaid tantiaquin adota.

¹⁷ Mimbi buanaidëntsen: “Adec icsainda,” caqui: “Adequi icsaibi,” qesho tantiatanec choashun mibëdtan ëbi tantiec iccuededquido chuiquido chuituidta. “Mimbitsen chuitanta,” cac aidontsen chiaqui tantienquio icsho isun: “Nuquin Papan chiaid niac-niacquid yec Esus tantiesabimboecquid nec,” qeshun ëbi tantiaquido cuëdënacno chomenda.

¹⁸ Aden mimbi: “Esus tantiesabimboecquid neque. Cuëdënacno chomenquio ictiad,” casho Nuquin Papan: “Bëdamboen naic,” mibi catsiash. Adembidi mimbi: “Adec icsaboedi icsainquio yec ënëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

¹⁹ Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiaishun aïdbëdtan mimbi Nuquin Papa chianiac mimbi chiacpadomboen Nuquin Papan natsiash.

²⁰ Ëbi tantiec daëd tabadnuc aïdbëd con Mayan yec ëbëd yacimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

Yuan bëdamboen istiapimbo yaid

²¹ Adec: —Icsa uanec chieshtomiantiadquio iquec —Esus qesho tantiaishumbien Petedon Esus chuipondash. —¿Icsa uanec chieshtomianquid tedentsimbi chieshenquio icquin bëdamboen ispe? Chieshënquin padpiden icsa uac ¿padpidendambi bëdamboen isoape?

¿Médante utsiuc daéd tauadoquin sietetedembi nashun padpiden bédamboen isenquoio icquin ènacta bédambo icpatsiash? —caquien

²² Esusèn: —“Médante utsiuc daéd tauadoec sietetedi” quequin daédpactsécquoio mimbi chuipec. 70 por 7 caid ¿tedtsi icpec? Aideden 490tedembi ènenquoio icquin bédamboen isoadoniac bédambo ictsiash —quepondash Esus.

²³ Adashic abi onquec: —Nuquin Papan chiacpadomboen matses bédamboen iste mibi chuinu. Tántia. Tsusion yuabo dadpen icpac caondash. “Ma bënu,” quequin ambi meniactedi piucquid bednuen aton yuabo aton shubuno chomepac caondash.

²⁴ Abia chomiaidèn piucquid dadpenquioshè bedshun aton icbo meniambo icpac caondash.

²⁵ Adsho icbon: “Mimbi bedactedi beccho,” cac: “Nibèdec,” quepac caondash yua. Adshobien icbon: “Aidedi piucquid bednuen matses utsibo mibi yuamenu. Min chido min bacuëbobèdtabi cuësh-cuëshèdmeshun aidedi piucquid bednu. Mibi icsambo iqueque,” cac

²⁶ yua abi yuaquid ismequin danëshèn sebudash: “Padi. Èbi yuamenuen cuësh-cuëshèdmenda. Chiata. Yuecshun aidedi bedshun mibi menenun nanu,” capac caondash.

²⁷ Adoaquien icbon bédamboen isquin: “Padi. Èbi menenda. Mibi utsibo yuamenuenquio iquembique. Dacuëndenda. Nidec nid,” quequin icbon aton yua bédamboen nidmepac caondash.

²⁸ Adoac nidquimbien aid yuan icbon bédamboen isboedèn ambi: “Ma bënu,” quequin piucquid daédpactséc meniaid yua utsi istuidpac

caondash. Istuidshumbic bedtanquin têtëdinquin: “Mimbi bedactedi piucquid beccho. Ünës uachitomane,” caquien

²⁹ aidtsen ambi piucquid bedshunondaid ismenuen danëshën sebudtsec: “Chiata. Ębi ünës uainda. Yucshun bedshun mibi menenun nanu. Chiata,” quepac caondash yua utsi.

³⁰ Adsho tantiashun icbon bēdamboen isboedēmbi chieshēnquin: “Padi. Mibi cuidmembi,” qeshun quēnēn nauedmepac caondash. “Piucquid aidted abi menianenquio yacpadequi ma quēnēnuësh mēyadbudchitono,” qeshun nauedmiac caondash.

³¹ Aden chieshēnquin quēnēn nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bēdamboen isboedēmbi min yua utsi quēnēn nauedmiac: ‘Piucquid menianenquio iquec,’ qeshun,” quequin icbo chuipac caondash.

³² Adsho tantiashun icbon ambi cuidenquio icquin bēdamboen isboed chomeshun chushcapac caondash. “Icsambo icquidquio mibi nec. ‘Chiata. Mibi menenun nanu,’ mibi qesho: ‘Padi. Ębi menenda,’ quequin mibi bēdamboen isombi.

³³ Ęmbi mibi adobocpadomboen utsi bēdamboen istiapimboda icco? ‘Ma bēnu,’ qeshun mimbi meniactedi bēabi icsho bēdamboen isec mibitsen bēdambo ictsenac. Mibi yacpadeq nēishun mibi cuidembi,” quepac caondash icbo.

³⁴ Adshun quēnēn nauedmepac caondash. “Ambi bedactedi piucquid dadpenquio meniash ma puduempānu,” qeshun quēnēn nauedmiac caondash.

³⁵ Aden matses yuan icbon nacpadomboen Nuquin Papan naindac. Utsibon chieshënaqui chieshënansho Nuquin Papan mibi bëdamboen istiapimbo iqueque. Chieshënanenda. Mibi chieshënquidobi bëdamboen ista —quepondash Esus.

19

Chidobëd cuëshëdte Esusën chiaid (Mad 10.1-12; Duc 16.18)

¹ Adanec nidaid cuëshë Cadidia caid yacnuësh puđuanec nidec nidaid cuëshë utsi Udeya caidën nidquin acte Odan caid potebidanec Esus nidpondash.

² Adec nidshobien matses dadpenshun tsibanampondash. Abi tsibanansho isun nidtuidshun daicsaidtedi Esusën bëdamepondash.

³ Adnubien tsusedpabon chiampid namequido padiseyobon chieshënquin: —Nuquin Papan chiaid niacmenu —quequin Esus chuituidpondash. —¿Atotsi mimbi chuipe? Dada uashun aton chidobi nidmete ¿mitsipaden mimbi chuipe? En chui. Tantanu —capondash.

⁴ Adoaquien Esus: —¿Nuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc.

⁵ Adembidi: “Dadan canite chido uaid icsho dadan aton chido bedquid. Amë chedobëd icboedi aton chido bedash aid nianenquio yec aïdbëd tantananquiec dada aton chidobëd abentsëc yacbimboec tabadquid,” quequin dada uaid ma mimbi ispaboc.

⁶ Aden Nuquin Papan tantiacpadomboen aton chido nianenquo yec aidbēdi tantiananquiec abentsēc yachimboec tabadac bēdambo ictsiash. Padnuen aton chido nianec aidbēdi cuēshēdquin Nuquin Papan chiaid niactsiash. Adecbidi chido aton bēnē nianec icsaquid —Esus quesho

⁷ tantiashumbien abi chieshēnquidon: — ¿Abimboda mimbi capadi? Nuquin Papan chiaid dada uaquin ¿atotsieshun Moisesēn naden chuipampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nīdmequid,” quequin Moisesēn dada uapampid ma icpayoc —quequin chuipondash Esus chieshēnquidon.

⁸ Adsho tantiashun Esusēn chuipondash. — Ai, Nuquin Papan chiacpadec aton chidobēd bēdamboec tabadtiapimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chiambo icpampic.

⁹ Tantia. Mibi chuinu. Aton chidobēd cuēshēdshun chido utsi bedquin Nuquin Papan chiaid niactsiash. Padnuen aton chidon bēnēpenquo chudmesho istuidash aidbēd cuēshēdquin Nuquin Papan chiaid niaquenquo ictsiash —quepondash Esus.

¹⁰ Adnubien abēd icquidon: —Adotiapimbo icte mimbi chuipēc. Aton chidobēd cuēshēdenquo icte mimbi chuisho tantiashun: “Aton chido bedesambo dada bēdambo ictsiash,” caimbi —quepondash abēd icquido.

¹¹ Adsho tantiash Esus: —Ai, utsi-utsiec pabiate

shëcuë nibëdabimboen ëmbi chiaid tantiatiapimbo iquec. Utsiboen aton chido bedash Nuquin Papan chiacpadec bëdamboec tabadquid nec.

¹² Utsibic mimbi chiacpadquid chido bedesa iquec. Nëidtedi chido bedesa iquec. Nëidic aton padibi impadishtsaid. Nëidic matsesën inicsa uaid. Nëidic: “Nuquin Papan yuambo icquin aidën chiacpadomboenuidi naquin chido bedtiapimbo iquebi,” qeshun chido bedesa. Adquidtedi chido bedesa nec. Ëmbi chuiboed tantiashun ëmbi chiacpadomboen nac bëdambo ictsiash —quepondash Esus.

*Esusën bacuëbo chiaid
(Mad 10.13-16; Duc 18.15-17)*

¹³ Adnubien Esus ismenuen bacuëbo bëbëpondash. —Mamishquin ma Nuquin Papa Esusën chuinu —quequin bë-bësho isumbimbi: —Padi. Bëenda —cauidpondac.

¹⁴ Adshobini Esusën: —Chën. Ma bënu. Cuemenda. Bacuëbimboecquid Nuquin Papa yacno puduedtequid nec. Amën chuisho tantiash bacuë badedi: “Abimbo caic,” quiacbimboen ëbi tantiaquid Nuquin Papa yacno puduedtequid nec. Bacuëbo bëdambo iqueque. Beccho —cac bëbëpondash.

¹⁵ Adshobien mamishbanquin Nuquin Papa chuipondash. Adobidanec nidondash Esus.

Cania aton na dadpenquio dayun uaquid Esusbëd onquiaid

(Mad 10.17-31; Duc 18.18-30)

¹⁶ Adnubien dada caniampinquo Esus chuituidpondash. —Mibi bëdambo iquec. Bëdamboen

chuiquidquo mibi neque. Ēbi chui. Padpidec unēstiapimbo icquid icmenun bēdambo icquid Nuquin Papan abi yacno puduedmetsiash. ¿Atotsi nasho Nuquin Papan ēbi bēdambo capatsiash? —caquien

¹⁷ Esusën: —¿Mitsipadquid bēdambo icquid cai? Nuquin Papauidtsēqui bēdambo icquid nec. Aidbēd tabadnuen ambi Moises dada uamiampictedi nata —capondash.

¹⁸ Adoaquien cania: —Nuquin Papan chiaid ¿mitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquo chudenda. Min bēnēpenquo chudmenda. Ampenda. Muainda.

¹⁹ Titabēdta papa chieshēnenquo icquin bēdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi —capondash Esusën.

²⁰ Adsho tantiash cania: —Aidtedi niaquenquo icquin nabanquidquo nebi. Bacuētsēc icquimbi tauaondambi. “Nuquin Papabēd tabadnuen ¿atotsimbi utsi nape?” caimbi —quepondash.

²¹ Adsho tantiashumbien Esusën: —Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibēdquido min piucquid uesquin menebanta. Adsho abēd tabadmenun Nuquin Papan mibi bēdamboen istsiashe. Adota. Adotanequic ebēd iquec cho —caquien

²² cania: —Con na dadpenquo icsho uesquin menetiapimbo iquebi —quiash

shubiantiadtsēcquo ictanec nidpondash Esusën chiacpadomboen natiapimbo yec.

²³ Adsho isun Esusën abëd icquido chuipondash. —Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedëmbi ëbi tantiatiapimbo iquec. Aton nauidtsëqui tantiec.

²⁴ ¿Ada nëishamën pinchuc chichte ancumpadic? Padenquo. Adecbidi aton na dadpenquo dayun uaquidën aton nauidtsëqui tantiaquin ëmbi chiacpadomboen natiapimbo yec Nuquin Papa yacno tabadtiapimbo iquendac —quequin Esusën chuipondash.

²⁵ Adec: —¿Ada nëishamën pinchuc chichte ancumpadic? —quesho tantiashien abëd icquido nadpondash. —¿Tsudain Nuquin Papa yacno puduedtequid icchitotsiash? Nibëdchitequien iquec —quesho tantiashumbien

²⁶ Esusën abëd icquido bëisquin naden chuipondash. —Matses namiantiapimbo icnuc Nuquin Papan namianquidquo nec. Ambi natiapimbo ictequid nibëdec —quepondash.

²⁷ Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibëd icnuec chopondabi. ¿Mitsimbo tabadtequidini nepe? ¿Atotsimbi nape? —caquien

²⁸ Esusën: —Tantia. Mibi chuinu. Nuquin Papan ambi uaid abitedi chuca uabocnoëshquo ëbëdtan chuiquid mibitedi iquendac ëmbi abitedi namiacnuëshquo. Èbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun

tsyuecquidon shubu 12tedi shubun-shubunquiec chuiquid dapabo mibitedi iquendac.

²⁹ Utsibontsen ëbi tantiendac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc cain ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadachimboec-nuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio icnuc.

³⁰ Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquio iquendac. Utsibic nëuëshquio chuiquidpenquio icboedi Nuquin Papa yacnoshon: “Bëdambo icquid nec,” quequin chuiquid dapa icmendac –quepondash Esus.

20

Chonoadquido chiaid

¹ Adshumbic abëd icquido Esusën ompoacbimboen chuipondash. –Tantia. Ëbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash.

² Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash.

³ Ushë abucquio yanubi tied icbon pete meni-acno nidshun utsibo nainquio yec samëdsho istuidpac caondash.

4 Adoshombic aidotsen chuiquin: “Con tied neshcaic cho. Mibi bēdamboen cuidquin menenu,” cac

5 tied neshcaic nidpac caondash. Ushē cuembo icnubi tied icbon padpidec pete meniagno nidoashun utsitsen istuidshun adembidi aton tied neshcamepac caondash. Ushē budambic padpiden utsitsen.

6 Inchēshbudtsēqui nidoaquin utsibo nainquio yec samēdsho istuidoashun: “¿Atotsi quiash samēduidequi ique?” cac

7 samēdquido: “Chonoa uanquid nibēdosh,” quesho tantiashun tied icbon: “Mimbitsen con tied neshcaic cho. Mibi menenu,” cac tied neshcaic nidaneoapac caondash inchēshbudtsēqui neshcaquin tauaic.

8 Inchēshtsēcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushē budambi choboedotsen meneta. Adoshombic ushē cuembo icnuc choboedotsen. Adoshombic ushē abuctoan choboedotsen. Adoshombic badiadnubi abia choboedo ēnquimbi meneta,” cac menequin tauapac caondash.

9 Inchēshbudtsēqui chonoadec choboedoba menequin badiadnuc chonoadec taēboed tied icbon: “Menenu,” cactedquio piucquid menepac caondash.

10 Adosho isashien badiadnubi choboedo: “Aido aden meneshun nuqui chonoadquioboed yua-pambo nuqui menec,” queshobi aidtedtsēcbidi piucquid menepac caondash.

11 Aidedtedsëcbidi meniaquien tied icbo chushcapac caondash.

12 “Tsyuec chonoadboed meniactedtsëcbidi menioshi. Icsambo iquec. Inchëshbudtsëqui chotsash daëdpactsëc chonoadtsëcquid meniactedtsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidedtedsëc menianec mibi chieshanquieci iquec. Èbi dadpen meniac bëdambo ictsiash,” quequin chushcapac caondash.

13 Adoaquien tied icbon: “¿Chieshanquiectabi ique? Èmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidedtedquio menepaboc.

14 Mimbi bedboed buanec nid. Èbi bunacpaden tsyuec choash chonoadquid mibi meniactedquio mibi meniombi. ¿Icsamboda iquec?

15 ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi èbi nëishëmpe? Aden nëishënac ¿ada bëdambo iquec?” quequin tied icbon chuipac caondash —quequin ompoacbomboen chuipondash Esusën.

16 Adashic: —Adembidi abi yacnoshon ambi tantiacpadomboen Nuquin Papan naindac. Utsiutsien chuiquid dapa icmequin utsi-utsien padenquio icmendac —quequin chuipondash Esusën.

*Abi unëste Esusën padpiden chuioaid
(Mad 10.32-34; Duc 18.31-34)*

17 Adanec: —Edusaden yacno nidnu. Nid —quianec Esus nidpondash. Adec nidquimbi utsibo

tantiemenquo icquin abéd icquido 12tedi icquid chuinen uanotantsëcquin buampondashi.

¹⁸ Buanshun chuipondashi naden: —Edusaden yacno nidacsho Nuquin Papan matsesmiaid icsho ëbi chieshënquido ëbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon ëbi bedshun: “Ma unës uamenu,” qeshun

¹⁹ matses utsibo isadaidpembo ëbi bedmendac. Aden bedmiac matses utsibon mamënsnunquin ëbi cueshcaten comapenen cueshcaindac. Adshumbic ëbi unës uanuen cuesten dectanendac. Aden unës uaqui daëdec ushash uincuenendabi —quequin Èsusën abi unës uate padpiden chuiopondashi.

*Uanën titan chiaid
(Mad 10.35-45)*

²⁰ Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Ëmbi chiacpadomboen ëbi nashunta, Icbo —caquien:

²¹ —¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën:

²² —Ëmbi naid tantienquo icquin mimbi chuipec —quequin ani chuishumbic Uanbëdta Acobo Esusën chuipondash. — ¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai,

chieshtoenquo ictsiabi. Mibëd mëyadtsiabi — quepondash.

²³ Adsho tantiashien: —Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquec. Nuquin Papambien ambi tantiacpadomboen ëbëdtan chuiquid dapa icmendac —quequin Esusën chuipondash.

²⁴ Adnubimbi: —Chuiquid dapa ëbi icme —Esus casho tantiashun Uan chedo nëishëmpondac.

²⁵ Adsho Esusën ëbitedi chuipondash. — ¿Mitsipadquid matses utsibo isadaidpembo chuiquid dapa icpec? Abi chuiquid dapan badedbadedquien ancabudac dacuëdquin aton yuabon badedi naic.

²⁶ Èbi tantiaquido icquin mimbi adoenquo iquendac. “Bëdambo mibi iquec,” Nuquin Papa cametiadquo icquin utsibo tantiaquin mimbi utsibo nashuntsiac.

²⁷ Bëdambo icquid ictiadquo icquin yuan aton icbo nashunacimboen mimbi utsibo nashuntsiac.

²⁸ Adembidi Nuquin Papan matsesmiaid icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ëbided cuidadec unësendabi —quequin Èsusën abëd icquido chuipondash.

*Bëshuaid daëd Esusën bëdamiaid
(Mad 10.46-52; Duc 18.35-43)*

²⁹ Adashic yuecquo ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpenshun Esus tsibanampondash.

³⁰ Adnubien aid podqued cuëman bëshuaid dada daëd tsadpondash. —Esus cuenec —quesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquio icquin ëbi bëdamboen ista, Icbo —quepondash Esus caic.

³¹ Adsho tantiashun matses dadpenshun chushcapondash. —Padi. Chën. Adec cuëdec chieshanquieci mibi iqueque —caquien abi niacbidanec buëdanquieci cuëdpondash. —Tsusedpa Dabidën tsyuecquid Nuquin Papan namiaidquio icquin ëbi bëdamboen ista, Icbo —queoapondash.

³² Adoquien Esusën nidtuidshun ëcbedpondash. —¿Atotsi chuinec ne? —caquien:

³³ —Isbente bunquiebi, Icbo —quepondash.

³⁴ Adsho tantiash: —Unësquio iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdashun aidëntsen Esus tsibanampondash bëshuacboedëmbi.

Edusaden yacnoshon chuiquid dapabimboec-nuc Esus bëdamboen isaïd

21

Edusaden yacnoshon chuiquid dapabimboec-nuc Esus bëdamboen isaïd

(Mad 11.1-11; Duc 19.28-40; Uan 12.12-19)

¹ Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash.

² —Nëid podquedën nidquin shubu daëdpactsëc yacno nidshun cabayobitsecquid aton bacuë caniatsebëdta mimbi badedquio istuidendac. Istuidshun tënëshaid tēdiadsho tēchicta.

³ Mimbi tēchicsho isquidën: —¿Atotsi acnun nai? —cac: —Nuquin Icbo: “ ‘Bedtan,’ quiosh,” mimbi cac: “Ai, buantan,” quendac —quequin Esusën chuipondash.

⁴ Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

⁵ “Shubu dadpen icquid Sion caidën tabadquido chui. Edusaden cain Sion capec.

‘Is. Mibi chuiquid dapa cabayobitsecquidën bacuë caniatsec catsadtoash choeque. Ancanenquio yec bēdamboshē icquidquio neque. Is,’ quequin chui,”

quequin dada uapampic.

⁶ Aden dada uampicpadomboen ambi: —Bedtan —caidon bedtampondash.

⁷ Adotanquin cabayobitsecquid anibēdta caniatsec bēacshobimbi con dashcute bēntse dasiuidboed chictanquin casanondac. Aden ěmbi cabayobitsecquid casansho isash caniatseqüën Esus catsadtopondash.

⁸ Adanec nidsho istanquin matses dadpenshun aton dashcute abi dasiuidaid bēntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —queshun.

⁹ Matses dadpen bēyuc nidnubi aitedbidi tsyuec nidpondash. Abitedi cuēdēnidpondash.

“Adeduya. Nuquin tsusedpa Dabidën tsyuecquid
Nuquin Papan namiaid yec mibi
bëdamboshë iquec.

Nuquin Papan chomiaid yec mibi bëdamboshë
iquec.

Mibi chomequid Nuquin Papatsen bëdamboshë
iquec. Adeduya,”
quec cuëdëncuededpondash.

¹⁰ Adec Edusaden yacno matses dadpenquo
cuëdënidec nidsho isashien Edusaden
yacnocquido: —¿Tsutsi tantiec cuëdëncuededpec?
—quepondash.

¹¹ Adsho tantiashun Esusbëd nidquido: —
Esusquio tantiec nec. Nuquin nidaid cuëshë
Cadidia caidën shubu dadpen icquid Nasaded caid
yacnuësh caniondaid Nuquin Papan chiaidquio
chuiquid Esus tantiec nec —quepondash.

Esusën chushcaquin cuemiaid

(Mad 11.15-19; Duc 19.45-48; Uan 2.13-22)

¹² Edusaden yacno choash Nuquin Papa tabadte
shubu uashunaid umanuc daquënë uabenaidën
Esus puduedpondash nuntanquio puduedenquio
yec. Adshun isquien piucquid bednuequido dad-
pen tabadpec. Utsi-utsiec nidaid utsin icquido
piucquid dadpen bedshunquimbi muaquin pi-
ucquid utsi daëdpactsëc menequid icnubi utsi-
utsiec: —Nëid bedquidën: “Ma Nuquin Papan
ëbi bëdamboen isnu,” queshun pichicametsiash —
quequin aton nëish yua menequin piucquid dad-
penquio bedquid nepondash. Adsho istanquin

Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin.

¹³ —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,”

quequin Nuquin Papan chiacpadomboen aton shubun puduedshun aid chianetiadquidi mimbi adoenuio iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

¹⁴ Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bëdamepondash.

¹⁵ Adsho isashien Esus chieshënquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec —quec Esus caic cuëdëncuededsho tantiash nëishquiopondash.

¹⁶ Adshumbic: —Icsambo iquec —queshun Esus chuituidec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuipampic. “Nuquin Papan oncamiac bacuëmpin aton bacuë utsibëdtan:

‘Nuquin Papa bēdambo iquec,’ caindac.”
quequin chuipampic —quepondash Esus.

¹⁷ Adanec nidec shubu dadpen icquid Betania
yacno nidash ushtuidpondash.

*Esusēn cuēte unēs uaid
(Mad 11.12-14, 20-26)*

¹⁸ Badiadnubi ēnden aucbidi nidoaic Edusaden
yacnobidi nidoapondash. Piabi nidec bundoshon

¹⁹ podqued cuēman nidquid cuētempi icueda
caid istuidash: —¿Ada bacuēaye? Chenun isbono —
quepondash Esus. Adshun isquien bacuē nibēdec.
Podouidquio icpec. Adsho isumbien Esusēn:
—Adequi bacuēesambo yec unēsta —capondash.
Adoac badedquio unēspondash.

²⁰ Adosho isun abēd icquidon: —¿Atotsi quiash
badedquio unēsposh? —caquien

²¹ Esusēn: —Tantia. Mibi chuinu. Adem-
bidi mimbi natsiac. “Nuquin Papan ambi chiaid
nainquien icchitec,” quenquio icquin: “Nuquin
Papan ambi chiacpadomboen naquidquio nec,”
queshun mimbi Nuquin Papa chianesho aidēmbi
mimbi: “Natiapimbo iquec,” caidi mibi nametsi-
ash. Aden tantiaquin mimbi nēid macuēsh cain:
“Mananuc tabadboedi adquiecbidi acte nantan
tabadoata,” mimbi cac nēid macuēsh acte nantan
tabadoatsiash.

²² “Ambi chiacpadomboen naquidquio Nuquin
Papa nec,” queshun mimbi aid chianiac mimbi
chiaid Nuquin Papan mibi nashuntsiash —
quequin Esusēn abēd icquido chuipondash.

*¿Tsuntsin: Naic nid, cac nai? quequin Esus
chuimiaid
(Mad 11.27-33; Duc 20.1-8)*

²³ Adcuidanec Edusaden yacno padpidec nidshun Nuquin Papa tabadte shubu uashunaid daquënë uaidën puduedshun Esusën Nuquin Papan chiaid chuipondash. Adsho tantiashun con matses tsusiobon Esus chieshënquidon chuituidpondash. —¿Tsuntsin: “Naic nid,” cac nai? En chui. Tiantianu —caquien

²⁴ Esusën: —En mimbia chui. Ĕmbia tiantianu. Mimbi chuisho tantiashun ěbi namequidtsen chuinu.

²⁵ ¿Tsuntsin namiac Uan padon acten mentopadenec? ¿Ambembida napadenec? —capondash Esusën. Adoaquien badedquio chienquio yec uanotantsec tabadec onquecuededpondash Esus chieshënquido. —¿Atotsi nuqui chuipeba? “Nuquin Papan namiaidquio Uan pado nepadenec,” cac Esusën: “¿Atotsieshun aidën chiacpadomboen nainquio ique?” canushe. Aden chienquien ictiad.

²⁶ Nuqui: “Ambembi napondash,” qesho tantiashun nĕmbo icquidon nĕishĕnushe: “Nuquin Papan namiaid Uan pado niondash,” qeshun. Aden chienquien ictiad —quepac caondash Esus chieshënquido. Isadaidbo tsusiobobĕdi nĕish abided unĕs uaquido chuiquid dapabo adpac caondash.

²⁷ Adashien Esus padpiden chuioaic: —Tsaudi. ¿Tsundan chiaquien nachitondash? —qeshobien: —Mimbi chienquio icsho tantiashun ěmbitsen ěbi namequid chienquio iquembi —capondash Esusën abi chieshënquido cuidquin chuiquin.

Mado daĕdshun nacbimboecquido chiaid

28 Adshumbic Esusën padpiden chuipondash. —Tantia. Mibi chuinu. Ĕmbi chiaid tantiashun ¿mitsicquid: “Bëdambo iquec,” catsia? Dada aton mado daëdpambo icquid icpac caondash. Abentsëc chuiquin: “Neshcaic nid, mado,” cac:

29 “Padi,” quec chieshuidboedi yuec-yuecpactsëctanec: “Tiedimbi neshcatanchitec,” quiash neshcaic nidac caondash.

30 Adshumbic amën aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquo icpac caondash.

31 ¿Mitsicquidën aton papan chiacpadomboen napac caondash? En chui. Tantiyanu —caquien Esus chieshënquido: —Abia chiac chieshuidboedën —quesho tantiashumbien Esusën: —Adquidpenquien mibi nec. Mibi tantiatiapimbo yec tabadnubi mimbi icsambo caido Nuquin Papa yacno puduedendac. Chieshuidacbimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abëd tabadtequido yanendac. Mibien padenquo iquec.

32 Uan pado acten mentoandenedën Nuquin Papan chiaid chuiquin bëdamboec tabadte chuipadenec. Adsho mimbi tantienquo icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ëntiadquidi mimbi ënenquo iccondac. Aton papan chiaid niacquidbimboecquid mibi nec —quepondash Esus abi chieshënquido chiec.

*Abi chieshënquido icsaid Esusën chuioaid
(Mad 12.1-12; Duc 20.9-19)*

³³ Adshumbic Esusën abi chieshënquido om-poacbimboen chuipondash naden. —Tied icbon chetequid nidtsinac caondash. Adoshombic aid tied daquënë uatanquimbic chetequid chintetsen nacnempac caondash. Adoshombic: “Ampequid chosho isnu,” qeshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi nesh-cashunta,” utsibo canec ënapen nidpac caondash.

³⁴ Adash yuectaneshumbien abëd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash.

³⁵ Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash.

³⁶ Aden cuemiaid choshon chuituidaquien icbon nidboedtedpenquïo dadpenquïo aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

³⁷ Adoacsho tantiash aton madombo caic: “Bedtan,” quepac caondash. “Con mado cuesunenquïo icquin ëmbi chetequid menetsiash,” qeshun aton madotsen nidmepac caondash

³⁸ Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiashe,” qeshun

³⁹ tied tsitsuno buanshun cuesunepac caondash —quequin Esusën chuipondash.

⁴⁰ Adshumbic ambi chuiboedquio abi datsidadquido chuimenuen chuipondash. —Ëmbi chui-boed tantiash ¿atotsi mibi quepatsia? “Min mado cuesuniaccosh,” cac ¿atotsi tied icbon napatsiash? —quesho

⁴¹ tantiash datsidadquido: —Aido icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcametsiash —quecuededpondash datsidadquido.

⁴² Adsho tantiashun Esusën: —Ai, abimbo caic. Adembidi ambi chomiaid chieshënsho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispaboc.

“Buintad bëdambo icquid istuidashi: ‘Nëidquio shubu uanun nitsinembi,’ quetiadquidi isuidacimboen Nuquin Papan namiaid chieshënac.

Aden buintad isuidaidsin utsin bedshun shubu uanun nitsinacimboen Nuquin Papan tantiamiacpadomboen utsibon ambi namiaid tantiosh.

Adsho isun: ‘Nuquin Papan namiaid bëdambo iquec,’ caimbi,”

quequin dada uapampic.

⁴³ Aden ambi namiaid ëbi chieshënsho isash mibi caic Nuquin Papa nadpec. “Ëmbi con matses caid isadaidbo ëbi bëdamboen tantiametiadquidi chuiquid dapabon namenquio icsho isun utsibotsen: ‘Ëbi chuiquid icta,’ caindami,” quepec Nuquin

Papa. Aden ambi chiacpadquidën bëdamboen chuibanac abi tantiaquido dadpen yanendac.

⁴⁴ Mibien Nuquin Papan cuidtequido nec. Cuëte uebudquin catashac canite uesadec podquëd-podquëdadbimboecnuc mibi comapenen cuidendac —quepondash Esus abi chieshënquido chiec.

⁴⁵ Adsho tantiashun padiseyobobëdtan nëish abided unës uaquido chuiquid dapabon: —Nuquien cachitec —quequin tantiabempanëdash.

⁴⁶ Adshumbic Esus cuesunemenuen bedtiadquio icquimbi bedenquio icpanëdash. —Abi datsidadquidon: “Nuquin Papan chiaid chuibanquidquio Esus nec,” qeshun Esus bedsho isun nuqui cuesnushe —qeshun aton matses dacuëdënquin bedenquio icpanëdash.

22

Cacuidanaid chiaid (Duc 14.15-24)

¹ Adshumbic Esusën padpiden ompoacbim-boembidi chuipondash naden.

² —Tantia. Isadaidbon nacpadomboen aton mado chido bednuesho tantiashun amën matses dadpen: “Pec cho,” cauidaïd mibi chuïnu.

³ Chuiquid dapan aton yuabo chuïquin: “‘Con icbon madon chido bedequë. Aidbëd cuishon-quenuen pec cho,’ quequin ëmbi tantiaïdotedi chuitan,” cac yuabon chuitanaqui choenquio ic-pac caondash.

⁴ Adsho isumbien chuiquid dapan aton yua ut-sibo chuïquin: “Nëish nua bëchichoquidquio dadpen codoquiaccoshe. Padpiden chuitan,” cac chuitanoaqui

5 choenquiobidi icpac caondash. Adec cacuidanquiec abentsëc aton tied nantan nidnubi utsi piucquid bednuequin ambi aton na menebante shubuno nidpac caondash.

6 Utsimbic abi: “Pec cho,” cashobi yuabo mëyanquin cuesun secapac caondash.

7 Adoshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nêdëncapac caondash.

8 Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan.

9 Ęmbi: ‘Pec cho,’ cacmaidobi chuibenetan. Podquedën nidquin mimbi istuidaidtedi: ‘Pec cho,’ cabenetan,” cac nidshun

10 ambi istuidaidtedi chuibenetanac matses dadpenquio pec cho-chopac caondash. Icsambo icquidobëdi bëdambo icquido cho-choash chuiquid dapan shubun puduedash pec tabadte quënë dapan tabadcuededpac caondash tsucus-tsucustsëcquio yec.

11 Adshun chuiquid dapantsen puduedshun isquien dashcute bëdaidquio dasiuidabi icquid abentsëc tsadtsec.

12 Adshobien chuiquid dapan: “¿Atotsi quiash dashcute bëdaidquio dasiuidambobi cho, buchi?” caqui ëcbedenquio yec tsadec.

13 Adshobien chuiquid dapan: “ ‘Chido bedacno isnuec dashcute bëdaidquio dasiuidquid,’ quepadenec. Mibi icsambo iqueque. Mibi cuidnu,” queshun aton yuabo chiec: “Shëbunshun

buanshun icsano netan,” capac caondash. Adoac taneshun netanac mëyadquiec natiac shubiquiopac caondash.

¹⁴ Adembidi Nuquin Papan ambi matses bēdamboen iste dadpen tantiamiaqui utsin-utsinquien tantienquo iquendac. “Abi yacno puduednu,” queuidboedi bēdambo icte bunenquo yec abi tantiatipimbo icsho Nuquin Papan comapenen cuidendac. Utsi daēdpactsēquien Nuquin Papan tantiacpadec abēd tabadtequid iquendac –quequin Esusēn chuipondash.

*Chuiquid dapa piucquid menete chiaid
(Mad 12.13-17; Duc 20.20-26)*

¹⁵ Adsho tantianec nidash abi chieshēnquido padiseyobo: –Esus icsamboen chuimenuna. Icsamboen chuisho tantiashun bedshun unēs uamechitono –queshun ambi chuibanquin tantiamiaido chuipac caondash.

¹⁶ –Icsamboen chuimetan –caquien chuiquid dapa Edodes caid tantiaquidobēdtan icsamboen chuimenuc cho-choshon chuituidpondash. –Bēdamboen chuiquid mibi neque. En ēbi chui. Tantanu. Muesambo icquin Nuquin Papan chiacpadec bēdamboec tabadte mimbi abimbo chuipoc. Matses dacuēdēnenquo icquin Nuquin Papan chiaidquo mimbi chuipoc.

¹⁷ Adquid icquin ¿atotsi mimbi chuipe? Tantanu. Chui. Nuquin matses yuaquid chuiquid dapa Sesad caidēn: “Piucquid shocoshēmpi dadpen beccho,” cac nuqui meniac ¿ada bēdambo icpatsiash? –capondash.

18 Adoaquien Esusën ambembi tantiashun: — Bëdambo icquid damianquiec mibi muambo nec. ¿Atotsieshun ëbi icsamboen chuimetiadquio ique? —quetanquin:

19 —Chuiquid dapa menetequid piucquid shocoshëmpi beccho —ambi cac

20 bësho bedshun Esusën chuipondash. —¿Në tsutsibimboecnuc dada uaid në iquec? ¿Tsutsi cuëmëdquidbëdta dada uac? En chui. Tiantianu —caquien:

21 —Ma nuqui yuaquid chuiquid dapambo Sesad neyoc —quepondash. Adsho tantiashumbien Esusën: —Abibimboecnuc dada uaid abi cuëmëdquid dada uaid bedtequid shocosh icnuc Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiacpadomboen nabanta —quequin Esusën bëdamboen chuipondash.

22 Adsho tantiash icsamboen chuimetiadquio icboedi: —Bëdamboen chuipec —quetanec nidanepondash.

Matses uincuemetete chiaid
(*Mad 12.18-27; Duc 20.27-40*)

23 Adnubien aid ushëmbi Saduseyubo: —Matses unësaid uincuenesambo nec —quequidotsen: —Esus icsamboen chuimenu —quec chochopondash.

24 —Bëdamboen chuiquidquio mibi neque. Mimbi chuisho tiantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unëscasho aton utsin aid chido bedshun: ‘Con buchin bacuëbo nibëdeque. Con

buchin madobimboecnuc tishmenu,' quequin tishmequid," quequin Moisesën dada uapampic.

²⁵ Aid tantiaquin chuinu. Dada aton utsibobëd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash

²⁶ bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënquien aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash.

²⁷ Adashic bacuë tishambobi aid chidotsen unëspac caondash.

²⁸ Aid abitedi uincuemiatic ¿mitsicquidën chido icpatsiash? —caquien

²⁹ Esusën: —Nuquin Papan chiaidquio tantienquio icquin Nuquin Papan nadatiambo icquin nabanquin uincuemetete mimbi tantienquio iqueque. Chuinu. Tantia.

³⁰ Uincuemiatic dadan aton chido bedesa. Adem-bidi amën aton champi menesa. Nuquin Papan abi yacnoshon uaido mayan bëdabobimboec mat-ses uincuemiaido iquendac. Aden uincuemiaidën chido bedesa —quepondash Esus.

³¹ Adshumbic padpiden chuipondash. —Ambi unësaid uincuemetete chuiquin Nuquin Papan dada uamepampid ¿isbanabida ictio? Ma mimbi aid isbampaboc.

³² Naden dada uapampic. “Abadauan caid yec

Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiante unësambo icnuc abi Nuquin Papa tantiatsiash –quepondash Esus.

³³ Adsho tantiash abi datsidadquido: – ¿Mitsipadquid nepec? Bëdamboenshëen chuipec –quepondash.

*Moisesën dada uampid chiaid
(Mad 12.28-34)*

³⁴ Aden unësaid uincuemetete chuisho tantiashumbien Saduseyobon padpiden: –En chui –cainquio icpondash. Adsho isashien Esus chieshënkuid utsibo Padiseyobo: –Nuquin Papan chiaid Esus icsamboen chuimenu. Nid –quianec Esus chuimec cho-chopondash.

³⁵ Cho-choquin abentsëcshun Nuquin Papan Moises dada uamiampid tantiaquidquio icquin chuimetuidpondash.

³⁶ –Chuiquidquio mibi neque. En ëbi chui. Tanti-tianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bëdamboshë iquec,” capatsiash? –caquien

³⁷ Esus: –“Nuquin Papa tantiaquieci ambi chiacpadec tabadte bunquiota,” quequin

³⁸ chiampidba naic Nuquin Papan chiacpadec mibi bëdamboec tabadtsiandac.

³⁹ Ademvidi Moisesën chiampid utsitsen naic matses bëdamboec tabadtsiash. “Min dada mibibi datantiadacimboen utsibotsen tantiaquiota,”

quequin chiampicpadomboen nasho Nuquin Papan bēdambo catsiash.

⁴⁰ Aden matses bēdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic –quequin Esusēn bēdamboen chuipondash abi chieshēnquido chuiquin.

Nuquin Papan chomiaidquio chiaid

(Mad 12.35-37; Duc 20.41-44)

⁴¹ Adshumbic Esusēnsen abi icsamboen chuimete bunquido Padiseyobo chuipondash.

⁴² –Ēmbitsen mibi chuimenu. Tantia. Nuquin Papan chomiaid ¿mitsipadquid nec? ¿Matsesēn madouidida nepec? –capondash Esusēn abibi cadquimbi. Adoquien badedi: –Nuquin tsusedpa yampid Dabidēn tsyuecquid icsho Dabidēn mado caimbi –quepondash Padiseyobo.

⁴³ Adsho tantiashumbien Esusēn: –¿Bēdamboenda chuidio? Mimbi chiacpadquid aton mado icsho ¿atotsieshun Nuquin Papan Mayanēn tantiamiacpadomboen Dabidēn con Icho capampic? Naden Dabidēn dada uapampic.

⁴⁴ “Nuquin Papan con Icho naden chiendac. ‘Con abiuc tsadash abitedishun Icbombo icnush nēmo cho. Mibi chieshēnquidobi con Icho mibi camenu,’ quequin Nuquin Papan con Icho chiendac,” quequin Dabidēn dada uapampic.

⁴⁵ Con mado cainquio icquin con Icho capampic Dabidēn. ¿Atotsieshun mimbi: “Dabidēn mado nec,” quequin tantiape? –caquien

⁴⁶ ēchedenquio yec otacquio tabadpondash. Esusēn bēdamboen chuisho tantiash: –Icsamboen

chienquien icchitec. Ęmbi padpiden: “Icsamboen chuimenu,” cac bēdamboembidi chuiotsiash —queshun abi chieshēnquido abitedishun Esus padpiden chuimenquo icquin ēnaccondash.

23

*Bēdambo icquid damianquido tanenda, quiaid
(Mad 12.38-39; Duc 11.43, 46; 20.46)*

¹ Adshumbic Esusēn abēd icquidobēdta abi dat-sidadquido tantamequin chuipondash.

² —Tantia. Moisesēn dada uampid chuibanquidobēdtan tsusedpabon chiampid namequido Padiseyobon naid mibi chuinu. Aidon: “Moisesēn chiampicpadomboen nata,” quequin nuquin matses isadaidbo chuidenepec.

³ Aden Moisesēn dada uampid abimbo chiac adenuidi mimbi nac bēdambo ictsiash. Aden naquin padiseyobon nacpadomboen nainda. Aidon Moisesēn chiampid chuiquimbi ambibi aidēn chiaid niac-niaquec.

⁴ Chieshēmēnquido nec. Nuquin Papan chiaid nametiadquidēmbi tsusedpabon ambembi chiaid dadpenquo namepec chushcanquin. “Matsesēn aidtedi natiapimbo iquec. Padi icnuna. Nuquin matsesēn chiampidtedi nainda,” catiadquidi adoenuquo iquec.

⁵ Aden padiseyobon Nuquin Papa tantiaquidquo damequin matses ismenuenuidi naic. Nuquin Papan chiaid dada uaidēmpi sauedtsash bēdectamēdec abiuc daēdi pēdectamēdec quesahun matses ismenuenuidi naic. Adembidi aton dashcute tēdiadte nacnenuequin: “ ‘Nuquin Papa chianequidquo nec,’ ma ēbi canu,”

questhun sedquid shoyonaid ënapenpactsëcnuc
cuididicash matses ismenuec matses tabadacno
capucuenepc. Adec Nuquin Papa chianequid
damianquiec.

⁶ “Chuiquid dapa nec,” cameteuidi bunec.
Isedec puduedash: “Chuiquid dapa icsho
icbon abëdi tsadmequid,” quiash icbobëdi
tsadte bunquiec. Nuquin Papan chiaid
chuibante shubun puduedash: “Tsusio dapambo
nec,” camenuc utsibobëd tabadenquio yec
tsusiobobëduidi tabadquid nec.

⁷ “Chuiquidquio yec mibi bëdambo iquec,”
camete bunquiec matses dadpen tabadacno
nidtenepec.

⁸ Mibitsen adenda. Utsibo: “Mibiuidtsëqui
bëdambo iquec, Icbo,” camenuc adenda. Min
Icbo abentsëcquiobi ëbi iquec. Ëbi abentsëqui con
Icbo cata. Con yuabo yec con utsibo mibi neque.
Bëdamboec isnanta.

⁹ Adembidi mibi chuibanquid chuiquimbi:
“Mibiuidtsëqui bëdambo iquec, Papa,” cainda.
Nuquin Papauidtsëqui aden chuita.

¹⁰ Adembidi: “Chuiquid dapa yec mibiuidtsëqui
bëdambo iquec,” utsibo camenuenuidi nainda.
Ëbiuidtsëqui mibi chuiquid dapa nec. Nuquin Papa
yacnuëshquio choquid ëbipadquidquio utsi nibëdec.

¹¹ Padnuen ambi chiacpadomboen utsibo
nashunquidquio utsibo dëniacte bunenquio
icquid Nuquin Papan bëdamboshë catsiash.

¹² Utsien abibi cadequi: “Ëbiuidtsëqui bëdambo
iquec,” quequin utsibo ismenuenuidi naquido
Nuquin Papan icsambo catsiash. Utsibic
Nuquin Papan chiacpadomboen naquin utsibo

nashunquid yec utsibo ismeteuidi bunenquio icscho Nuquin Papan bēdambo caindac — quepondash Esus abi datsidadaido chiec.

Abi chieshēnquido Esusēn chushcaid

(Mad 12.40; Duc 11.39-45, 52; 20.47)

¹³ Adshumbic abi chieshēnquidotsen chuipondash. —Tantia. Moisesēn chiampid chuibanquidobēdta Padiseyobo mibi chuinu. Nuquin Papan cuidtequidombo mibi nec. Bēdambo icquid damianquiec mibi icsambo iquec. Nuquin matses: “Nuquin Papabēd tabadte tantianu,” qeshobi mimbi bēdamboen chienquio iquec. Ēmbi Nuquin Papabēd tabadte bēdamboen chuisho mimbi tantienquio iquec. Aden tantienquio icquin: “Aidēn chiaid tantienda,” quequin mimbi utsibotsen Nuquin Papabēd tabadte tantiametiapimbo iquec.

¹⁴ Nuquin Papan cuidtequido mibi nec. Muaquin unēsboedēn niante piucquid bedshunquido mibi nec. Nuquin Papa tantiaquidquio damenuen utsibo tantiamequinuidi buēdpambo cuēdquin Nuquin Papa chiacbimboen mimbi chianepec. Aid abimbo mimbi chienquio iquec. Adec chieshanquiecsho isun Nuquin Papan mibi comapenen cuidendac.

¹⁵ Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasēn yuambo yanec Nuquin Papan cuidtequidombo iquendac.

16 Nuquin Papan cuidtequido mibi nec. Isadaidbo chuiquid icquin bēdamboen tantiamenquien mimbi icchitec. “ ‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidēn Nuquin Papan chiaid niacquid,” quetiadquidi mibi adenquio iccoc. “ ‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquio iccoc. Padenquio yec: “ ‘Nuquin Papa tabadte shubu uashunaid dapan icquid shocosh piu nacnenaidquio utsi uatiapimbo yacpaden abimbo chiombi,’ quequid muesa nec,” quechitequien mibi iquec.

17 Aden tantienquio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bēdapenquioda icpec? “Aid bēdambošhē icnubi aid nuntan icquid bēdiactsēc bēdambo iquec,” caimbi. Mimbien icsamboen tantiec.

18 Nadentsen mimbi icsamboen chiec. “ ‘Nuquin Papa tabadte shubu uashunaid dapa yacnoshon: Mabi Nuquin Papan bēdamboen isnu, quequin nēish pichicate nacnenaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquio iccoc. “ ‘Nuquin Papa mabi bēdamboen isnuequin pichicatequid nēish utsi uatiapimbo yacpaden abimbo caimbi,’ quequid muesa nec,” mibi quepec.

19 ¿Adenda mimbi bēdamboen chuipe? Pashuacbimboen mimbi bēdamboen tantienquio iquec. ¿Mitsicquid bēdambo iquec? “Mabi Nuquin Papan bēdamboen isnu,” quequin nēish

pichicate nacnenaïd dapa bēdambo icnuc aidēn pichicatequidi nēishquïo bēdapabi ictsec. Nuquin Papamboen bēdamboshē iquec.

²⁰ Nēish pichicate nacnenaïd caic: “Aïd utsi uatiapimbo yacpaden abimbo caimbi,” quequin aid nantequid nēish abitedi chiaïdbidi nec. Adembidi ambi: “Mabi bēdamboen isnu,” caïd Nuquin Papat-sen chuipec.

²¹ Adembidi Nuquin Papa tabadte shubu uashu-naïd caic: “Aïd utsi uatiapimbo yacpaden abimbo caimbi,” quequin ambo tabadquid Nuquin Papat-sen mimbi chiec.

²² Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaïdtsen chiec. Nuquin Papa tsadaïd cain Nuquin Papambo chiec. Aidēn chiaïdquïo tantiec: “Abimbo cacimboen chuiquid icsaquid nec,” quetiadquidi mibi adenquïo iccoc.

²³ Bēdambo icquid damianquid yec Nuquin Papan cuidtequïdo mibi nec. Nuquin Papan chiaïd abentsēqui tantiatsēcquin min tiedēn canitsēcquid musuquēmpi bedshun Nuquin Papa mimbi menepec. Aden menequid icquimbi mimbi Nuquin Papan chiaïd utsi dadpen niac-niacpec. Chieshēmianquid icboedi: “Ēbi bēdamboen ista,” qesho bēdamboen istiapimbo mibi iquec. Adembidi bēdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquïo iquec. Aden mimbi Nuquin Papan chiaïd niac-niacpec. Ambi chiacpadomboen Nuquin Papa menequid icquimbi ambi chiaïd utsi abitedi natiadquidi ma mimbi nainquïo icpaboc.

24 Tantesa uatsëcquimbi mimbi utsibo icsamboen chiec. Manuampi nibedbantsëcquimbi utsi nuacquid nibedquiabi abi nësamëdpanumbobi acac bimboembien mimbi nachitec. “Nuquin Papa meneta,” quequin chiaiduidtsëqui natsëcshun adenuidtsëqui mimbi utsibo namepec. Adenuidtsëqui namequimbi Nuquin Papan chiaid utsien mimbi niac-niacchitec.

25 Nuquin Papan cuidtequido mibi nec. Padiseyobo yec Moisesën dada uapampid chuibanquido yec quequimbi mimbi icsamboen naic. Pada-padaïdbëdta dëshote chieshquin cachocuidtsëqui dapanshun anauc ampanambo icquidi ampanaid damianac bimboec mibi bëdamboec tabadquid damianquiec. Nuquin Papan chiaid dadpen nainquo icquin mitsanauidi bednuen mibi bunaiduidi mimbi napec.

26 Pamumëdacobimboec tantiatiapimbo mibi iquec. Dëshote abichobi bëdamboen ampanacobimboec icsaid ucu dash bëdambo icta. Adec icsainquo yec ënëdash Nuquin Papan chiacpadec mibi bëdamboec tabadtsiac.

27 Bëdamboec tabadquido mimbi damesho isun Nuquin Papan mibi cuidendac. Unësaid chococacno bëdamboen nacnenac bëdambo isadec ënden pisenambi.

28 Adembidi bëdamboec tabadquid mimbi damec. Matses ismec bëdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

*Padiseyobo chedo cuidte chiaid
(Duc 11.47-51)*

²⁹ Nuquin Papan cuidtequidombo mibi nec. Nuquin Papan oncamiaidobēdta bēdamboec tabadquido nuquin tsusedpabon unēs uampido tantiaquin aido chococampicno shubu uaqin mimbi nacnempec.

³⁰ Adoshombic: “Nēmbo con tsusedpabon chieshēnquin unēs uampid chococac. Aidbēd tabadquin ěmbi unēs uainquio ictsenēdac. Ěmbien bēdamboen istsenēdac,” qeshun mimbi aido chococacno nacnempec.

³¹ Adoboedēmbi nuquin tsusedpabon bēdambo icquid unēs uampicpadomboen adoante bunquin mimbitsen chieshtoshon adoaindac.

³² Ai, nuquin tsusedpabon Nuquin Papan oncamiampid unēs uacpadombota –quepondash Esus abi unēs uate chiec.

³³ Adashic abi padiseyobo chiec: –Nisibimboec icsa uanquido mibi nec. Adquido icsho Nuquin Papan icsano nēsecaquin mibi cuidendac.

³⁴ Icsaido icsho isun: “Ma Nuquin Papan bēdamboen iste tantiamenu,” qeshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno chochoacsho mimbi dadpen unēs uaindac. Utsi-utsien cuesten dectanquin utsi-utsien Nuquin Papan chiaid chuibante shubunosshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac.

³⁵ Adosho isun Nuquin Papan mibi cuidendac. Nuquin Papan chiacpadec bēdamboec tabadsho tsusedpan chieshēnquin tauamboen cuesuniampid Abed nepampic. Adoshombic adecbidi

bëdamboec tabadsho tsusedpa utsibon utsi-utsien unës uapampic. Adoshombic ënquin Bedequias caidën mado Sacadias caid unës uapampic. Aidi Nuquin Papa tabadte shubu uashunaid dayunshunquio cuesunepampic. Aidedi unës uampido tantiaquin aido unës uaquido cuidacimboen Nuquin Papan mibitsen cuidquiendac.

³⁶“Yuecshun min tsyuecquido cuidendac,” quec nenquio iquebi. Nëbi caimbi –capondash Esusën abi chieshënquido chuiquin.

*Edusaden yacnocquido Esusën shubi uaid
(Duc 13.34-35)*

³⁷Adshumbic Esusën chuioapondash. –Tantia, Edusaden yacnocquido. Mibitsen chuinu. Mibi tantiac unësquio iquec. Mibi yacnobidi tabadquin Nuquin Papan oncamaidon chuisho nuquin tsusedpabon unës uapampic. Adembidi Nuquin Papan: “Isadaidbo chiec nid,” caido chosho utsi-utsien cuënoten seshunequiopampic. Adembidi mimbi nëbi naindac. Adquidombo icsho mibi tantiaquiembi. ¿Mitsipadec cachina aton bacuë cudaspec? “Penushe,” quiash aton bacuëmpi nua shoccoshon madadec cudasquid. Adecbidi: “Satanasën yuanushe,” quiash cudasquieci mibi Nuquin Papa bëdamboen ismete tantiametiadquio iccobi. “Tantiamentu,” cac tantiate bunenquio mibi icchitoc.

³⁸Ëbi nidambic ëbi tantiatiapimbo icsho Nuquin Papan namiac min shububëdtabi mibi nibëdamendac.

³⁹Nëbi mimbi ëbi isenquio yanendac. Padnuen min matsesën yuecash chosho ëbi isendac. Aden isash: “Nuquin Papa yacnuësh choquid bëdambo

iquec,” min matses quendac —quequin Edusaden yacnocquido Esusën chuipondash.

24

Nuquin Papa tabadte shubu uashunaid nibédante chiaid

(Mad 13.1-2; Duc 21.5-6)

¹ Adash Nuquin Papa tabadte shubu uashunaid daquënë uacno tabadanec nidequi Esusbéd icquido Nuquin Papa tabadte shubu uashunaid caic: —En is, Icho. Nèid shubu bédamboen nacnenaidquio neque —quepondash.

² Adsho tantiashun Esusën: —Mimbi isboedquio cuënote bédamboen nacnenaid matses utsibon cuënote chic-chiquendac nibédquiecnuc —capondash.

Nuquin Papan cuidte ushë chiaid

(Mad 13.3-13; Duc 21.7-19)

³ Adanec nidequi macuësh dapa Odibos caidën pudundoec poctsebi tabadtuidshun abéd icquidon utsibo tantiamenquio icquin Esus chuipondash. —En mibi chote chui. Tiantianu. “Nëbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nëbi nec,” quepe? —capondash abéd icquidon.

⁴ Adoaquien Esusën naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda.

⁵ Adquido choshon: “Nuquin Papan chomaidquio Quidistu caid nebi,” quequin muaquin

chiaqui dadpenshun: “Ai, abimboen mimbi caic,” capendac.

⁶ Ĕbi choabi icnuc: “Matses dadpenquo cuesnan-cuesnanac caosh,” quecuededendac. Adsho tantiash dacuëndenda. Nuquin Papan matses abitedi cuidte ushë choabi icnuc ambi tantiacpadec matses adonanendac.

⁷ Adec matses utsi dadpen icquido matses utsibobëd cuesnanendac. Nidaid utsi-utsiec yacno pete nibëdquiec icted-ictedendac. Nidaid utsi-utsiec yacno nidaidquiobi comapenec uëdëquedenendac.

⁸ Adsho isash chido bacuë nëncuenacsho isun: “Nëbien tishchitec,” quequin tantiacbimboen tantiata. “Nuquin Papan abitedi cuidte nëbi nec,” quequin tantiata –quepondash Esus.

⁹ Adashic abi onquec: –Ĕmbi chiacpadquo icnuc chieshëmënnquidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpenshun ëbi tantiaquido chieshënquiendac.

¹⁰ Adoac ëbi tantiatsëcboedëmbi chieshtoshon ëbi tantienquo yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

¹¹ Padnuen muaquido: “Nuquin Papan chui-boedquo chuinu. Tantia,” quependac dadpen. Adsho tantiashun dadpenshun: “Ai, abimboen mimbi chiec,” caindac.

¹² Matses dadpenquo icsamboecshë tabadsho isun ëbi tantiatsëcboedëmbi ëbi tantienquo yanendac.

¹³ Padnuembi ëbi choabi icshobi ënenquio icquin ëbi tantiaquido Nuquin Papa yacno tabadmendac.

¹⁴ Ëbi choabi icnuc: “Ma matses abitedishun Nuquin Papabêd tabadte tantianu,” qeshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi — quepondash Esus.

*Matses icsamboshë icquid chote chiaid
(Mad 13.14-20; Duc 21.20-24; 17.22-24)*

¹⁵ Adashic abi onquec: —Ëbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec puduedshun: “Mimbi Nuquin Papa caid tantienda. Ëmbi chiacpadomboenuidi nata,” quequin Nuquin Papa chieshënquin chiendac. Ëndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquio nec.

¹⁶ Aden: “Nuquin Papa tabadte shubu uashunaid dapa icsa uanuec puduedosh,” qesho tantias Udeya yacnocquido macuësh dapa yacno ompodec cuenac bëdambo ictsiash.

¹⁷ Adec cuenec shubu dayun icquido puduedenquio yec: “Con na bednu,” quenquio yec umanucüeshi cuenac bëdambo ictsiash.

¹⁸ Adecbidi badedquio cuenuen tied nantan icquidon aton dashcute utsi aton shubuno beduandenquio yac bëdambo ictsiash.

¹⁹ Nidequi bacuë usunquid yec bacuë chishmequid yec quec badedquio cuentiapimbo yec mëyadquiendac.

20 Adec cuente tantiec: “Ue sequenumbo cuemenquo icpashuni,” queta. “Pete bedmianenquo icnushe,” quiash “Chonoadenquo icte ushênquo cuemenquo icpashuni,” queoata.

21 Aden Nuquin Papa tabadte shubu uashunaid dapa icsa uate bunquid icsamboshë icquid choan matses dadpenquo natiambo chieshêmênquiec tabadendac. Nuquin Papan tauamboen matses uac adec tabadenquo ictenec. Nêbi adec tabadenquo iquec. Aido icsamboecshë tabadquido nibêdanambic utsibo adquidpenquo yanoaindac.

22 Adec icsamboecshë tabadte tantiaquin Nuquin Papan: “Ëmbi Esus tantiaquid icmiaido uesquin cuesun sianushe. Matses abitedi nibêdanushe,” queshun yuenquo icsamboen tabadmenquo icquin ênêdmendac —quepondash Esus.

23 Nuquin Papan aden ênêdmiabi yac icsamboecshë tabadec utsibo: “Is. Nêid Nuquin Papan chomiaidquo Quidistu neque,” quependac. Utsibic: “Is. Nêidquien Nuquin Papan chomiaidquo Quidistu caid neque,” quequin icsamboen chuioaindac. Adsho tantiaishun: “Nuquin Icho Esus choashien nec,” cainda.

24 Adec muaquidoba choendac. “Nuquin Papan chomiaidquo nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamaid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ëbi tantiaquidontsen: “Ai, abimbo

caic,” catsempendac. Nuquin Papan bēdamboen tantiamiaido yec adtiapimbo iquendac.

²⁵ “ ‘Chieshēmēnquido iquendac,’ quequin tantienquio icquidēn ēbi tantienquio yanushe,” queshun: “Aden ēbi tantiaquido chieshēnquiendac,” quequin chiombi — quepondash Esus.

²⁶ Adashic padpidec onquec: —Ēmbi aden chui-boed tantiashun utsibo muasho tantienda. Ēbi caic: “Utsibo ismenquio yec matses nibēdacno choac caoshe. Isnu. Nid,” cac istanenda. Adem-bidi: “Choash nēid shubun puduedac caoshe. Isnu. Nid,” cac adembidi istanenda. Muambo neque.

²⁷ Ēbimbo padpidec choquimbimbi abitedimbo ismendac. Abu ushēmbō yec bed-bedquetanesho ¿ada matsesēn abitedishunquio isenquio icpadic? Ai, isec. Adembidi ēbi choasho matses abitedishunquio isendac.

²⁸ Adec choendabi. ¿Ada edeste pisen chec bu-denquio icpadic? Ai, budec. Adecbidi Nuquin Papan cuidte ushē chonoc choendabi —quepondash Esus.

*Abi chote Esusēn chiaid
(Mad 13.24-37; Duc 21.25-33)*

²⁹ Adashic padpiden chiec: —Aden matses icsamboshē icquidon ēbi tantiaquido natiamenubi ushē chēnquenquio yanendac. Inchēshēn ushētsen chēnquenquio yanendac. Uispa chedo paēdbudnendac. Uispabimboecquid abitedimbo uēdēquendac.

³⁰ Adnubini abitedishun Icho yec dacuēdampambo yec abucuēsh choendac. Ēbi

nadatiambo icquin nabanquidquo yec chosho isash cuidadtequido abitedimbo dacuëdec natiaic shubiquiendac.

³¹ Adnuc nua shoncanubimbi Nuquin Papan abi yacnoshon uaido mayan bēdabo: “Bedtan,” caindac. Adoac nidaid utsi-utsiec yacno nidshun ëbi tantiaquido abitedimbo bedtanendac.

³² Ëmbi chuibocpadquiec yansho isun: “Esus chote nēbi nec,” quequin tantiata. ¿Mitsipaden: “Seta taëec,” quequin tantiapec? Suc seccud-uquiaid isun: “Nēbi seta taëec,” quequin tanti-aquid.

³³ Adembidi ëmbi chuiboed isun: “Nēbimbobi Esus choec,” quequin tantiata.

³⁴ ¿Muectabi nedi? Ëmbi chuibocpadquo iquendac. Ëmbi chiacpadec yanabi matses abitedi nibēdantiapimbo iquendac.

³⁵ Abimbo caimbi. Abu nibēdanendac. Nidaidsen nibēdanendac. Padnuen ëmbi chuiboedquo nibēdantiapimbo iquendac. Bēnudenquo iquendac. Ucutiapimbo iquendac. Ëmbi chuibocpadquo iquendac —quepondash Esus abēd icquido chiec.

*Esus chote ushë tantienquo icte chiaid
(Mad 13.32-33; Duc 17.26-35)*

³⁶ Adashic abi onquec Esus: —Ëbi chote tantienquo iquembi. “Aid ushēnquo choendabi,” queti-apimbo iquebi. Adembidi mayan bēdabon tantienquo iquec. Ëmbibi Nuquin Papan Madonquiobi tantienquo iquembi. Nuquin Papanuidtsëquien tantiec.

³⁷ Matses ëbi caic: “Nëbi choec,” quetiapimbo icnuc choendabi. Noen cano nacnenubi ¿mitsipaden aton matses icsambo icquidon tantiapampic?

³⁸ Nidaid abichobi mauanabi icnuc: “Nuquin Papan nuqui cuidendac,” quequin tantienquoio icquin peshun acquinc aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaquin nacnenash puduedpampic.

³⁹ Aton matses: “Nëbimbobini Nuquin Papan cuidchitec,” quenquoio icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adecbidi Nuquin Papan cuidtequido ëbi caic: “Choec,” quenquoio icnubini choendac.

⁴⁰ Choquin Nuquin Papa yacno tabadmenuen beduamendambi. Ëmbi: “Bedtan,” cac tied nantan dada daëd icsho istuidshun ëbi tantiaquid abentsëc icsho beduanendac. Utsibic ëbi tantiesa icsho nianendac.

⁴¹ Adembidi Nuquin Papa yacno tabadmenuen chido daëdshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesa icsho nianendac.

⁴² Aden ëmbi chuiboed tantiashun: “¿Nëbida con Icbo chopeba?” quequin ënenquoio icquin tantiata. Ëbi chote mimbi tantienquoio iquec.

⁴³ ¿“Nëbi ampequidën ampec,” quequinda tantiapadic? Padenquoio. Tantiaquidënquien aid ushënquoio aton na bëdamboen isquin ampemenquoio ictsiash. Aden tantienquoio icquin: “Ampesho isnu,” quequin ënenquoio icquin isquid.

⁴⁴ Adembidi ëbi chote ushë mimbi tantienquoio

ye. ¿“Nëbida nuquin Icbo chopeba?” quec Nuquin Papabëd tabadte bunec bëdamboec tabadta. Mat-ses dadpen: “Nëbien chochitec,” quenguio icnubini choendac –quepondash Esus abëd icquido chiec.

Esus bëdamboen cainte chiaid
(Duc 12.41-48)

⁴⁵ Adshumbic abi bëdamboen cainte Esusën chuipondash. –Tantia. Aton icbo tantiaquin yua bëdambo icquidën naid mibi chuinu. Icbon: “Ëbi nidan mibëdta yuaido pete sandoaid musucshun ëmbi chiacpadën ëmbi chiacpadënquien menianeta,” cac yua bëdambo icquidën adotsiash.

⁴⁶ Adnubien icbon choshon ambi chiacpadomboen yuan nasho isun bëdamboen istsiash.

⁴⁷ Adshumbic aton yua chuitsiash. “Bëdamboen tantiaquid mibi neque. Con yua utsibo namequin con natedi dayun uata,” catsiash icbon yua bëdambo icquid caquin.

⁴⁸ Padnuen yua icsambo icquid: “Ëndenquimbo con icbo nidondash. Choenquien icchitec. Con nauidi nanu,”

⁴⁹ quiampatsiash. Adshumbic chieshtoshon abëdta yuaido cuesanetsiash. Adashic icsambo icquidobëdi icsamboec tabadtsiash.

⁵⁰ Adec: “¿Nëbida con icbo chopeba?” quenguio icnubien aton icbo chotsiash.

⁵¹ Choshon ambi chiacpadomboen nainquio icsho istuidshumbic: “Icsambo iquec,” queshun comapenen cuesquin cuesunetsiash. Adembidi Nuquin Papan icsambo icquido cuidendac. Bëdambo icquid damianquido cuidacno

icsamboshë yacno nidmendac. Adoac natiaic shubiquiendac —quequin abi bëdamboen cainte Esusën chuipondash.

25

Chido 10tedshun cainaid

chiaid

¹ Adshumbic Esusën ompoacbimboen chuiquin abi chote ushë tantienquo icte chuipondash. — Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuishonquec aibdëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” queshun aton tabote bëchin taboadquid icbo-icboen buanuen sanambededpac caondash.

² Aid chido 5tedi tantienquo icquido icnubi 5tedbidi bëdamboen tantiaquido icpac caondash.

³ Tantienquo icquidon: “Tabote bëchi naimëdsho cushtonon buanu,” quenquo icquin bëchi uesadbudtsaid taboteuidtsëqui sananquin caimpac caondash.

⁴ Padnuen bëdamboen tantiaquidon naimëdsho cushtonoequin tabotebëdta sedunten cushtoaid bëchi sananquin caimpac caondash.

⁵ Aden cainaqui: “Chido bedtanu,” quianec nid-boed choenquo icsho isash abitedi ushcastoash ushcuededpac caondash.

⁶ Inchësh poctsemboen: “Choeque. Bëquednu. Nid,” cac

7 isucunshun chidobon tabonoen tabote dēbedpac caondash. Adoshon bēdamboen tantiaquidon ambi bēboed bēchi cushtonobien

8 icsamboen tantiaquidon: “Bēchi beccho. Con na naimēdeque,” caquien bēchi bēboedēn

9 bēdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchēshtsiac. Piucquid menequin bēchi cushtoquid baded cushtometan,” capac caondash.

10 Adoac bēchi bedec nidnubien chido bedtanec dada chopac caondash. Chosho bēdamboen tantiaquidon aton tabote taboshon chido bedtanec choquid bēquedtampac caondash. Adtanec abēdi choash puduedshun bētashte puduedtiapimbo icnuc bēdamboen bētashpac caondash.

11 Adnubien bēdamboen tantienquio icquido bēchi bedtanec chopac caondash. Choshon shēcūē bētashacsho isun: “Shēcūē shēcne, buchi. Ēbitsen puduednu,”

12 caquien chido bedquid: “Padi. Ēmbi tantiacmaido mibi nec,” quepac caondash.

13 Ēmbi chuiboed tantiashun chido icsamboen tantiaquido tanenda. Bēdamboen nabi icsho: “Ēmbi tantiacmaid mibi neque. Puduedenda,” aido caczimboen ěmbitsen Nuquin Papa yacno puduedmenquio icquin cacumechitomane. Ēbi chote ushē tantiadenquio icnuc: “¿Nēbida con Icho chopeba?” quequin ěbi bēdamboen tantiec ěmbi chiacpadec bēdamboec tabadta –quepondash Esus abēd icquido chiec.

*Icbon piucquid daëd uaid chiaid
(Duc 19.11-27)*

14 Adshumbic abi tantiaquidon ambi chiacpadomboen nate Esusën ompoacbimboen chuioapondash. Ënapen nidnun aton piucquid dadpen dayun uaquidën aton yuabo: “Ëbi piucquid daëd uashunta,” quequin chuipac caondash.

15 “Nëidën bëdamboen tantiaquidquo icquin con piucquid ëbi daëd uashuntsiash,” queshun aton yua piucquid 5tedi meniac caondash. Adshumbic: “Nëidëntsen bëdamboen tantiaquin adembidi con piucquid ëbi daëd uashuntsiash,” queshun ut-sitsen 2tedi menepac caondash. Adshumbic: “Nëidëntsen bëdiactsëc tantiatsëcquin adembidi ëbi con piucquid daëd uashuntsëctsiash,” queshun ut-sitsen piucquid abentsëcquiobi menetsac caondash. Adanec nidpac caondash icbo.

16 Adnubien piucquid 5tedi bedboedën aton matsesën nacpadomboen piucquid daëd uanuen utsibo menequin yuecshun ambi meneboed udictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc.

17 Adembidi piucquid 2ted meneboedën 2bidi daëd uapac caondash 4tedi icnuc.

18 Padnuen abentsëc meneboedën chieshquin aid daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

19 Yuecquo ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac

²⁰ sincoted meniondaidën: “Is, icbo. Mimbi ëbi meniondaidtedbidi daëd uaombi. Nëbi mitsana 10tedi iquec,” caquien

²¹ icbon: “Ai, con na daëdpactsëc icboedi daëd uaquin mimbi bëdamboen nac. Nëbi ëbëdtan chuiquid dapa icta. Ëbëd cuishonquec tabadec cho,” capac caondash.

²² Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien

²³ icbon: “Ai, ëmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

²⁴ Adnubien piucquid abentsëcquiobi meniondaidën chieshquidëntsen: “Mimbi ancaidon nidtsinaid peteuidi bedquid mibi nec, icbo. Mimbi chiacpadomboen nainquio icsho isash chushcanquidquio mibi nec.

²⁵ Adec dacuëdampambo icquid icsho mibi dacuëdënquin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien

²⁶ icbon: “Chieshquiec mibi icsac. Ëmbi chiacpadomboen nambo mimbi iquec. Ëbi caic: ‘Ancanquid icquin ëbi chushcanushe,’ queshun

²⁷ nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,”

²⁸ quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniac

10ted icboedi 11ted yanac caondash. Adshumbic chieshquid comapenen cuidpac caondash.

²⁹ Adembidi naindambi. Ĕbi tantiaquin ěmbi chiacpadomboen naquid adembidi namequin bĕdamboen tantiamendambi. Ĕbi tantiesabo ěmbi chiaid niacquid bĕdamboen tantiamenquio iquendambi.

³⁰ Aid yua icsambo icquid cuidacbimboen Nuquin Papan ěbi tantiesabo cuidquiendac. Ambi icsaido cuidquiacno nĕsecac natiaic shubiquiendac —quepondash Esus abĕd icquido chiec.

Mates nashunesa cuidte chiaid

³¹ Adshumbic Esusĕn padpiden chuipondash. —Nuquin Papan abi yacnoshon uaido mayan bĕdabobĕd choec: “Abitedishun Icbomboeni nec,” quiash bĕchamauampamboec dacuĕdampamboec choequi chuiquid dapan tsadten tsadtoquin abitedi ismendambi.

³² Adshumbic mates abitedimbo cho-chomequin tsidadmendambi. Adshumbic icbon aton nauidquio tsinacacbimboen ěbi tantiaquido naden chiendambi.

³³ “Ĕbĕd tabadtequido mibi neque. Nĕmbo con abiuc tabadec cho,” caindambi. Adshumbic ěbi tantiesabo chuiquin: “Ĕbi tantiesabo cuidadtequido mibi neque. Con copioc tabadec cho,” caindambi.

³⁴ Adshumbic ěbi tantiaquido padpiden chuioaindambi. “Ĕbĕdi tabadec cho. Mates uaquin tauabi ĕdenquimboshĕ mibi caic: ‘Aido ěbi tantiaquido icmeshun ĕbĕdi tabadmendambi,’

quequin Nuquin Papan tantiaidombo yec ëbëdi bëdamboec tabadec cho.

³⁵ Mimbi ëbi nashundenec. Bundoacsho mimbi ëbi pemedenedec. Acte bundoacsho adembidi mimbi ëbi acmedenedec. Mimbi isacmaidquio icsho mimbi ëbi yuedtenec.

³⁶ Con dashcute nibëdsho mimbi ëbi dashcute menenedec. Daicsabudtsash unëstiadtsëcquio icsho ëbi tantiec mibi datsadtenec. Quënën nauedacsho mimbi ëbi isuan-isuandenedec,” caindambi.

³⁷ Adoaquien bëdamboec tabadquido: “Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemi-ambo yoc. Mambi mibi acte bundoacsho acmi-ambo yoc.

³⁸ ¿Ëmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc.

³⁹ Mibi daicsacsho datsadambo iquebi. Quënën nauedacsho mibi istaniambo iquembi. Mimbi tantiadenquio icnuc chuipec,” ëbi caindac.

⁴⁰ Adoac naden chiendambi. “Tantia. Mibi chuinu. Ëmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacimboen mimbi utsibo nashundeneque. Èbëdi tabadec cho,” caindambi.

⁴¹ Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid.

42 Ĕmbi chiacpadomboen ěbi tantiaquido nashunesambo mibi icteneque. Bundoacscho mimbi ěbi pemenuio ictenec. Acte bundoacscho mimbi ěbi acmenquio ictenec.

43 Mimbi isacmaid icsho mimbi ěbi cacumedenec. Dashcute nibědsho mimbi ěbi menenuio ictenec. Daicsacsho isash mibi ěbi datsadenuio ictenec. Quĕnĕn nauedacsho mimbi ěbi istanenuio ictenec,” caindambi.

44 Aden chiaquien: “Tantiadenuio icnuc mimbi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ĕmbi isacmaid icsho mambi mibi isambo yoc. ¿Min dashcute nibědshodambi mibi istionda? Mambi padambo yoc. Mambi mibi daicsacsho isambo yoc. Mibi quĕnĕn nauedaid tantiambo iccondambi. Tantiadenuio icnuc mimbi chuipec,” caindabi ěmbi chiacpadomboen naisabon.

45 Adoac naden chiendambi. “Ĕbi tantiaquido nashunenuio icquin ěbibi nashunenuio yacimboen ěmbi chiacpadomboen naisabo mibi neque. Nuquin Papan cuidacno nid,” caindambi.

46 Adoac icsamboec tabadquido ĕnenquio icquin cuidacnombo nidnubi bědamboec tabadquido Nuquin Papa yacno ĕnĕdenquio yec tabadendac—quequin Esusĕn chuipondash.

26

*Esus bedshun unĕs uanuequin chiaid
(Mad 14.1-2; Duc 22.1-2; Uan 11.45-53)*

¹ Aden abi chote ënquin chuitanquimbic abi unës uatetsen abëd icquido Esusën chuipondash.

² —Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquio icnu,” qeshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac —quepondash Esus.

³ Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash.

⁴ Adashic: —Nëbien Esus unës uametiad utsibo ismenquio icquin bedshun.

⁵ Nuquin matses obeca pec tabadnuc bedenquien ictiad. “Esus bëdambo icquidi cuesunec,” qeshun obeca penuec cho-choquidon nuqui cuesnushe —quepac caondash.

*Chidon Esus machiuinaid
(Mad 14.3-9; Uan 12.1-8)*

⁶ Adnubien Esus shubu dadpen icquid Betania caid yacno choash ambi daushumbo yec daicsaid bëdamiondaid Simon caidën shubun puduedpondash.

⁷ Puduedshun pec samëdshobien chidon puduedshun ambi piucquid dadpenquio menequin bedaid tëchumpin icquid bëdambo nuadquid Esus machiuimpondash: —Esus bëdamboshë icquid nec —qeshun.

⁸ Adsho isumbien Esusbëd icquidon: —¿Adenda bëdamboen nai? Ma icsambo yoc.

⁹ Utsibo menequin dadpen piucquid bedshun piucquid nibëdquido aid piucquid menetiadquidi mibi nec –quequin chido chushcapondash.

¹⁰ Adsho tantiashumbien Esusën: –¿Atotsieshun chido chushcai? Ëbi bëdamboen tantiaquin ëbi ismequin bëdamboen nashunebique. Chushcainda.

¹¹ Mimbi chuiboed piucquid nibëdquido ënëdenquoio yec mibëdi tabadendac. Ëbien mibëdi tabadenquoio yanendac.

¹² Ëbi unës uashun chococate tantiacbimboen machiuinoshibique. Chushcainda.

¹³ Ëmbi chiaid chuibeniacnoshon nëid chidon ëbi machiuimboed chiendac –quepondash Esus abëd icquido chiec.

*Udasën Esus bedmenun piucquid bedaid
(Mad 14.10-11; Duc 22.3-6)*

¹⁴ Adnubien Udas Iscadiote caid Esusbëd icboedi Esus chieshënquido chuiquid dapabo chiec nidpac caondash.

¹⁵ Nidshumbic chuituidpac caondash. –Utsibo ismenquoio icquin mibiuidtsëqui Esus bedmenu. ¿Tedtsi piucquid ëbi menetsia? –caquien badedi pudunquin piucquid shocoshëmpi 30ted icnuc tambantanquin menepac caondash: –Baded ëbi bedme –quequin.

¹⁶ Meniac bedanec nidec: –¿Mitsishunquiembi utsibo ismenquoio icquin Esus bedmepeba? –quepanëdash Udas. Adashic Esusbëdi tabadoaic chopondash.

*Unësnush abëd icquidobëd Esus pec tabadaid
(1Cod 11.23-26)*

17 Adnubien Esusböd icquidon: —Equipito yacnuësh cuenun pan bidiscamiabi yampid 7tedec ushquin tantiaquin tauaid ushë nëid nec —queshun Esus chuipondash. —Nuquin Papan nuquin tsusedpabo unës uamenquio icquin matamiampid inchësh tantiaquin obeca bacuë penuen ¿mitsishunquiemi mibi codocashumpe? —caquien Esusën:

18 —Edusaden yacno nidshun ëmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nëbi Nuquin Papan chiacpadoemboen uesquin nabanembi,’ quiosh. Min shubumbo caic: ‘Aidën shubun puduedshun Nuquin Papan nampid tantiaquin obeca bacuë pec tabadcuedednu,’ quiosh,” quequin chiec nid

19 —cac nidquimbi shubu icbo chuituidac caondash. Adoac: —Ai, ma chobono —quesho tantiashumbien abia nidboedon aidën shubun puduedshun penuen nëish yua obeca codocapaccondash. Adnubien Esus chedo puduedpondash.

20 Inchëshëmbi aböd icquido 12tedböd samödquin Esusën pepondash.

21 Pec samödquin Esusën chuipondash. —Tantia. Mibi chuinu. Ebi chieshënquido ëbi bedmequid abentsëc nëmbobi iquec —quesho tantiashun

22 unësquio yanshun abentsëcshun abentsëcshunquien Esus chuipondash aböd icquidon. —¿Eëbida cai, Icbo? —quequin abi chuishobien

23 Esusën: —Eëbdtan pete codocaid ënë punquid ëbi bedmequid nendac.

24 Ĕbi Nuquin Papan chiaid dada uamepampic-padquid matsesmiaid yec unĕsendabi. Padnuen ĕbi bedmequid comapenen cuidtequidquio nec. Anin aid tishenquio icpatecnĕdan. Cuidac nati-aquiendac –quepondash Udas caic.

25 Adoaquien Udasĕn abi bedmequidĕnquio: – Ĕĕbida cai, Icho? –caquien: –Ai, mibibimbi caic –capondash. Adoac Udas puduenanec nidpondash.

26 Adshumbic Esusĕn pete sananquin: –Mimbi pete uaid nĕid nec. Mibi bĕdambo iquec, Papa –quequin Nuquin Papa chuitanquin cuĕsh-cuĕshbanshun abĕd icquido menebampondash. –Nĕid cuĕsh-cuĕshquin nibĕdamiacimboen ĕbi mĕyanquin unĕs uaindac. Ĕbi unĕs uate tantiaquin nĕid peta –cac pebededtsĕcondambi.

27 Adshumbien Esusĕn dĕshoten actequid cushtoshon sananquin: –Mimbi uaid nĕid nec. Mibi bĕdambo iquec, Papa –quequin Nuquin Papa chuishun: –Nĕid abitedishun acbeded –cac dĕshoten abentsen cushtoaid pictsĕ-pictsen acbampondambi.

28 Aid actequid acshobien Esusĕn: –Nuquin Papan chiaid nuquin tsusedpan dada uapampic-padec ĕbided cuidadec unĕsendabi. Nĕid acquin: “Esused Nuquin Papan cuidac aton intac siebud-pamboec unĕsposh. Aton Madoded cuidshun Nuquin Papan ĕbi padenquio iquec,” quequin nĕid acquin tantiata –capondashi.

29 Adashic: –Nadquid actequid padpiden aquec cuishonquec mibĕd tabadenquio iquendabi. Nuquin Papan abitedishun Icbombo icmiac abi

yacnombo mibëdi cuishonquec tabadendabi — quepondash Esus ëbi chedo chiec.

³⁰ Adashic cuëdënten abentsec cuëdëdash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

*Petedo chieshuidte Esusën chiaid
(Mad 14.26-31; Duc 22.31-34; Uan 13.36-38)*

³¹ Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiapadec ëbi nianec mibitedi niqendac. Nuquin Papan naden chuipampic. “‘Icbo cuesnu,’ canubi aton yuabo niqendac,” quequin Nuquin Papan dada uamepampicpadec mibitedi adec niqendac.

³² Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abëd icquido chiec.

³³ Adoaquien Petedo: —Mibi cuesnuec chochoso isash utsibo dacuëdec niqenuc ëbimboen cuenenquimbo ictsiandac —queshobien

³⁴ Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquio aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien

³⁵ Petedo: —Pada. Adtiapimboeni iquec. Chieshëmënquidon: “Esusbëd icquid mibi neque. Mibi cuesunenu,” caqui: “Ëmbi isacmaid neque. Padi,” quenquio iquendabi. Mibëdquiobi unëstsiandabi —Petedo quenubini: —Ai, ëbibic

adechidi ictsiac –quecuededpondabi Esusbëd icquidotedi.

Quetsemani caid yacnoshon Esusën Nuquin Papa chiaid

(Mad 14.32-42; Duc 22.39-46)

³⁶ Adanec nidequi cuëte dadpen nitsinacno Quetsemani yacno nidpondash. Auëshquio Esus nadpondash. –Ambobi tabadta. Udictsëc nidshun Nuquin Papa chuitanu –quepondash.

³⁷ Adashic Petedobëdta Sebedeyon mado daëd buanec nidpondash. Udictsëc nidequi unësquio yanec shubiantiadtsëcquio yampac caondash.

³⁸ Adshumbic Petedo chiec: –“Matsestedi ic-said ëmbi bedshunsho isun Nuquin Papan ëbi istiapimbo yanendac,” quiash unësquio iquebi. Ëbi yacpadeq ushenquio yec nëmbobi isec tabadta –quianec

³⁹ udictsëc nidash nidaidën uebudshun Nuquin Papa chuipac caondash. –¿Ada mimbi ëbi unës uamenquio icpatsia, Papa? Mimbi: “Ai, mibi unës uamenquio iquembi,” cac bëdambo ictsiabi. Mimbi: “Nëbi mibi unës uamenu,” cac mimbi tantiacpadequi unësendabi –quepac caondash Esus Nuquin Papa chiec.

⁴⁰ Adtanec choshon isquien Petedo chedo ushpec: –Ushenquio yec isequi tabadta –caboqui. –¿Yuec-yuecpactsec ushenquio icquin istiapimboda icco?

⁴¹ “Satanasën icsamenushe,” queshun ushenquio icquin Nuquin Papa chuita. “Ushenquio iquebi,” queboedobi ushcas mëmunenquio yec mibi ushpec –capac caondash Esusën Petedo chedo chuiquin.

⁴² Adtanec padpidec nidoashun Nuquin Papa chuioaic: —Ëbi unës uametiadquoio icquin ëbi unës uameta, Papa. Ëbi unës uametiapimbo icquin mimbi ëbi unës uamenquoio ictsiac. Mimbi tanti-acpadomboen nata, Papa —quetanec

⁴³ choaquin isquien Petedo chedo ushoaic ushas mëmuntiapimbo yec.

⁴⁴ Adsho istanec nidoashun ambi chuibocpadomboembidi Esusën Nuquin Papa chuitanepac caondash tedesteden.

⁴⁵ Adtanec choaquin ushash uesho istuidoashun: —¿Ushecta ue? Nëbimbobi ëbi unës uamenuen ëbëd ichoedëmbi icsambo icquido ëbi bedmeque.

⁴⁶ Nidnu nid. Is. Ëbi bedmenuec ëbi bedmequid choeque —quepondash Esus Udas chosho isash.

Abi chieshënquidon Esus bedaid

(Mad 14.43-50; Duc 22.47-53; Uan 18.2-11)

⁴⁷ Adnubien Udasën Esusbëd ichoedën bedtanac matses dadpen cuesantiadpambo yec chështebëdta cuate sanambededtsëcquiec cho-chopondash. Nëish yua abided unës uaquido chuiquid dapabobëdtan con matses tsusiobon: —Bedtan —cac cho-chopondash.

⁴⁸ Ambi bedtanaidobëd cho-choquimbien Udasën: —“Nëid Esus nec,” quequin adoendambi —abi quiacpadembi

⁴⁹ Esus tansudcatuidpondash: —Chobi, Icho —quequin.

⁵⁰ Adoaquien Esusën: —Ëmbi tantiaboedquoio mibi nec. Ëmbi adoboedënquiobi mimbi

tantiacpadomboen nata —queshobien cho-
choquidon Esus bedtuidpondash. Aden bedshun:
—Cuidmenun chuiquid dapa yacno mibi buanu
—capondash.

⁵¹ Aden Esus bedshobien abëd icquidën abi
tsiusudaïd chështe chictanquin chuiquid dapan
yua pateshunepondash.

⁵² Adoshobien Esusën: —Padi. Chën. Min chështe
tsiusudoata. Cuesanquid icsho ademvidi cuid-
nushe.

⁵³ ¿Tantienquioda ique? Ëmbi chiac con Pan
ambi abi yacnoshon uaido mayan bëdabo dadpen-
quioshë ëbi cudasmenuen chometsiash.

⁵⁴ Nuquin Papan aden ëbi cudasmiac bedatti-
apimbo icsho ¿mitsipaden Nuquin Papan chuiquin
dada uamiampicpadomboen ëbi naden bedpatsi-
ash? —capondash pateshunianquid chuiquin.

⁵⁵ Adashic abi bedquido chiec: —¿Atotsi quenuc
chështebëdta cuate sanambededtsëcquiec ëbi
bednucc cho? ¿Nuqui chuiquid dapan chiaïd
niac-niacquin matses cuesanquido chuiquid
dapadabi nedi? Mabi mimbi isboedquiobi
neyoc. Badiadquidën badiadquidënnuquin Nuquin
Papa tabadte shubu uashunaïd daquënë uaidën
puduedshun chuideneshobi ma mimbi ëbi
bedenquio icboc.

⁵⁶ Padenquio icboedombi Nuquin Papan
tantiacpadënnuquobi mimbi ëbi bedec. Ëbi bedte
chuiquin Nuquin Papan nuquin tsusedpa dada
uamiampicpadomboen mimbi ëbi bedec —
quequin Esusën chuïnubini niquepondac: —
Cuenenquio ictsiabi —queboedi.

Caipas caid yacno Esus buanaid

(*Mad 14.53-65; Duc 22.54-55, 63-71; Uan 18.12-14, 19-24*)

⁵⁷ Adnubien chuiquid dapambo Caipas cuëmédquid yacno Moisesën dada uampid chuibanquidobëdi tsusio utsibo cho-chopac caondash. Adnubien ambobi Esus bëpac caondash.

⁵⁸ Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaido sondadobëdi tsadtuidpac caondash Petedo.

⁵⁹ Adnubien cho-choboedo tsusio dapabo: — Esus unës uamenuen: “Esus icsasho isombi,” quequin muaquidon chuisho tantianuna —queshun chomiac muaquido dadpenshun: —Esusën icsamboen nasho isombi —quequin chuipac caondash.

⁶⁰ Aden Esusën naid muaquin chuiquin Esus unës uatiadquio icquid chiambo icpac caondash. Adnubien muaquid daëdshun chuituidpac caondash.

⁶¹ —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

⁶² Adshobien chuiquid dapabo chuiquidën Esus chuiquin: —¿Atotsi quenuc ado? ¿Atotsi nëidën chiec? —caquien

⁶³ Esusën ëcbedenquio icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” quesahun abimbo

cata. ¿Nuquin Papan chomiaidquio aton Madombobida mibi nepe? —caquien

⁶⁴ Esusën: —Ai, mimbi chiaidquio nebi. Tanta. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac — quepac caondash Esus.

⁶⁵ Adsho tantiash chuiquid dapambo chieshtotanquin aton dashcute bëntse icquid dacheddachedquepac caondash. —¿Ada tantio? “Nuquin Papan Madombobi nebi,” quequin Nuquin Papanbo icsamboen chiec muaposh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun

⁶⁶ ¿Atotsi natiadquio ique? —caquien abëdtan chuiquid utsibo: —Adquid cuidquid quedeneque. Unës uamequimbien ictiad —quecuededpac caondash.

⁶⁷ Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen istiapimbo icnuc Esus dashcuten bëpuctanquin mëdanten bëcues-bëcuespac caondash.

⁶⁸ Bëcuestanquin: —“Nuquin Papan madombobien nec,” canu. En chui. Tantuanu. ¿Tsundan mibi naoshe? —cabededtsëcquien mamënshumpac caondash Esus.

Esus caic: Ëmbi isacmaid nec, quequin Petedon chiaid

(Mad 14.66-72; Duc 22.56-62; Uan 18.15-18, 25-27)

⁶⁹ Adnubien Petedo tabadacno choshon chido yuan chuituidpac caondash. —Cadidia yacnocquid Esus caidbëd ma mibi icpaboc —caquien:

⁷⁰ —Tantiadenquo icnuc mimbi chiec. Ëmbi isacmaidquo mimbi chiec —quec Petedo muaic taëpac caondash.

⁷¹ Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien

⁷² Petedo: —Ma ëmbi isacmaidquo Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

⁷³ Adash yuec-yuecpactsëcshumbien ambo tabadquidontsen Petedo chuipac caondash. —Aidbëd icquidien mibi nec. Cadidia yacnocquid onquiabimboec ma mibi onquepayoc —quesho tantiash

⁷⁴ Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquo neyoc —queoapac caondash.

Adec 3tedec Petedo muanubien cachina bënë cuëdampac caondash.

⁷⁵ Adsho tantiashun Petedon Esusën chuiboedquo tantiactampac caondash. —Cachina bënë cuëdanabi icnuc mimbi ëbi caic: “Ëmbi isacmaid nec,” capendac tedesteden —quequin Esusën chuiboedquo tantiactanec umanuc puduenanec nidec Esus muauabosh natiaic shubinidpac caondash.

27

Pidato caid yacno

*Esus buanaid**(Mad 15.1; Duc 23.1-2; Uan 18.28-32)*

¹ Adnubien chuiquid dapabo aton tsusio utsi-bobëdi Esus isec ushenquoio badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —qeshun

² podo cataneshun ancanquid Pidato cuëmëdquid ismenuen Esus buampac caondash.

Esus bedmequid Udas têtaniadaid

³ Adnubien Udas Esus bedmeboed: —Unës uamechitembien iquec. Unës uametiapimbo iquebi. Èmbi bedboed piucquid shocoshëmpi 30ted meneoatanu —quianec abi meneboed tsusiobo menenuc nidpac caondash.

⁴ Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Nëid mimbi meneboed mibi menenuc chobi. Në bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic.

⁵ Adoaquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

⁶ Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque.

⁷ Matsu nacnenquidën tied bedquin nëid menenuna. Nuquin matsespenquoio isedquido unësacsho ambo chococanun aid tied bednuna —qeshun piucquid meniac caondash.

⁸ Aidon bedacsho isun nēbi aid tied cuēnquin nadopec. —Unēs uamequidēn bedaid tied nec — capec.

⁹ Aden Udasēn shocoshēmpi 30ted menete nuquin tsusedpa Edemias caidēn dada uapampicpaden napac caondash. Naden dada uapampic. “ ‘Aid bednuen Isadaidbon piucquid shocoshēmpi 30ted meneuidaid bedoashun

¹⁰ matsu nacnenquidēn tied bedquin meneoapondash,’ quequin Nuquin Papan chiaid dada uaombi,” quepampic Edemias.

Pidato caidēn Esus chuimaid
(*Mad 15.2-5; Duc 23.3-5; Uan 18.33-38*)

¹¹ Adnubien isadaidbo yuaquid ancanquid Pidaton Esus bēacsho chuipac caondash. —¿Min matses isadaidbo chuiquid dapamboda mibi nepe? —caquien Esusēn: —Ai, aid nebi —capac caondash.

¹² Adnubien abi chieshēnquidon muaquin Esusēn naid Pidato chuipac caondash. Adsho tantiashun Esusēn ěcbedenquio icpac caondash.

¹³ Adshobien Pidaton Esus padpiden chuoiaquin: —Mibi icsaid dadpen chuipec. ¿Tantienquioda ique? ¿Ěcbedantiapimboda ique? —caquien

¹⁴ ěcbedenquio icpac caondash Esusēn. —Nēidon muauac nebi —quequin chienquio icsho tantiash: —Adquid tantiambo iquembi —quepac caondash Pidato.

Esus unēs ua, quequin chiaid
(*Mad 15.6-15; Duc 23.13-25; Uan 18.38-19.16*)

15 Nuquin Papan isadaidbo unës uainquo icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedenedec. Pidaton: — ¿Tsutsi abentsëquimbi cuemepe? —cac isadaidbon chiacpadquid abentsëc cuemedenedec.

16 Esus bëabi icnuc uimanëmënquidquo Badabas cuëmëdquid nauedpac caondash.

17 Adnubien Esus cuidte chuisho tantianuec cho-choash dadpenquo tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash.

18 —Esus chieshënquidon: “Nuqui padenquo yanuc nuqui dëniaquec Esus chuiquid dapa yanushe,” queshun Esus bëaccosh. Nëmbo tabadquidon: “Esusquo cueme,” capashuni —quequin tantiaquin aden chuipanëdash Pidaton.

19 Adashic matses icsaido cuidte chuinuec tsadte dapan abucquo tsadtopondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “ ‘Aid dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

20 Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoen-dambi —quecuededpondash.

²¹ Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash.

²² Adoaquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

²³ Adoaquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiec cuëdec: —Cuesten dectanquin unës ua —quecuededpondash.

²⁴ Adsho —Padi icnuna —caqui niacbidanquiec adequi unës uate bunquiec cuesantiadpambo yansho isash: —Acte beccho —quepondash Pidato. Bëacsho tasun dapan cushtotanec mëpamëdquin abitedi ismepondash. Adashic Esus caic: —Nëid unës uametiapimbo iquebi. Nëid unës uamete bunec mibien cuidadtequidombo nendac. Ëmbien adotiapimbo iquec. Mëpamëdec bëchish ucud-acbimboec mimbi icsamiaid ucudebi —quiash mëpamëdquin ismepondash Pidaton.

²⁵ Adsho tantiashien: —Con nabobëdtsëqui adequi cuidadtequidombo icnuna —quecuededpondash abitedimbo.

²⁶ Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

*Esus mamëshunaid
(Mad 15.16-20; Uan 19.2-3)*

²⁷ Adoaquien sondadon Pidaton shubun Esus yuedshun: —Isec cho —cac aton sondado utsibo

dadpen cho-chopac caondash. Cho-choshon Esus mamënshumbededpac caondash unës uanumbi.

²⁸ Abi dasiuidaid ënapen icquid chicshun: — ¿Chuiquid dapada nedi? —quequin dashcute pi-umbo icquid dasiuintanquin

²⁹ mauete pinchuc-pinchucpambo icnuc nacnenaid mauemepac caondash. Adshumbic aton matses chuiquid dapan sananacbimboen sananuc abiucshun cuate sanamepac caondash. Adshumbic aton matses chuiquid dapa ismiacbimboen mamënshunquin: —Is. Isadaidbo chuiquid dapambo neque —queshun danëshën sebudquin Esus ismepac caondash.

³⁰ Adshumbic dacuishtucatanquin ambi cuate sanameboed bedshuntanquin aidëmbi matombudnepac caondash.

³¹ Aden mamënshuntanquin ambi dasiuimboed chictanquin aton dashcutebidi dasiuinoapac caondash. Adoshon: —Ma unësnuequin cuestas dectanec nidnu. Nid —quequin Esus buampac caondash.

*Esus cuestas dectanaid
(Mad 15.21-32; Duc 23.26-43; Uan 19.17-27)*

³² Buanquin Esus abi dectante cuate yuëmemebanquimbi dada nidaid Sidene caid yacnuësh choquid Simon cuëmëdquid Esusën yuëmiaid sondadon chiadtomebidampondash.

³³ Adobidanec nidec macuësh dapa yacno matses mapi canitebimboec isadquid Codocota caid yacno chopondash.

³⁴ Choshombien sondadon uba chinaid acte- quid paëmbo dauë nēcushaid Esus meneuidpon-

dash. —Në. Ac —cac pictsäc tantanec: —Padi —
quepondash aquenquo yec.

³⁵ Adshobien cüeste napotiaid bëboedën dec-
tampondash. Dectanshumbic ambi chicshum-
boed Esusën dashcute bednuequin sondadobon
abi cuëmëdquidtedi dada uabanshun tëchun san-
doshon cadotanequin dada uatempi puduemaiid
isbanquin Esusën dashcute bedbampondash.

³⁶ Adash: —Esus unëso isnu —quec sondado
tabadcuededpondash.

³⁷ Adshumbic: —“Nadquid icsho cuidquin unës
uac,” quequin ma isquidon tantianu —qeshun
cüeste cuëshën naden dada uapaccondash. —
Nëidquo Esus nec. Isadaidbo chuiquid dapambo
nec —quequin dada uaid Esusën mapino dectam-
pondash.

³⁸ Ampequid daëd cüesten ëquë dectambud-
cuenquin dectantanquin nënantanquo Esus dec-
tampondash.

³⁹ Adshobien podqued cuëmanquo Esus diadsho
isbidanequin chieshënquin chuipondash.

⁴⁰ —“Nuquin Papa tabadte shubu uashunaid
chic-chictanquin daëdec ushquin nacnenquin
nainendambi,” quiondaid yec bud. Nuquin Papan
madoambo yec unësenquo yec auëshquiobi bud —
cabidanepondash.

⁴¹ Adechidi chuiquid dapabo yec Moisesën dada
uampid chuibanquido yec tsusiobo yec quequido
Esus icsamboen mamënsnunec nadpondash.

⁴² —Utsibo ismenuembien comapenen
tantiaquin matses bëdamechitosh. Adembidi
comapenen tantiaquin nacnenash budsho
isnuqui. “Isadaidbo matses chuiquid dapambo

nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi.

⁴³ “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin mā Nuquin Papan budmenu. Unēsenquio icsho isnu —quepondash tsusiobo.

⁴⁴ Adnubien abēdta cuesten dectamboedon ampequidontsen Esus mamēnshumpondash.

Esus unēsaid

(Mad 15.33-41; Duc 23.44-49; Uan 19.28-30)

⁴⁵ Adnubien ushē cuembo icnuc inchēshbocpadquiec inchēshpondash. Ushē cuembo icnuc inchēshtanec ushē budambi ushēmbo yanoapondash.

⁴⁶ Ushēmbo yanubien Esus comapenec cuēdec nadpondash. —Eloi, Eloi, lama sabactani — quec con onqueten cuēdpondash. —¿Atotsieshun ēbi bēdamboen isenquio yano, Papa Edoen? —quec adondash.

⁴⁷ Adec cuēdsho tantiash isquido nadpondash. —Edias yampid cuēnchitequien nec — quiampondash.

⁴⁸ Adnubien Esus isec tabadquid abentsēc titinquianec nidshun shapu-shapupactsēcquid bedtampondash. Bedtanshumbic actequid mucacquid anidtsēcquidēn shapu-shapupactsēcquid punshun cueste dēdectanshun abuc sananec: — Chishmenu —queuidpondash.

⁴⁹ Adnubien abi isquido: —Padi. Nuquin tsusedpa Edias yampid choshon budmesho isnu — quepondash.

50 Adnubien padpidec buëdanquiec cuëdtanec Esus unëspondash.

51 Esus unësnuubi Nuquin Papa tabadte shubu uashunaid yacnuësh: —“Quënë uquëducquidën Nuquin Papa tabadtembo nec,” caidën utsi puduednushe —queshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bëdamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash.

52 Adec unësaid nauedaïd shëcuë bëtashite cuënote dapambo cuëshëdnubien Nuquin Papa tantiaquido ënden unësaïdo abentse-abentsec uincuenanec chopac caondash.

53 Esus uincuenan adec uincuenaidon shubu dadpen icquid Edusaden caïd yacno nidshun mat-ses dadpen ismepac caondash.

54 Nidaïd uëdëquenuc dacuëdampambo icsho isashien: —Esus unëso isnu —quiash tabadquido sondado chedo abi chuiquidbëdi dacuëdtanec: —Ma Nuquin Papan Madombobi nepayoc —quepac caondash.

55 Adnubien chidobo Cadidia yacnuësh Esusbëd choquin abi codocashumboedo Esus unëso isnuec ancuenashun isec tabadpac caondash.

56 Nëïdted icpac caondash. Nëïdic Madia Mactada yacnuësh choquid. Nëïdic Madia utsi Acobon tita. Aid Ose cuëmëdquidën titabidi niosh. Nëïdic Sebedeyon chido Uanën tita. Aid Acobo cuëmëdquidën titabidi niosh. Aidtedi uanoshon isbededec tabadpac caondash.

*Esus chococaid**(Mad 15.42-47; Duc 23.50-56; Uan 19.38-42)*

⁵⁷ Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash.

⁵⁸ Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton.

⁵⁹ Aden bedtanshun Osen Esus dashcute bëchish nibëdquidënquo nuamboshë icnuc datanedonepac caondash.

⁶⁰ Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caondash Ose.

⁶¹ Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

Esus nauedaid isec sondado tabadaid

⁶² Isadaidbon obeca bacuë unës uacpadën Esus unës uamiash abentsec ushashi chonoadtemaid ushëmbi Esus chieshënquido Pidato caid chiec nidpac caondash. Padiseyobobëdi nidshun chuiquid dapabon Pidato chuituidpac caondash.

⁶³ —Esus nadpadenec. “Unësash daëdec ushash uincuenendabi,” quec muapadeneque.

⁶⁴ Daëdec ushquin min sondado Esus nauedaid cudasmeta. Esusbëd icboedon chicshun

buanushe. Aden buanash: “Uincuenaccosh,” quec muanushe. Unēsabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshē ictsiashē. Min sondado: “Cudasta,” quequin chuita —capac caondash Esus chieshēnquidon.

⁶⁵ Adoaquien Pidaton: —Ai, con sondado buantan. Aden buanshun: “Unēsaid nauedaid cudasec databēdta,” cata —capac caondash.

⁶⁶ Adoaquien isadaidbo tsusiobon sondado buanshun cuēnote dapa bētashaid bucun bēbitaccapac caondash. —Bēbitaccaid isash: “Chuiquid dapan bēbitaccamiaid nec. Cuidnushe. Esus chictiapimbo iquebi,” ma quenu —queshun bucun bēbitaccapac caondash. Adoshon: —Beduanushe. Isquiec tabadta —capac caondash sondado chedo chuiquin.

28

Esus uincuenaid

(Mad 16.1-8; Duc 24.1-12; Uan 20.1-10)

¹ Esus unēsbon abentsec ushash abi chonoadtemaidēntsen abentsecbidi ushash dominco badiadnuc chidobo Esus nauedshun bētimboed isec tabadnuec padpidec choapac caondash. Mactada yacnuēsh choquid Madia utsibēd isec choapac caondash.

² Choash isec tabadnubi nidaid uēdēquiampac caondash. Adnubien Nuquin Papan abi yacnoshon uaid mayan bēda abucuēsh budtanquin cuēnote dapa bētashaid shēcbempac caondash. Adtanec cuēnoten tsadtopac caondash.

³ Mayan bēda yec abu bed-bedquiacbimboec ushēmbošhē bēchamauanquiec icpac caondash. Aton dashcute adquibidi bēchish nibēdquiec ushumboshē icpac caondash.

⁴ Adec dacuēdampambo icsho isashien unēsaid cudasquido sondado dacuēdtanec uēdēquēc tantiadempambo yec padishbudnepac caondash abitedi.

⁵ Adnubien mayan bēdan Madia chedo chuipac caondash. —Dacuēdenda. Cuesten dectanquin unēs uaboed Esus isnuec mibi tabadec.

⁶ Nibēdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuiopac caondash.

⁷ —Mimbi isboed Esusbēd icboedo chiec nid. Badedquio nidshun naden chuita. “Unēsboedi uincuenash Cadidia yacno abia nidshun mibi cainen-dac. Anoshon mimbi Esus isendac,” quequin chiec nid —caquien

⁸ auēshquiobi chidobo dacuēdboedi cuishonquēc titinquianec nidanepac caondash.

⁹ Titinquianec nidaneshobien Esusēnquiotsen bēquēpac caondash. Adash: —Mibi isnuec nebi —quepac caondash. Adshobien chidobon: —Con Icho nec —quequin ismenuen danēshēn sebudquin taē uidēn uapac caondash.

¹⁰ Adoquien Esusēn: —Dacuēdenda. Con utsibo ēbēd icboedo chiec nid. “Cadidia yacno nidec nid. Anoshon mimbi Esus isendac,” quequin chiec nid —caquien chiec chopondash Madia.

Esus uincuencho isun sondadon muauaid

¹¹ Madia nidnubien Esus nauedaid isquido sondado abi chomeboedo isadaidbo chuiquido chiec chopac caondash. Mayan bëda chonoc Esus uincuemoed chuituidpac caondash.

¹² Adoaquien isadaidbo chuiquidon aton chuiquid utsibobëd onqueshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —queshun piucquid dadpenquo menepac caondash.

¹³ —Mimbi isboedquo chienquo icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita.

¹⁴ Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —queshun

¹⁵ piucquid meniac bedanec nidec isadaidbo chuiquidon chiacpadec muapac caondash sondado. Adembidi nëbi isadaidbo dadpenshun: “Esus ampiac,” quequin chuioaic.

Ëbi chuibeneta, quequin Esusën chiaid

(Mad 16.14-18; Duc 24.36-49; Uan 20.19-23)

¹⁶ Adnubini Esusbëd icboedo 11tedi yec Esusën chiacnombo Cadidia yacno nidec macuësh dapa yacno nidanepondac.

¹⁷ Macuësh dapa yacno nidquimbi Esus istuidpondambi. Istuidshumbic: —Con Icbo neque. Ismenu —queshun danëshën sebudpondambi. Utsibombien: —¿Con Icbombobida nepeba? —capondash.

18 Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquio nebique. Mibitsen namenu.

19 Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëidbëd Nuquin Papan Mayan tabadeque. Utsibo ismenu,” que-tanquin aden acten mentobeneta.

20 Mimbi mentoaido chuiban. “Nuquin Icbon chiacpadec bëdamboec tabadnuna,” quequin ëmbi chuiboedtedi chuiban. Mimbi adosho isash mibëd iquendabi. Nidaid abitedi nibëdanabi icnuc mibi chedo nianenquio iquendambi. Adembidi ëbi tantiaquidotedi niantiapimbo iquebi —quepondash Esus ënquimbi chiec.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

446da786-5bd1-5ffa-85e2-9eff4052cf8b